

MADIU

Iesu Valana 'Atumaina Madiu 'ana kilukiluma.

Madiu tamu Iesu yana tovetutuyamavo 12 'adi 'aila'a 'wainega, we'e tamu 'ana wagava Livai. Yana folova takesi 'ana tolaugogona i folofolova Loma gabemani faifaidi. Mulieta Iesu i venuma'ivineni i vetovetuyama 'waineye.

Madiu de'e buki i kilumiga taunina yana 'aila'avo me Diu faifaidi. Me Diu i nuani i vo sai'afoga Yaubada 'ana Venuma'ivina i na mai bega taunina yadi kini. Ibeliu bonadiega i goleni Mesaia we'e bona Guliki 'wainega, Keliso. Diu to'edakumetavo Iesu yana 'eba mai lamuna i bavuyeni wata tomotoga fuefi nuadi i voganidi Madiu nuanuana i na ve 'waidie Iesu taunina mogitana Keliso me Diu yadi kini, begaidi i veifufu Iesu yana souyagi bani'odi kini. Wata 'ifwaidi vona i 'inanadi Vona'awaufaufa Nagami 'wainega, Yaubada 'ana Venuma'ivina faifaina vonanidi 'adi mogitana i souyedi Keliso 'wainega. Tamu nani faifaina i kilumaga, Iesu yana ve, luvetubama Yaubada yana 'Aila'a nageneye faifaina, wata yana vona-awatabai fuefi givagivadi tomotoga yadi luku Yaubada yana 'Eba Veimea nageneye faifaina i kiluma, bega tutuya de'e Yaubada i veveimea tomotoga 'waideye.

Iesu tubunavo tubulelelegidi.

1 ¹Iesu Keliso tubunavo side bani'odi i tubugedi, taunina Kini Devida 'ana wauma 'wainega i souyeni we'e Devida Ebelamo 'ana wauma 'wainega i souyeni.

²Begaidi side bani'odi,
Ebelamo natuna Aisake,
We'e Aisake natuna Iakobo,

³we'e Iuda natunavo Felesi wata Dela, inadi Temali,
we'e Felesi natuna Esiloni,
we'e Esiloni natuna Lami,

⁴we'e Lami natuna Aminadaba,

we'e Aminadaba natuna Nasoni,
 we'e Nasoni natuna Salimoni,
 5 we'e Salimoni ma yana vavine Leabi natudi Bwasa,
 We'e Bwasa ma yana vavine Ludi natudi Obedi,
 we'e Obedi natuna Iese,
 6 we'e Iese natuna Kini Devida.

We'e Devida 'wainega i velamuga side bani'odi,
 Devida natuna Solomoni, we'e inana nagami Ulaia yana vavine,
 7 we'e Solomoni natuna Lioboama,

we'e Lioboama natuna Ebaya,
 we'e Ebaya natuna Esa,

8 we'e Esa natuna Iosefata,
 we'e Iosefata natuna Dielome,
 we'e Dielome natuna Usaia,

9 we'e Usaia natuna Iotama,
 we'e Iotama natuna Easi,
 we'e Easi natuna Esekaia,

10 we'e Esekaia natuna Manasa,
 we'e Manasa natuna Emoni,
 we'e Emoni natuna Iosia,

11 we'e Iosia natuna Iekonaia ma tainavo i tubuga i miamiani,
 tutuyanina 'waineye me Babiloni i maia me Isileli i 'ive'avinidi i nawedi
 yadi 'awalaweye.

12 We'e i nawediga Babiloni, 'wainega i velamuga side bani'odi,
 Iekonaia natuna Salatiela,
 we'e Salatiela natuna Selubabela,

13 we'e Selubabela natuna Abiuda,
 we'e Abiuda natuna Eliakimu,
 we'e Eliakimu natuna Asodi,

14 We'e Asodi natuna Sadoki,
 we'e Sadoki natuna Ekimu,
 we'e Ekimu natuna Eliuda,

15 we'e Eliuda natuna Eleasa,
 we'e Eleasa natuna Mateni,
 we'e Mateni natuna Iakobo,

16 we'e Iakobo natuna Iosefa.

Iosefanina kumanina yana vavine Meli, we'e Melinidi Iesu kumanina i
 gogoleniga Keliso, Yaubada 'ana Venua'ivina, inana.

17 Bega 'ai'edi ta na lu'iawawaga Ebelamo 'wainega i na nago Kini
 Devida 'waineye 'aila'a 14. We'e Kini Devida 'wainega i na nago
 tutuyanina me Babiloni i maia me Isileli i nawedi yadi 'awalaweye 'adi
 'aila'a 14. Wata tutuyanina 'wainega i na nagoga nika Keliso i tubuga

wata 'aila'a 14, bega matatabudi ta na luvetubamidi tubudelidelidi wauma 'aitamogana.

Iesu Keliso yana tubuga.

¹⁸ Iesu Keliso yana tubuga side bani'odi. Meli, kumanidi Iesu inana, wata vavinenidi veveakutagonidi Iosefa faifaina, bola kebu i da nagiga 'aiseotogineye i miamia, siwe 'akonadi i 'aseti i miana 'Anu'anunu 'Atumaina yana toketokena 'wainega. ¹⁹ Iosefa kumanina toveakutagona i nuavita bwaikina Meli yadi miana faifaina, siwe fai yana sauluva tonovi'avadi bega kebu nuanuana Meli i na 'ivebunumayagidi nuanuana givagivayega i na bailedi.

²⁰ Igodi yana nuantuananina i da 'idewaiga, lovane i 'eno'eno nika i 'enoneganega anelose i souyeni i voneni i vo, Iosefa, 'omu Kini Devida tubuna, kebu 'u na venuanaluga Meli 'adi nagi faifaina, we'e i mianaga 'Anu'anunu 'Atumaina yana toketokena 'wainega, 'asa'aiana 'u na nagidimo. ²¹ ^b Mulieta i na venatuna, kwamana tamu iavetana i na tubuga 'u na goleni Iesu, 'ana saivila To'ita'ita'i, fai yana tomotoga i na 'ita'ita'iedi yadi sakona 'waidiega. ²²⁻²³ ^c Bega Meli yadi miana wata Iesu yana tubuga faifaidi, basenadiotoga 'Auvea Yaubada i vona yana tolu'ivona 'wainega 'ana mogitana i souyeni i vo,

Vavine ne'e'elina siwe i na miana,

Kwamana iavetana i na tubuga,

I na goleni Imanueli, 'ana saivila 'ida Yaubada taiadi.”

²⁴ Mulieta Iosefa i tovoi, 'Auvea Yaubada yana anelose yana vona i vematayakeyakeni, Meli i nagidi, i nawedi yana vanuge. ²⁵ Siwe kebu tamu tutuya taiadi i da veluaga i nagoga nika i venatuna, kwamananina Iosefa i goleni Iesu.

To'aseti bwaikidi i nagoi Iesu 'waineye.

2 ¹ Elodi i ve-kini 'awalawa Iudia, yana tutuye Iesu i tubuga 'awalawanina nageneye 'atamana Bedeliema 'waineye. Kebu tutuya manamanawenaga nika tomotoga 'ifwaidi i le'wai Ielusalema. Tomotoganidi i maiaga inala yana 'eba lakayega yadi 'aseti bwaikina 'ubwana faifaidi. ² I le'wai i velutoli i vo, Ava'aibe bei kwamana i tubuga 'omi me Diu yami Kini? 'A 'asetai tamu Kini i tubuga fai no'o bega tamu 'ubwana 'a 'iseni i laka, Kininina 'ana tugusa, bega 'a maia ma yama ve'ililibu 'a na 'odu 'waineye.”

³ Tutuyanina Kini Elodi yadi vonanina i nogai i venuafouviga bwaikina wata me Ielusalema matatabudi i kololo i vo, Bola Elodi wata Kini 'ivauna taiadi i na vetalaga, 'ida vita ta na veluagai.” ⁴ Mulieta tovelomu 'adi

^a 1:18 Luk 1:27,35 ^b 1:21 Luk 1:31 ^c 1:23 Ais 7:14

to'edakumetavo wata ve'etoboda 'adi tovevo i goleva'augidi 'waidie i velutoli i vo, Ava'aibe bei Keliso, Yaubada 'ana Venua'ivina i na tubuga?"
^{5d}Yana velutoli i tutuli i vo, 'Atamana Bedeliema 'awalawa de'e Iudia nageneye. Basenadiotoga Yaubada yana Vona yana Buki nageneye tamu yana tolu'ivona Keliso yana tubuga faifaina side bani'odi i kilumi i vo,
^{6e}Omi me Bedeliema 'awalawa Iudia nageneye 'wa miamianiga, Yami 'atamana siaina siwe 'ana wagava bwaikina 'awalawanina nageneye.

Fai 'waimiega tamu to'edakumeta bwaikina i na souyeni.

To'edakumetanina yaku tomotoga me Isileli i na 'i'isave'avinidi."

⁷Vonanina Elodi i noganogaiga bega to'asetanidi i goledi i nagoi 'waineye 'aise'avadi i veifufu-giva. I velutoliedi nuanuana i na 'asetai ma'avia 'ubwananina i souyeni i 'iseni. ⁸I velutoliedi i 'a'avana mulieta i vetunedi side bani'odi i voneyedi i vo, 'Wa na nagoi Bedeliema kwamana 'wa na luala-deweni, tutuyanina 'wa na velugaiga 'wa na maia 'wa na voneku wata yau a na nago, 'waineye a na 'odu'odu."

⁹Elodi i vona'a'avana nika tomotoganidi i tauya. I nunagoi wata 'ubwananina i 'iseni debanagodiega, i 'edakumesedi i nagoga nika 'ubwana i 'ailove kwamana yana 'eba tubuga tabwaneye. ¹⁰We'e tutuyanina to'asetanidi 'ubwana i'iseniga yadi sosoana kebu ta na vonaga 'adi vebae 'waidie. ^{11f}Tutuyanina i le'wai i luku vanuge, kwamana wata inana Meli i 'isedi i miamia i 'odu kwamana 'waineye, ma yadi ve'ililibu i subiai, mulieta yadi vuanayega yadi nuakalikali i 'ewadi kwamana mataneye i yatodi. Nuakalikalinidi kukuafou, golida tutulina bwaikina, vane 'ailuga magaidi 'atumaidi, tamu Mulo we'e tamu Falanikisenisi, vanenidi wata tutulidi bwaikidi.

¹²We'e Yaubada 'enoneganegayega tomotoganidi i vonedi kebu wata i na vilaviladi Elodi 'waineye, bega i viladi mali 'edeamo i nagoi yadi 'atamane.

Iesu i degeni.

¹³Tutuyanina to'asetanidi i tauya i nunagoi, lovane Iosefa i 'enoneganega. 'Auvea yana anelose i souyeni 'waineye i voneni i vo, 'U na tovoi kwamana inana taiadi 'wa na dega 'wa na nagoi 'awalawa Itifita. Bei 'wa na miamia fai Kini Elodi kwamana i na lualeni nuanuana i na luvewafai, mulieta yau a na vonana 'awalawanina 'wa na 'iaweni."

^{14-15g}Bega Iosefa i tovoi kwamana inana taiadi lovane i dega i nago Itifita, bei i mianaga Kini Elodi i wafa. Yadi mia Itifita faifaina basenadiotoga Yaubada i vona yana Buki nageneye i vo,
 Natuku Itifitayega a goleni i mai."

Vonanina nagami tamu yana tolu'ivona i voneyeni, mulieta 'ana mogitana i souyeni.

Kini Elodi kwakwama Siasiaidi i luwewafadi.

¹⁶We'e Elodi i lukamata-wayoga i 'asetai 'ubwana 'adi to'asetai i vekalieni begaidi i nuasako bwaikina. Yana tolugaviavo i vonedi i luku 'atamana matatabuna 'waidie, Bedeliema wata 'atamana siaidi 'waidie, kwakwama iavetadi 'adi malamala 'ailuga wata 'ifwaidi kebu 'adi malamala 'ailuga i da veluagadiga matatabudi i luwewafadi. I luwewafadiga fai 'ubwana 'adi to'asetai yadi vona 'wainega Elodi i 'asetai Iesu 'ana malamala 'ana vetonu bola kebu i da veluagaiga. ¹⁷Kwakwama siaidi i leodiga faifaina basenadiotoga tolu'ivona 'ana wagava Ielemaia i vona-vagata. Tutuyanina i leodiga 'ana mogitana i souyeni i vo,

¹⁸^h'Atamana Lemaⁱ 'wainega vevine bonadi i nogai, 'we'wela wata taivonavona.

Liteli 'adi wauma natudiavo faifaidi i taivonavona, kebu tamu aitoi 'ana fata nuadi i na 'iveagiagidi, fai matatabudi i wafa.”

Itifitayega i nagoi Nasaledi.

¹⁹⁻²⁰I miamia Itifita nika Elodi i wafa, mulieta 'Auvea yana anelose i souyeni Iosefa 'waineye 'enoneganegayega i voneni i vo, Itifitayega 'u na tovoi, kwamana inana taiadi 'wa na vilami 'wa na nagoi 'awalawa Isileli. Elodi 'akonadi i wafa bega kebu tamu aitoi nuanuana kwamana i na luwewafai.” ²¹Bega Iosefa i tovoi kwamana inana taiadi i vagavaidi i viladi i nagoi 'awalawa Isileli. ²²I viladi i nunagoi Iosefa ma yana kololo fai vala i nogai Akeleasi, tamana Elodi tutulina, i ve-kini 'awalawa Iudia 'waineye. Iosefa kebu nuanuana bei i na mia, nika wata anelose 'enoneganegayega i voneni bega i nago 'atamana Nasaledi 'awalawa Galili bei yadi vanuga i 'iyogona i mia. ²³Nasaledi bei i 'aiyogona i miaga, tamu Yaubada yana tolu'ivona yana vona-vagata Iesu faifaina 'ana mogitana i souyeni i vo, I na gologoleni taunina tomogo Nasaledi.”

Ioni Tobafitaiso yana lau'age.

3 ¹⁻²^kTutuyanina Iesu i miamia Nasaledi, Ioni Tobafitaiso i velamu i lalau'age Iudia sali'avu'avuye i vo, Sai'afoga Yaubada yana veimea i na souyeni 'waimie begaidi yami sauluva sakoidi 'wa na vedumwe'ubu'ubusedi.” ³Ioni kumanina basenadiotoga Yaubada yana tolu'ivona 'ana wagava Aisea i voneyeni i vo,

^h 2:18 Iel 31:15; Nag 35:19 ⁱ 2:18 'Atamananina Bedeliema lilivaneye. ^j 2:23 Luk 2:39; Ion 1:45-46 ^k 3:2 Ais 40:3

Sali'avu'avuye tamu tomogo i vegolegole i vo,
 'Auvea yana 'eda 'wa na vusia,
 Wata 'wa na sivetonovi yana 'eba nago.”

⁴Ioni 'ana kaleko sakoidi 'aisaya kameli vutuvutudiega i 'idewadi we'e bulumakau bunudi 'ana wa'ila, 'ana'ana limwana wata mai'awa. ⁵⁻⁶Tomotoga Ielusalemega, Iudia yana 'eba veimea matatabuna 'wainega wata 'awalawa fuei Ufa Iolidani lilivaneye, matatabudi Ioni bonana i nogai i maia, bega 'aitamogana 'aitamogana yadi sakona i lu'ivona i 'a'avana Ioni i bafitaisodi Ufa Iolidani 'waineye.

⁷Ioni i 'isanawedi totafalolo Falisi wata Sadusi i mimai 'waineye bafitaiso faifaina, i vonedi i vo, 'Omi tosakona, 'o'olo bani'odi. Igodi 'wa vo, 'A na dega Yaubada yana nuasako wata yana vematavuloga 'waidiega.” Begaidi yami vaiseba 'wa vo, 'Akonadi 'a nuavilama 'u da bafitaisoma,” siwe kebu nuanuami yami sauluva sakoidi 'wa na vedumwe'ubu'ubusedi. ⁸'Nagami yami sauluva i na tonova 'ami 'eba 'isa 'akonadi 'wa nuavilami 'wa da vo bani'odi welavi 'atumaina vuagina, mulieta a na bafitaisomi. ⁹Wata kebu 'wa na vo, 'Ima Ebelamo tubuma bega 'ima Yaubada yana tomotoga kebu i na vematavulogima.” Siwe a na vonemi, kebu 'aivaita 'wa na velugai. Kebu nani bwaikina Yaubada mataneye 'omi Ebelamo tubunavo. Yaubada 'ana fata tutulimi Ebelamo tubunavo i na 'idewadi kileu we'e 'waidiega. ¹⁰Sai'afoga Yaubada i na vematavulogimi yami sauluva sakoidi faifaidi 'wa da vo 'akonadi yana tamuyoko i da yadali bega welavi 'aitamogana 'aitamogana kebu vuagidi 'atumaidiga i na talagidi i na tawedi 'ai-'ala'alase.

¹¹“We'e yau, 'wa na nuavilamiga 'ana tugusa a na bafitaisomi ufayega, kumanina mulikuye i mimai i na bafitaisomi 'Anu'anunu 'Atumainega wata 'ai-'ala'alata 'wainega bani'odi yami sakona i na 'ala-lekoadi. Wata tomogonina toketokeotogina, yau kebu bani'odiga, kebu i da lubwaineku 'waineye a na vetofolova fai taunina bwaikina a bunumayaga. ¹²Tutuyanina Kelisonina i na maiga, tomia fwayafwaya matatabudi i na vonayavuga mataneye wata i na veimeyedi 'wa da vo bani'odi waifei 'ana tolaukadi, waifei wata 'ani'andinidi i na yato'edi mulieta i na vedodogidi yana bubuwakeye, we'e yogo i na tunuya 'ainina kebu yana 'weuga 'waineye.

Iesu yana bafitaiso.

¹³Tutuyanina Ioni tomotoga i kikiavebafitaisodi, Iesu Galiliega i tauya i nago Ufa Iolidani bei i na bafitaiso 'waineye. ¹⁴Ioni nuanuana i na talaboda begaidi i vo, Awale igodi yau a na bafitaisomu, yau i lubwaineku 'u da bafitaisoku.” ¹⁵Iesu Ioni yana vona i tutuli i vo, Kebu 'u na nuanuaga,

¹ 3:8 Fol 26:20 ^m 3:9 Ion 8:33-40; Lom 4:13 ⁿ 3:11 Ion 1:33; Fol 1:5

'asa'aiana 'u na bafitaisokumo. I lubwaineda Yaubada yana nuanua tonovidi matatabuna ta na 'idewadi,” nika Ioni i nogaya i vo, 'Atumaina.”

¹⁶Iesu i bafitaiso i 'a'avana i lakama 'avale nika abama i 'anikililia Yaubada 'Anu'anununa yana yaveobu bani'odi bunebune i 'iseni i obuma 'waineye. ¹⁷°Mulieta bona i nogai abamega i vo, De'e natuku nuafouku a nuakalikalieni, faifaina a sosoana bwaikina.”

Seitani Iesu i silubuya.

4 ¹⁻²°Ufa Iolidani 'waineye Iesu i bafitaiso i 'a'avana, Yaubada 'Anu'anununa i vagavaia i naweni sali'avu'avuye bega yaiaina 'adi to'edakumeta Seitani i na silubuya. Sali'avu'avuye Iesu i miamia 'aiata 40, 'aiatanidi nagedie i na velu'ui faifaina siwe kebu tamu sai'afo 'ani'ani i da 'alatonovi, mulieta i lase. ³Tutuyanina Iesu i lase nika bei Seitani i souyeni 'waineye, nuanuana Iesu i na be'u sakona 'waineye bega i silubuya i vo, 'Ai'edi 'omu mogitana Yaubada Natuna, 'u na vona de'e kileunidi i na ve'ani'ani.” ⁴°Iesu Seitani yana vona i tutuli i vo, Kebu. Basenadi i kilumi Yaubada yana Buki nageneye i vo,

Tomotoga yadi mia 'ana 'atumaina wata yawaidi kebu 'ani'ani'ava 'wainega i da veveluagadi.

We'e mogitana Yaubada yana Vona i voneyediga, 'waidiega tomotoga yadi mia 'ana 'atumaina wata yawaidi i na veluagadi.”

⁵I 'a'avana wata Seitani Iesu i vagavaia i naweni Ielusalema, vanuga 'eba velu'ui tabwaotogineye i lakaveni. ⁶°Bei wata i voneni i vo, 'Ai'edi mogitana 'omu Yaubada Natuna de'e bega 'u na souga, veviga kebu 'u na veluagai fai Yaubada yana Buki nageneye i vo,

Yau Yaubada yaku anelose a na vonedi i na 'i'isave'avinimu, Nimadiega i na 'i'ivaisemu bega kebu tamu sai'afo 'agemu 'u na nikeyedi.”

⁷°Iesu Seitani yana vona i tutuli i vo, Kebu, fai wata Yaubada yana Buki nageneye i vo,

'Ai'edi taunimi 'wa na tauyemi 'eba ilagi 'waidie, kebu i da lubwaineni 'wa na taidaida Yaubada 'waineye 'aivaita faifaina.”

⁸Bega wata Seitani Iesu i vagavaia i naweni i lakaveni 'oya manamanaweotogina tabwaneye 'eba veimea wata 'ai'aiwabu matatabuna fwayafwaya 'waineye i veni. ⁹I veni i 'a'avana i voneni i vo, 'Ai'edi ma yamu subia 'u na 'odu 'waikuye, de'e 'eba veimeanidi wata 'ai'aiwabunidi matatabuna a na velemu, fai yau yaku 'eba veimea.” ¹⁰°Seitani i vonavonaga nika Iesu i vo, Seitani 'asa'aiana 'u 'ailove 'u nago. We'e Yaubada yana Buki nageneye i vonaga i vo,

° 3:17 Mad 12:18, 17:5 P 4:1 Ibu 2:18, 4:15 ¶ 4:4 VeL 8:3 † 4:6 Same 91:11,12
s 4:7 VeL 6:16 † 4:10 VeL 6:13

Yami 'Auvea Yaubada 'waineye 'wa na 'odu'odu,
'Aiseotogina faifaina 'wa na folofolova.”

¹¹ “Seitani i tauya i nunago, anelose i souyeni Iesu i 'ivaiseni.

Iesu yana folova i velamu Galili 'waineye.

¹² Tutuyanina Iesu vala i nogai Ioni 'akonadi vanuga 'eba yogona 'waineye i yatoi, Kini Elodi i lumaniga faifaina, bega i tovoi i nago 'awalawa Galili. ¹³ Iesu yana 'atamana Nasaledi, siwe i nagoga kebu bei i da miaga, i nagoga 'atamana Kafaneomi bei i miabui. 'Atamananina Kafaneomi Lavu Galili lilivaneye, 'awalawa Sebuloni wata Nafitalai nagedie. ¹⁴ 'Awalawanidi nagedie i nagoga, fai basenadiotoga Yaubada yana tolu'ivona Aisea i vona-vagata bega 'ana mogitana 'akonadi i souyeni i vo,

¹⁵ ¹⁵ 'Awalawa Sebuloni wata Nafitalai, balabala weyaginega, Ufa Iolidani vi'ainega, wata Lavu Galili 'ununa bei mali tomotoga taunidi kebu Diu yadi 'awalawa. ¹⁶ Tomotoga 'awalawanidi 'waidie i miamianiga nuadi kebu magemagetadiga 'wa da vo dudubala 'ana tomia,

Siwe mageta bwaikina i na 'iseni.

Fwayafwaya 'ana nuanua nuadi i 'ewadi bega 'anu'anunudi wafawafadi,

Siwe magetanina nuadi i na kiavemagetadi.”

¹⁷ Tutuyanina Iesu i vilai i mai Galili i miamia bei yana lau'age i velamu i vo, Yami sakona 'wa na vedumwe'ubu'ubusedi, sai'afoga Yaubada Yana veimea i na souyeni 'waimie.”

Toyaubani 'adi 4 Iesu i goledi.

¹⁸ Tamu 'aiata Iesu i balabalaga Lavu Galili balebaleamo tomotoga 'adi 'ailuga i 'isedi, Saimoni tamu 'ana wagava Fita wata taina Anidulu, vuatayega igana i 'ona'onadi fai taunidi toyaubani. ¹⁹ Iesu i vonedi i vo, We'e yaubaninina 'wa baileni, 'wa na maia 'wa na vetovetutuyama 'waikuye, yau yaubani tamu a na vemi bega tomotoga 'wa na 'ona'onadi 'wa na mimaiedi Yaubada 'waineye.” ²⁰ Nika Saimoni wata Anidulu vualalalakana i 'iawedi Iesu i yogo'waili.

²¹⁻²² Sai'afo i vaganago wata Sebedi ma natunavo i 'isedi, Iemesa wata Ioni yadi wakeye yadi vuata i agiagilidi. Ma taina Iesu i vonedi i vo, 'Wa maia,” nika tamadi ma wakana i 'iaweni Iesu taiadi i nagoi.

Iesu i ve, i lau'age wata i 'ive'atumai.

²³ Iesu toyaubani i goledi i 'a'avana i nago 'awalawa Galili matatabuna 'waineye, yadi 'eba miava'auta 'waidie i veve, i lalau'age wata i

'live'atumai. I ve 'eba miava'auta 'waidie, i lau'age Vala 'Atumaina Yaubada i na veimeyedaga faifaina, wata i 'ive'atumai, tomotoga 'adi viga tulina tulina 'waidie. ²⁴We'e 'awalawa Silia matatabuna Iesu valana i nogai bega yadi toviga 'adi viga tulina tulina i miedi 'waineye. 'Ifwaidi tomotoga i veveviga bwaikina, 'ifwaidi yaiaina sakoidi i agedi, 'ifwaidi viga tamu 'wainega i alala wata 'ifwaidi bwalobwalokodi, matatabudi Iesu i 'ive'atumaiddi. ²⁵Tomotoga 'aila'a bwaikina i va'auta Iesu 'waineye Galiliega, 'atamana 10 wagava luvetubama Dekafolisi, Ielusalemega, Iudiyega wata Ufa Iolidani vi'ainega i damanama.

Iesu yana lau'age 'oya 'waineye sosoana mogitana faifaina.

5 ¹'Aila'a bwaikina i maiaga Iesu i 'isedi begaidi i laka 'oyeye bei i miabui. ²I miabuina wata yana tovetutuyamavo i maia lilivaneye i miabui mulieta i velamu i ve 'waidie i vo,

³Egavo i 'asetadi 'anu'anunudi yadi toketokena siaidi bega taunidi i tauyedi Yaubada 'waineye,

'Eba sosoana 'waidie fai 'akonadi Yaubada i veveimeyedi yana 'Aila'a nageneye.

⁴"We'e egavo 'asiau ma yadi nuavita i 'we'we'welaga,

'Eba sosoana 'waidie fai Yaubada nuadi i na 'iveololodi i na sosoana.

⁵*Egavo i nunuaobuga yadi sauluva bikadi,

'Eba sosoana 'waidie fai Yaubada i vona'awaufaufa fwayafwaya matatabuna i na veledi.

⁶We'e egavo nuanuadi bwaikina sauluva 'atumaina wata tonovina,

'Eba sosoana 'waidie, bega nuanuananina Yaubada i na veledi nika 'adi fata.

⁷^Egavo mali tomotoga i 'i'isanuakalikaliedi,

'Eba sosoana 'waidie fai wata Yaubada i na 'isanuakalikaliedi.

⁸^We'e egavo yadi nuanua wata yadi sauluva tonoviotogidi,

'Eba sosoana 'waidie fai 'awaie i na luku Yaubada 'waineye.

⁹Egavo i na vevelu'ase'ase tonuasako 'waidie mia sosoana faifaina,

'Eba sosoana 'waidie fai Yaubada i na goledi taunidi natunavo.

¹⁰^We'e egavo Yaubada yana nuanua i vevematayakeyakedi bega vita i veveluagadi mali tomotoga 'waidiega,

'Eba sosoana 'waidie fai 'akonadi Yaubada i veveimeyedi yana 'Aila'a nageneye.

¹¹^Fai 'omi yaku tovetutuyamavo begaidi faifaiku mali tomotoga i na yagayagaimi, vita i na vevelemi, wata nani tulidi tulidi faifaiddi i na awavesakoyemiga, 'eba sosoana 'waimie. ¹²^'Wa na nuani, basenadiotoga

^w 5:4 Ve 7:17 ^x 5:5 Efe 4:2 ^y 5:7 Iem 2:12-13 ^z 5:8 1 Ion 3:2-3 ^a 5:10 1 Fit 3:14

^b 5:11 1 Fit 4:14 ^c 5:12 Iem 1:2

tovedumwe'ai'ai Yaubada yana tolu'ivonavo vita i veledi, wata 'omi bani'odi vita 'wa na veluagai tosakona 'waidiega, siwe 'wa na sosoana bwaikina fai 'ami tutula bwaikina Yaubada i yatoi i lulukamata abame.

Iesu 'ana tovetumaganavo bani'odi eyaga wata mageta.

¹³ Omi bani'odi eyaga tomia-fwayafwaya 'awasasadie. Eyaga, nani kibwana 'ana to'ive'iwana, 'omi wata bani'odi yami ve 'waidiega tosakona 'wa na 'ive'atumaidi. Eyaga nani 'atumaina, siwe 'ai'edi i na ve'ulaufaga kebu 'ana fata i na vegola-vaitugana bega ta na taweni tomotoga i na vagavedobwadobwani, wata 'omi bani'odi 'ai'edi yaku vona 'wa na vedumwe'ai'aieniga kebu 'ana fata tamu ava'ai 'atumaina 'waimiega i na souyeniga.

¹⁴ ^dWata 'omi bani'odi mageta, Yaubada yana 'eda'eda 'ana tokiavemageta tomia fwayafwaya 'awasasadie. 'Ai'edi tamu 'atamana i na 'idewai 'oya deba'aiotogineye ava'ai i na velubabaleni? Kebu. Wata 'omi yaku mageta, tomotoga yadi 'eba 'isa. ¹⁵ ^eKebu tamu aitoi mageta i da kabukabunina 'aivoeyega i da tatalafwaseni. Mageta 'ana 'eba yato 'waineye i lulutalauleni bega tomotoga vanuganina nageneye matatabudi i magemagesedi. ¹⁶ ^fOmi wata bani'odi yami sauluva i na tonova tomotoga matadie bega yami sauluvanidi 'atumaidi i na 'isedina Tamami abame i miamiaga i na subiai.

Veimeanidi Mosese 'wainega i maiga, Iesu faifaidi i ve.

¹⁷ ^gYami nuanua kebu 'wa na vo, Yau a mai veimeanidi Mosese 'wainega wata venidi Yaubada yana tolu'ivonavo 'waidiega a na geudi." Kebu, yau a maiga veimeanidi wata venidi 'adi mogitana wata 'adi tonovina a na sivemagese'a'avedi. ¹⁸ ^hA vona mogitana 'waimie, bola abama wata fwayafwaya i na 'a'ava kebu bei i na 'eno-vagata. We'e de'e veimeanidi 'adi nuanua bei i na 'eno'eno, veimeanidi bwaikidi wata saiotogidi siwe i na 'eno'eno i na nagoga nagami Yaubada yana nuanua i na ve'a'avai. ¹⁹ ⁱBegaidi 'ai'edi aitoi veimeanidi siwe tamu saiotogina kebu i na vematayakeyakeniga wata mali tomotoga 'waidie i na veve bega veimeanina kebu i na vematayakeyakeniga, Yaubada yana 'Aila'a nageneye 'ana wagava siaina i na venani-'avo'avovo. We'e 'ai'edi aitoi veimeanidi i na vematayakeyakediga wata mali tomotoga i na veve 'waidie bega veimeanidi i na vematayakeyakedi, Yaubada yana 'Aila'a nageneye taunina 'ana wagava bwaikina. ²⁰ ^jA na vonemi, ve'etoboda 'adi tovevo wata totafalolo Falisi igodi i vo, Ve'etoboda matatabuna 'a vevematayakeyakedi bega yama sauluva tonovidi." We'e 'ai'edi 'omi 'wa

^d 5:14 Ion 8:12 ^e 5:15 Mak 4:21 ^f 5:16 Efe 5:8-9; Ion 3:21; 1 Fit 2:12 ^g 5:17 Lom 3:31
^h 5:18 Luk 21:33 ⁱ 5:19 Iem 2:10 ^j 5:20 Mad 23:3; 2 Tim 3:5

na vo, 'A na luku Yaubada yana 'Aila'a 'waineye," nagami yami sauluva i na tonova-'afo'afo, we'e Falisi kebu 'wa na saladiga.

Iesu yana ve nuasako faifaina.

21^kDe'e veimeanina tuatuaina 'akonadi 'wa 'asetai i vo, Kebu 'wa na luwewafaga," wata tamu i vo, 'Ai'edi aitoi i na luwewafaga 'eba vonayavuga 'waineye i na nago." 22^lI vonaga mogitana, we'e yau a na vonemi. 'Ai'edi aitoi i na nuasakomo iana 'waineye, tomogonina i na nago 'eba vonayavuga 'waineye. 'Ai'edi aitoi iana i na awavesakoyeni i na vo, 'Omu kebu tamu sai'afo ava'ai 'atumaina 'waimuyega i na souyeni," tomogonina wata 'eba vonayavuga bwaikina 'waineye i na vonayavuga. We'e aitoi iana i na fali'wave'waveniga, voke Yaubada i na veimea 'ai-'ala'alata kebu yana 'weuga 'waineye i na nago.

23-24^mBegaidi 'ai'edi 'u na nago vanuga 'eba velu'ui 'waineye nuanuamu yamu 'anivelena-maimaiga 'u na velomuyeni Yaubada mataneyey nika iamu yana nuasako 'waimuye 'u na nuani, 'u baileni i na 'eno'eno nagami 'u vilamu iamunina taiadi 'wa na veiana mulieta 'u na vilamuga yamu 'anivelena-maimaiga 'u na velomuyeni Yaubada mataneyey.

25ⁿ'Ai'edi aitoi nuanuana i na yatomu 'eba vonayavuga 'waineye, bola kebu 'wa na lukuga tomogonina 'u na veianeni bega yana nuanuananina i na baileni. 'Ai'edi kebu 'wa na veveiana-matayo'oga, tovevonayavuga 'waineye i na yatomu bega filisimani nimadie i na 'anivelenemu, vanuga 'eba yogona 'waineye i na silukuvemu. 26^aA vona mogitana, kebu i na 'etoyavu-matayo'omu bei 'u na miamia nagami tutula 'u na yato'a'avai mulieta i na 'etoyavumu.

Iesu yana ve bunu 'ana sakona faifaina.

27ⁿDe'e veimeanina 'akonadi 'wa 'asetai i vo, Kebu tamu aitoi yana vavine 'u na luobuyedi." 28^eWe'e yau a na vonemi, 'ai'edi aitoi tamu vavine i na 'isenimo nuana i na vevona, siwe 'asa'aiana 'akonadi nuanega taiadi i sakona. 29^l'Ai'edi matamunina nuanuamu bwaikina, sai'afoga i da kiavebe'umu 'u da sakona, 'u kiamwanuya 'u taweni. 'U na kiamwanuyaga veviga sai'afo nika kebu 'u na sakonaga, mulieta 'amu fata 'aitamoganega 'u na luku abame. We'e 'ai'edi matamu 'ailugana 'waidiega 'u na sakosakonaga, mulieta 'u na wafa Yaubada i na tawemwadodouyemu 'ai-'ala'alase, veviga bwaikaotogina 'u na veluagai. 30^l'Ai'edi nimamunina nuanuamu bwaikina sai'afoga i da kiavebe'umu 'u da sakona, 'u boboi 'u taweni. 'U na boboiga veviga sai'afo nika kebu 'u na sakonaga, mulieta 'amu fata 'aitamoganega 'u na luku abame. We'e 'ai'edi nimamu 'ailugana 'waidiega 'u na sakosakonaga, mulieta

^k 5:21 Sou 20:13 ^l 5:22 Iem 3:6; 1 Ion 3:15 ^m 5:23-24 Mak 11:25 ⁿ 5:27 Sou 20:14

'u na wafa tomogomu matatabuna 'u na lukuveni 'ai-'ala'alase, veviga bwaikaotogina 'u na veluagai.

Iesu i ve sa'ila faifaina.

³¹°De'e veimeanina 'akonadi 'wa 'asetai i vo, 'Ai'edi aitoi nuanuana yana vavine i na vesa'ilidi tamu lubulubu 'waineye sa'ila vonana i na kilumi vavine i na veledi i na vo, 'Omi 'akonadi 'wa 'a'ava 'waikuyega.”
³²We'e yau a na vonemi, 'ai'edi aitoi yana vavine kebu sauluva sakoina i na 'idewaiga siwe i na vesa'ilidi, bani'odi i 'a'anivelenedi sakona 'waineye. We'e 'ai'edi i na nagiga mali tomogo taiadi tomogonina i nagidiga wata i sakona.

Iesu i ve vona'awaufaufa faifaidi.

³³°Wata veimeanina tuatuaina 'akonadi 'wa 'asetai i vo, 'Ai'edi aitoi i na vona'awaufaufa Yaubada mataneye, kebu i da lubwaineni yana vona'awaufaufanina i na geuya.” ³⁴°We'e yau a na vonemi, 'ai'edi 'wa na vona'awaufaufaga kebu tamu ava'ai 'ana wagava 'wa na 'inanai bega 'wa na vo, Yama vona'awaufaufanina toketokena.” Kebu 'wa na vo, 'A vona'awaufaufa abama mataneye,” fai abamanina Yaubada yana 'eba miabui 'ai'aiwabuna. ³⁵Wata kebu 'wa na vo, 'A vona'awaufaufa fwayafwaya mataneye,” fai fwayafwayanina Yaubada yana 'eba ba.” Wata kebu 'wa na vo, 'A vona'awaufaufa Ielusalema mataneye,” fai Ielusalemanina Kini bwaikina yana 'atamana. ³⁶Wata kebu 'wa na vo, 'A vona'awaufaufa 'unu'unuma 'waidiega,” fai 'ai'edi 'akonadi i na buduliga kebu 'ana fata 'wa na vona i na ve'wau'wauwauga, we'e 'ai'edi 'wau'wauwagina kebu 'ana fata 'wa na vona i na buduli. ³⁷'Ai'edi naninina mogitana 'wa na 'idewaiga 'wa na vo, 'E'e,” we'e 'ai'edi tamu nani kebu 'wa da 'idewaiga 'wa na vonamo 'wa na vo, 'Kebu,” we'e 'ai'edi yami vona i na vefuega bani'odi 'wa na vo, 'Tamada,” vonanina i mai Seitani 'wainega.

Kebu sakona 'wa na tutuliga.

³⁸'De'e veimeanina 'akonadi 'wa 'asetai i vo, 'Ai'edi tamu aitoi matamu i na 'etomwanuya, wata matana 'u 'etomwanuya, we'e aitoi nigomu i na tutukadiaga, wata nigona 'u tutukadia.” ³⁹°We'e yau a na vonemi. 'Ai'edi aitoi ava'ai sauluvaga sakoina i na 'idewai 'waimuye, kebu nimana 'u na tutuliga. 'Ai'edi tamu tomogo 'ae'aemuye i na 'ainikega, wata tamu 'ae'aemu 'u 'iyoyoeni i na niki. ⁴⁰°'Ai'edi tamu aitoi i na nuasako 'waimuye tamu sauluva faifaina bega i na nawemu 'eba vonayavuga 'waineye, mulieta toveimea i na vonemu 'amu kalekoyega yamu

° 5:31 VeL 24:1 P 5:33 Sou 20:7 ¶ 5:34,37 Iem 5:12 † 5:38 Sou 21:24
 s 5:39 Lom 12:19 † 5:40 1 Kol 6:7

sauluvanina faifaina 'u na tutula, siwe wata 'amu talauma 'u veleni. 41 'Ai'edi tamu tomogo bani'odi gabemani i na lukakademu i na vo, Yaku kukua 'u na 'ewa ta na nago tamu 'atamana 'waineye, siwe kebu a na tutulimuga,” kebu faifaina 'u na nuavita, ma yamu sosoana wata 'u na vaganago tamu 'atamana 'waineye. 42 We'e 'ai'edi aitoi tamu ava'ai nuanuana i na velu'ui 'waimuye, kebu 'u na veumokaiga, 'u veleni. We'e 'ai'edi aitoi i na vo, Side naninina 'u veleku bola a na vevilai,” kebu 'u na ve'o'oleniga 'u tauyeni.

Egavo i na vesauluva sakoina 'waimie 'wa na nuakalikali.

43 “Tomotoga 'ifwaidi yadi nuanua 'akonadi 'wa 'asetai i vo, Emiavo 'aisedi 'wa na nuakalikali, we'e egavo i vesauluva sakoina 'waimie 'wa vedumwe'ai'aiedi.” 44 “We'e yau a na vonemi. Egavo i vevesauluva sakoina 'waimie 'wa na nunuakalikali wata egavo vita i vevelemiga faifaidi 'wa na vevelu'ui. 45 “Bani'odi 'wa na vesauluvediga i lubwainemi 'omi Tamami abame natunavo. To'atumaina wata tosakona 'adi nuakalikali i vesala Yaubada 'wainega fai yana inala i kabukabu matatabumi faifaimi wata yana 'wei matatabumi i vevelemi. 'Omi wata bani'odi, egavo i vesauluva sakoina 'waimie, 'wa na nuakalikali. 46 'Ai'edi egavo i nuakalikaliemiga 'aisedi 'waidie 'wa na nunuakalikali, yami nuakalikalinina Yaubada kebu i na tutuliga, tomotoga fuei wata tosakona taiadi ediavo 'aise'avadi i nunuakalikali. 47 Emiavo 'aisedi 'waidie 'wa na vekaiwaga kebu nani bwaikinaga, tomotoga fuei wata Yaubada 'ana tobatu taiadi yadi sauluva, ediavo 'aisedi 'waidie i vevekaiwa. 48 “We'e 'omi i lubwainemi yami sauluva matatabuna 'atumai'avadi, bani'odi Tamami abame yana sauluva.

Iesu yana ve 'anivelena-maimaiga faifaina.

6 1 “Wa na 'i'isave'avinimi kebu tomotoga matadie 'wa na 'a'anivelena wekewekoma 'waidie 'ami subia faifaina. 'Ai'edi 'wa na 'a'anivelena tomotoga matadie, Tamami abame kebu 'ana tutula i na velemiga.

2 “We'e mogitana i lubwainemi givagivayega 'wa na 'a'anivelena tomotoganidi nuanuadi 'aivaita 'waidie. Tovekali yadi 'anivelena ma 'ana evulega 'atamanafouye wata 'eba miava'auta nagedie, nuanuadi tomotoga fuei i na 'isedi i na subiadi. Siwe a na vonemi, subianina 'asa'aiana 'adi tutulanina i 'e'ewa-vagaseni. 3-4 “We'e 'omi, givagivayega wekewekoma 'wa na 'i'ivaisedi siwe kebu emiavo 'waidie 'wa na lu'ivonaga. Ava'ai givagivayega 'wa 'i'idewadiga 'akonadi Tamami i 'isemi wata i na tutulimi.”

u 5:43 Vei 19:18 v 5:44 Fol 7:60; Lom 12:14,20 w 5:45 Efe 5:1 x 5:48 1 Fit 1:16
y 6:1 Mad 23:5 z 6:2 Mad 25:37-40 a 6:4 Kol 3:23-24

Iesu yana ve velu'ui faifaina.

⁵Wata Iesu i vo, 'Ai'edi 'wa na velu'uiga kebu tovekali 'wa na saladiga. Nuanuadi bwaikina i na tovoi i na vevelu'ui 'atamanafouye wata 'eba miava'auta nagedie 'adi subia faifaina. Siwe a na vonemi, subianina 'asa'aiana 'adi tutula i 'e'ewa-vagaseni. ⁶We'e 'omi, 'wa na vevelu'uiga, 'wa na luku 'wa na saiboda mulieta 'wa na velu'ui Tamami 'waineye taunina to'isagiva. Yami sauluva givagivadi matatabuna i 'asetadi bega i na tutulimi.

⁷⁻⁸“Egavo i 'odu'odu yaubada-vekavekali 'waidie kebu 'wa na saladiga yami velu'ui 'wa na lumanamanawedi. Yadi nuanua i vo 'ako, Yama velu'ui manamanawedi yama yaubadavo i na nogaidi.” We'e Tamami 'akonadi 'ami vita i 'asetadi mulieta faifaidi 'wa vevelu'ui. ⁹“Wa na velu'uiga, side bani'odi 'wa na velu'uiedi. 'Wa na vo,

Tamama,

'U miamia abame,

'Omu magemagetamu,

Nuanuama tomotoga fuema 'a na ve'ililibuyemu.

¹⁰Nuanuama 'u na veveimeyema,

Nuanuama tomia fwayafwaya yamu nuanua 'a na 'i'idewadi, bani'odi tomia abama yamu nuanua i 'i'idewadi.

¹¹Nuanuama 'ama'ama 'asiau 'u na velema.

¹²“Mali tomotoga i vesauluva sakoina 'waimeye 'a nuatavunidi,

'Omu wata bani'odi yama sakona 'u da nuatavunidi.

¹³“Eba sailubu 'waidie kebu 'u na tauyema,

Siwe 'u na 'ita'ita'iema Seitani taunina Tosakona 'wainega.”

[Yamu veimea, yamu toketokena, wata yamu 'ai'aiwabu,

Kebu i na 'a'avaga, i na 'eno-vagata.

Vona mogitana, yama nuanua bani'odi.]

¹⁴Side bani'odi 'wa na vevelu'uiedi, fai 'ai'edi mali tomotoga sakona i na 'idewai 'waimie 'wa na nuatavunidiga, wata Tamami abame yami sakona i na nuatavunidi. ¹⁵“We'e 'ai'edi kebu, wata kebu Tamami i na nuatavunimiga.”

Iesu yana ve ve'udigana faifaina.

¹⁶“Tutuyanina 'wa na ve'udigana 'ani bega yami velu'ui i na vetoketoke Yaubada 'waineye, kebu 'wa na vemaigisivilavila tovekali bani'odi. Nuanuadi maigidi i na lu'ufafedi bega mali tomotoga i na 'asetadi i veve'udigana nika i na subiadi. Siwe a na vonemi, subianina 'asa'aiana

^b 6:5 Luk 18:10-14 ^c 6:8 Mad 6:32 ^d 6:12 Mad 18:21-22 ^e 6:13 Luk 22:40; Ion 17:15; 2 Tes 3:3 ^f 6:15 Mak 11:25-26 ^g 6:16 Ais 58:5-9

'adi tutula i 'e'lewa-vagaseni. ¹⁷⁻¹⁸We'e 'omi, 'wa na ve'udigana 'ani 'wa na velu'ui faifaina, maigimi 'wa na luvunagidi wata 'wa na veinata bega kebu tamu aitoi i na 'l'isa'lnanamiga. Tamami, kumanina kebu 'wa da 'ise'iseniga i na 'asetami, fai yami sauluva givagivadi matatabuna i 'asetadi bega i na tutulimi.”

Iesu yana ve abama 'ana ve'ai'aiwabu faifaina.

¹⁹^hWata Iesu i vonedi i vo, Side bei fwayefwayeye kebu kukua fueidi 'wa na luvea'wedi fai bola 'walu'walu i na 'ivesakodi wata i na lu'wanabudulidi 'alo tovainago vanuga i na baia i na luku i na vinagodi. ²⁰ⁱWe'e mogitana i lubwainemi nani 'atumaidi 'wa na luvea'wedi abame, bei kebu tamu 'walu'walu 'alo i na lu'wanabudulidi 'alo wata tovainago i na vinagodi. ²¹^lWa na nuani, ava'aibe bei yami 'ai'aiwabu i na 'eno'enoviga, bei tutuya fueidi yami nuanua i na nunago.

²²⁻²³Side bani'odi. Matami bani'odi nuami 'ana mageta. 'Ai'edi nani 'atumaidi 'wa 'ise'isediga, nuami matatabuna magemagetadi, we'e 'ai'edi nani sakodi 'wa na 'ise'isediga, nuami matatabuna i na dudubalidi. I na dudubaliga, kebu tamu sai'afo mageta, dudubala mogitana.

²⁴Kebu tamu aitoi 'ana fata i na vetofolova toveimea 'adi 'ailuga 'waidie fai bola tamu i na nuakalikaliene we'e tamu i na vedumwe'ai'aieni, wata, tamu i na ve'ililibuyeni we'e tamu i na awavesakoyeni. Kebu 'ami fata 'wa na vetofolova Yaubada wata kukua 'waidie.

Iesu i vonaga Tamada yana 'isave'avina ta na vetumaganenimo.

²⁵^jFai kebu 'ami fata 'wa na vetofolova Yaubada wata kukua 'waidie, begaidi a na vonemi. Kebu 'wa na venuafouviga 'ami'ami wata alu'ai yami mia fwayefwayeye faifaina wata kaleko tomogomi faifaidi. 'Wa da nuani, ava'ai naniga bwaikina, 'ami'ami 'alo yami mia? Wata talauma 'alo tomogomi? A na vonemi, yami mia wata tomogomi nani bwaikidi. ²⁶^k^lWa na nuanidi manuga. Kebu i da bakubakulaga, kebu i da 'a'aile'waga, wata kebu yadi bubuwakaga, siwe Tamami abame i 'i'isave'avinidi. Ava'ai naniga bwaikina? Manuga 'alo 'omi? ²⁷Begaidi kebu tamu nani faifaina 'wa na venuafouviga. Kebu tamu aitoi 'ana fata yana mia fwayefwayeye i na kiavemanawei yana venuafouviga 'wainega.

²⁸Awale talauma faifaina 'wa vevenuafouviga? 'Wa na nuani makavuvula yadi tabo. Kebu i da folofolova wata kebu 'adi kaleko i da 'i'idewadi siwe ma 'adi vaigavu 'atumaidi. ²⁹^lA na vonemi. Kini Solomoni tomogo 'ai'aiwabuna 'ana vaigavu 'atumaidi, we'e makavuvula 'atumaiotogidi. ³⁰Mosomoso matatabuna nani-'avo'avovo, 'asiau

^h 6:19 Iem 5:1-6; 1 Tim 6:9-10 ⁱ 6:20 Luk 18:22; Kol 3:1-2 ^j 6:25 Fil 4:6; Ibu 13:5; 1 Fit 5:7 ^k 6:26 Luk 12:6-7 ^l 6:29 1 Kin 10:23

ta 'ise'isedi we'e 'awa'awai i na tunudi i na 'alaidi siwe Yaubada i veve'wesenidi. We'e 'omi tamu nani bwaikina mataneye, mogitana ma 'ami nuanuana i veve'wesenimi. Awale yami vetumagana Yaubada 'waineye mweadi? ³¹ Begaidi kebu nuafoumi i na veviga 'wa na vo, Ava'ai 'ani'aniga 'a na 'ani, ava'ai alu'aiga 'a na yemu, 'alo wata ava'ai 'wainega tomogoma 'a na talaumadi? ³² Yaubada 'ana tobavu naninidi nuanuadi bwaikina faifaidi i vevenuafouviga. We'e 'omi naninidi nuanuami, Tamami abame 'akonadi yami nuanua i 'asetadi. ³³ We'e 'wa vevenuafouviga 'asa'aiadi, i lubwainemi nagami taunimi 'wa na tauyemi Yaubada i na veveimeyemi wata yana nuanua tonovidi 'wa na 'i'idewadi, mulieta naninidi matatabuna i na velelele. ³⁴ Begaidi kebu ma yami venuafouviga 'wa na vo, 'Awa'awai ava'ai vitaga i na souyedi?" fai 'aiatanina 'waineye wata Yaubada i na 'ivaisemi. Kebu 'asiau 'ana vita wata 'awa'awai 'ana vita taiadi 'wa na nualuvetubamidi.

Iesu yana ve 'amalakibu wata awavesako faifaidi.

7 ¹ Wata Iesu i vonedi i vo, Kebu mali tomotoga 'wa na 'amalakibuyedi i na nunago wata Yaubada i na 'amalakibuyemi. ² Mali tomotoga 'wa na awavesakoyediga wata 'ami awavesako 'wa na veluagai yami awavesakonina 'ana 'isa'isa bani'odi.

³ Awale iamu mataneye fwayafwaya nani siaina 'u 'iseni faifaina 'u vonavona, we'e kebu 'u da nuaniga 'omu 'ibwalobwalo'u bwaikina matamuye? ⁴ Kebu 'ana nogaya 'atumaina 'u vo, Iaku, nuanuaku matamu i lufwaluya a na 'ewai," we'e, 'omu taunimu matamuye 'ibwalobwalo'u bwaikina. ⁵ 'Omu tovekali, 'u awavesako siwe wata sauluvanidi 'u 'i'idewadi. Nagami taunimu matamuyega 'ibwalobwalo'u 'u na 'ewai bega 'u na 'isadewa nika 'ana fata fwayafwaya nani siaina 'u na 'ewai iamu matanega.

⁶ 'Ai'edi nani 'atumaidi 'ou'ou ta na veledi, bola i na 'ivekokovidi wata i na ovada, wata bani'odi Yaubada yana Vona 'Atumaina kebu 'wa na 'aniveleneni 'ana tovedumwe'ai'ai 'waidie bola vita i na velele. We'e 'ami fwasalu 'wa na tawediga bawe 'waidie bola i na vatuveyokeyokedi, wata bani'odi Yaubada yana nani 'atumaidi kebu 'wa na 'anivelenedi 'ana tovedumwe'ai'ai 'waidie fai 'waidie i na venani-'avo'avovo.

Iesu yana ve velu'ui toketokena faifaina.

⁷ Wa na vevelu'ui bega Yaubada i na velele, 'wa na lalauialaga 'wa na veluagai, 'wa na velutolitoliga i na nogayemi saiboda i na sibaleni. ⁸ Vona mogitana, egavo i na vevelu'ui Yaubada i na veledi, egavo i

^m 6:33 Same 37:4,25; Luk 18:29-30 ⁿ 7:7 Mak 11:24; Ion 14:13-14 ^o 7:8 Iem 1:5; 1 Ion 5:14-15

lalaualagi i na veluagai, egavo i na velutolitoliga i na nogayedi saiboda i na sibaleni.

9-10¹Ifwaimi ma natumiavo, kebu 'ana fata natumiavo 'ani'ani i na velu'uiemi we'e kileu 'wa na veledi, 'alo igana we'e dinigala 'wa na veledi. 11²Omi tosakona siwe tutuya fuei avai natumiavo nuanuadi nani 'atumaidi 'wa veveledi. 'Omi yami nuakalikali natumiavo 'waidie sai'afu bwaikina, we'e Tamada abame yana nuakalikali bwaikaotogina 'waimie, 'ai'edi 'wa na velu'uieni nani 'atumaidi i na velemi.

12³Ava'ai nuanuami mali tomotoga i na 'i'idewai 'waimie 'omi wata bani'odi 'wa na vesauluvedi. Vona de'e 'aitamogana Yaubada yana veimea matatabuna i mai Mosese 'wainega wata yana tolu'ivonavo yadi vona 'adi 'aseta mogitana.”

Iesu yana ve 'eda 'ailuga faifaidi.

13-14⁴Wata Iesu i vonedi i vo, 'Edanina i nago abame siaina wata 'ana 'awa welilina begaidi kebu tomotoga fuei beidimo i da luku mia-vagata i da veluagai. We'e 'edanina i nago 'ai-'ala'alase bwaikina wata 'ana 'awa bababana, beidimo tomotoga fuei i lukuluku. Begaidi i lubwainemi 'wa na luku 'awa welilineamo.

Iesu i matakia tolu'ivona-vekavekali faifaidi.

15⁵Wa na 'isa'isa i na nunago tolu'ivona-vekavekali i na vekaliemi. 'Awasasamie bani'odi emiavo wata 'wa da vo 'aisaya tauvanuga we'e mogitana 'aisaya kasikasisidi bani'odi. 16⁶Vuagidi 'waidiega 'wa na 'isa'inanadi tomotoga 'atumaidi 'alo sakoidi. 'Adi 'isa'isa side bani'odi. Kebu 'ana fata kalibo ta na kadia ulaulawa 'wainega wata kebu 'ana fata 'ala'ai vuagina ta na kadia 'uwe 'wainega. 17⁷Ai'edi welavi 'atumaina wata vuagina 'atumaina, we'e welavi sakoina wata vuagina sakoina. 18⁸Kebu 'ana fata welavi 'atumaina we'e vuagina sakoina, wata kebu 'ana fata welavi sakoina we'e vuagina 'atumaina. 19⁹“We'e welavinidi kebu i da vuavuaga-'atumi matatabuna i na talagidi i na valo'udi i na 'alaidi. 20¹⁰Begaidi 'ami fata tolu'ivonanidi 'wa na 'asetadi yadi sauluva 'waidiega.

Tovematayakayaka 'aisedi i na luku abame.

21¹¹Wata kebu 'wa na vo 'ako, Tomotoganidi i ve'awa-'Auvea 'waikuye matatabudi i na luku abame, Yaubada yana 'Eba Veimea 'waineye. Kebu, we'e mogitana egavo Tamaku abame yana nuanua i na vevematayakeyakedi, taunidi i na luku. 22¹²'Awaie Vonayavuga 'ana 'Aiata 'waineye fuei i na mai 'waikuye i na vo, 'Auvea, 'Auvea, 'amu

P 7:11 Iem 1:17 9 7:12 Luk 6:31; Lom 13:8-10 † 7:14 Ion 10:9; Fol 14:22

s 7:15 Fol 20:29; 2 Fit 2:1 † 7:16 Iem 3:13 u 7:19 Ion 15:6 v 7:21 Luk 6:46; Iem 1:22,25

wagavayega Yaubada yana Vona 'a lu'ivona mali tomotoga 'waidie, wata 'amu wagavayega 'a vona yaiaina i 'awa'a'idi we'e 'ifwaidi tomotoga matadie 'eba nuavogana wata 'eba nua'ewa fuedi 'a 'idewadi.”²³ *Siwe yau a na vo, 'Omi tosakona, 'wa vaganago, kebu tamu sai'afo a da 'aseta-tonovimi.”

To'aiyogona vanuga 'adi 'ailuga.

²⁴Wata Iesu i vonedi i vo, Vonanidi 'akonadi a veifufuyediga egavo i na nogaidi i na vematayakeyakediga taunidi bani'odi to'aiyogona vanuga ma yana 'aseta. To'aiyogonanina nagami kabutu'u 'atumaina i venua'ivineni, 'ogola fa'alidi i 'ewadi wata ovu manamanawedi i aladi bega yana vanuga matatabuna i yogoni. ²⁵Tutuyanina 'wei i 'wei, weyagata i obu, kaukau bwaikina i nunuga vanuganina kebu i da 'etofia fai vanuga fa'alina i yogoni 'ogola 'atumaidi 'waidiega. ²⁶We'e egavo yaku vona i na nogaidi siwe kebu i na vematayakeyakediga taunidi bani'odi tamu to'aiyogona sakoina. To'aiyogonanina kabutu'u sakoina i venua'ivineni nidule i 'aiyogona. ²⁷Tutuyanina 'wei i 'wei, weyagata i obu, kaukau bwaikina i nunuga vanuganina i 'etofia. I foiaga matatabuna i 'ivesakoi.”

²⁸⁻²⁹*Tutuyanina Iesu yana venidi i ve'a'avadi, 'aila'a bwaikina nuadi i voganidi fai ma yana veimea i veve 'waidie, kebu bani'odi yadi ve'etoboda 'adi tovevo.

Iesu tomogo waiwaiseselina i 'ive'atumaia.

8 ¹Iesu yana ve i 'a'avana, 'oyayega i obuma wata 'aila'a bwaikina mulineye i nagoi. ²We'e tamu tomogo waiwaiseselina i mai ma yana ve'ililibu i 'odu Iesu mataneye i vo, 'Aueva, 'ai'edi nuanuamu 'amu fata 'u na 'ive'atumaiku.” ³Iesu tovigana i 'abitonovi i vo, Fai bani'odi, nuanuaku, 'u ve'atumai.” Nika tomogonina i ve'atumai 'ana viga i 'a'ava. ⁴Bega Iesu i voneni i vo, Kebu tamu aitoi 'waineye 'u na lu'ivonaga, nuanuaku tonovimu 'u na nago tovelomu 'waineye, nagami i na 'isemu. 'Aisaya 'u na veleni i na kabuni Yaubada 'waineye faifaimu, bani'odi basenadiotoga Mosese i voneyeniga Yaubada yana Buki 'waineye towaiwaiselina i ve'atumaiga faifaina. Tovelomunina i na 'isemu i na ve'awamogitana 'akonadi 'u ve'atumai wata bani'odi mali tomotoga i na 'asetai.”

Tolugavia i velu'ui Iesu 'waineye 'aivaita faifaina.

⁵Iesu i nago 'atamana Kafaneomi, bei tamu Loma tolugavia bwaikina i veluagai, tolugavianina i velu'ui Iesu 'waineye 'aivaita faifaina. ⁶I vo, 'Aueva, yaku tofologa i miamia vanuge, 'asa'aiana 'ivie i 'eno'enomo

w 7:23 2 Tim 2:19 * 7:28-29 Luk 4:32; Ion 7:46 y 8:4 Vei 14:1-4; Mak 7:36

i veveviga bwaikina.” ⁷Iesu i vo, Ta na nago a na 'ive'atumaia.” ⁸Siwe tolugavianina Iesu yana vona i tutuli i vo, Kebu, 'Auvea, yau tomogo siaiku, 'ai'edi 'u na luku yaku vanuge, kebu 'ana 'isa 'atumainaga. 'U na vonamo we'e yaku tofолоva i na ve'atumai. ⁹A 'asetamu ma yamu veimea bega 'amu fata 'u na 'ive'atumaia. Yau wata ma yaku veimea yaku tolugavia 'waidie 'aku fata a na vo, 'U nago,” nika i na nago, wata a na vo, 'U mai,” nika i na mai, wata yaku tofолоva a na voneni a na vo, Side 'u 'idewai,” nika i na 'idewai. Wata yau bani'odi, yaku to'edakumetavo yadi veimea a vevematayakeyakedi. 'Omu wata ma yamu veimea 'u na vonamo nika viga i na 'a'ava.”

¹⁰“Tutuyanina Iesu i nogai yana vonanina, nuana i vogani 'aila'a i vonedi i vo, De'e Loma 'ana tomotoga siwe yana vetumagana kasikasisina, we'e 'omi me Isileli Yaubada yana tomotoga, siwe kebu bani'odi vetumagananina a da veluagai 'waimie. ¹¹“A na vonemi, 'awaie tomotoga fuedi i na va'auta 'awalawa tulina tulina 'waidiega i na luku abame Yaubada yana 'Eba Veimea 'waineye bega Ebelamo, Aisake, wata Iakobo taiadi i na 'aniluvetubama. ¹²“We'e taunidi igodi i vo, 'Ima Yaubada natunavo,” i na tawedi tanotanoge dudubala 'waineye, bei i na 'we'we'wela wata maigidi i na yuyuyudi fai veviga bwaikina.”

¹³Mulieta Iesu i vona tolugavianina 'waineye i vo, 'U na nago yamu vanuge, naninina faifaina 'u vetumagana, mogitana i na souyeni 'u na 'iseni.” Iesu i vona'a'ava nika 'awasasanina nageneye tofолоvanina i ve'atumai.

Toviga fuedi Iesu i 'ive'atumaiddi.

¹⁴Tamu tutuya Iesu i nago Fita yana vanuge. Bei Fita yana vavine inadi i 'isedi 'ivie i 'eno'eno tomogodi i luyauyauta. ¹⁵Iesu nimadie i 'abi, yauyautanina i 'awalililia i tovoi Iesu 'ana'ana i 'idewadewa.

¹⁶I lavia tomotoga ediavo yaiaina i agediga i miedi Iesu 'waineye. Iesu i vona yaiaina i 'awa'a'idi wata toviga matatabuna i 'ive'atumaiddi. ¹⁷“Yana 'ive'atumai toviga 'waidie Aisea yana vona 'ana mogitana i souyeni. Taunina tamu Yaubada yana Vona 'ana tolu'ivona basenadiotoga i kilumi i vo,

Taunina 'aiseotogina 'ada viga i 'ewadi wata yada veviga i 'ewayavuledi.”

Tomotoga 'ifwaidi nuanuadi igodi Iesu 'waineye i na vetovetutuyama.

¹⁸Iesu lilivaneye 'aila'a bwaikina i 'isedi i vona yana tovetutuyamavo 'waidie i vo, Ta na nagoi no'o bega lavu vi'ainega.” ¹⁹Nika bei tamu me Diu yadi ve'etoboda 'ana tove i mai Iesu 'waineye i vo, Tove, yau 'akonadi

z 8:10 Mad 15:28 a 8:11 Luk 13:28-29 b 8:12 Mad 25:30 c 8:17 Ais 53:4

a tauyeku 'waimuye 'ai'edi ava'aibe 'u na nunagoga yau taiadi.” ²⁰ Iesu tomogonina yana vona i tutuli i vo, 'U na nuani 'ou'ou walawala'ai ma 'adi ovu, manuga ma 'adi giuva, we'e yau a vetomotogaotoga, kebu yaku vanuga bei a na 'eno 'alo a na veawai. 'Ai'edi 'omu yau taiadi ta na nagoga vita 'u na veluagadi.”

²¹ Wata tamu tomogo, taunina tovetutuyama i mai i vona Iesu 'waineye i vo, 'Auvea taiadi ta da nago, siwe nuanuaku a na miamia nagami tamaku a na tavunina mulieta a na mai a na vetutuyamemu. ²² Siwe Iesu i vo, 'Asiauna ta na nago we'e 'u baileni, egavo kebu nuanuadi i na vetutuyameku, taunidi 'anu'anunudi wafawafadi, yami towafa i na vetavuna.”

Iesu yagina bwaikina i 'iveniwalovi.

²³ Iesu yana tovetutuyamavo taiadi i dodoga wakeye i tauya. ²⁴ I nunagoi nika kaukau bwaikina i nunuga yagina waka i ludododogi, we'e Iesu i 'eno'eno. ²⁵ Iesu yana tovetutuyamavo i luvagovagoni i vo, 'U 'ita'ita'ieda 'Auvea, sai'afoga ta na wafa.” ²⁶ “Iesu i 'isa i vonedi i vo, Awale 'wa kololo? 'Omi yami vetumagana mweadi.” Bega i tovoi kaukau wata yagina i talabodedi nika yagina wata kaukau i 'awatagonidi i niwalova bwaikina. ²⁷ We'e yana tovetutuyamavo matatabudi nuadi i voganidi i vo, Ava'ai tomogoga de'e? Nani matatabuna wata yagina kaukau taiadi bonana i vematayakeyakeni.”

Tomotoga 'ailuga yaiaina i agediga Iesu i 'ive'atumaiddi.

²⁸ Iesu ma enavo i damana lavu vi'ainega 'awalawa Gegesa. Bei tomotoga 'adi 'ailuga i veluagadi taumatayega i mimai. Basenadi yaiaina i agedi bega toketokedi, faifainanina tomotoga matatabudi i kololoyedi 'edanina 'waineamo kebu i da nunagoi. ²⁹ Tutuyanina Iesu i 'iseni i vebwaubwau i vo, 'Omu Yaubada Natuna, ava'ai 'u na vaima? Vematavuloga 'ana tutuya bola, we'e voke 'u mai 'ama vematavuloga faifaina.”

³⁰⁻³¹ Sai'afu liliyadi bawe fatala bwaikina i luluduaduala bega yaiainanidi tomotoga 'waidie i velu'ui Iesu 'waineye i vo, 'Ai'edi nuanuamu 'u na vona 'a na 'awa'a'imga, 'u na tauyema no'o bawenidi 'a na agedi.” ³² Iesu i vonedi i vo, 'Asa'aiana 'wa souyemi 'wa nagoi.” Iesu yana voneye yaiainanidi i 'awa'a'idi i nagoi bawe i agedina fatala matatabuna i dega, 'oyeamo i obu i sou lavuye i ve'alamonumu.

³³ We'e bawe 'adi to'isave'avinavo i 'iseni i dega i nagoi 'atamane, bei nani matatabuna i veifufuyedi wata Iesu tomotoganidi i 'ive'atumaiddiga faifaina i veifufu. ³⁴ 'Atamananina 'ana tomotoga i nogai bega i nagoi

Iesu 'waineye, i 'iseni wata i veugeugeni kebu i na miamia yadi 'awalaweye.

Tomogo bwalobwalokona Iesu i 'ive'atumaia.

9 ¹Me Gegesa Iesu i veugeugeni begaidi Iesu ma enavo i dodoga wakeye i viladi i damana Kafaneomi, taunina yana 'atamane. ²^sWe'e tomotoga 'ifwaidi iadi tamu i vebwalokoga ma 'evo'evona i evai i mieni bega Iesu i na 'ive'atumaia. Iesu i 'isedi i 'asetai ma yadi vetumagana bega tomogonina i voneni i vo, Natuku, kebu 'u na kolologa, yamu sakona 'akonadi a nuatavunidi."

³We'e 'ifwaidi ve'etoboda 'adi tovevo yadi nuanua i vo, De'e tomogo awale Yaubada i vona-uvi'agali, Yaubada 'aiseotogina 'ana fata sakona i na nuatavunidi." ⁴Iesu yadi nuanua i 'asetadi bega i vonedi i vo, Awale nuanua sakoidi nuamie i 'eno'enovi? ⁵⁻⁶^hYau a vetomotogaotoga ma yaku veimea fwayefwayeye bega 'aku fata tomotoga yadi sakona a na nuatavunidi. Tomotoga 'adi 'ive'atumai vitana fai 'ai'edi a na vona siwe kebu i na ve'atumaiga, 'wa na 'asetai a vekali, kebu ma yaku veimea a vona-'avo'avovo. Siwe toviga de'e a na 'ive'atumaia 'wa na 'iseni bega 'wa na 'asetai kebu a da vona-'avo'avovo 'aku fata sakona a na nuatavunidi." Bega Iesu tomogo bwalobwalokona i voneni i vo, 'U tovoi, 'amu 'evo'evu 'u evai 'u nago yamu vanuge." ⁷Iesu yana voneye tomogonina i tovoi i nago yana vanuge. ⁸Tutuyanina 'aila'a i 'iseni i kololo i 'asetai Yaubada toketokena begaidi i subiai i vo, Vona mogitana, Yaubada veimea bwaikina i 'aniveleneni tomotoga 'waideye bani'odi sakona 'ana nuatavuna."

Iesu Madiu i goleni, 'waineye i na vetovetutuyama.

⁹Bei tomogo i 'ive'atumaia Iesu i 'iaweni, i nunagoga nika takesi 'ana tolaugogona 'ana wagava Madiuⁱ i 'iseni yana 'eba folova 'waineye i miamia. Bega i voneni i vo, 'U mai taiadi ta na nago yaku tovetutuyama," nika Madiu i tovoi Iesu taiadi i nago.

¹⁰Mulieta Iesu ma yana tovetutuyamavo i 'ani'ani Madiu yana vanuge nika takesi 'ana tolaugogona fuedi wata 'ifwaidi tosakona i mai ma fuedie i 'ani'ani. ¹¹^jWe'e 'ifwaidi me Diu totafalolo Falisi i 'isedi i nagoi Iesu yana tovetutuyamavo i velutoliedi i vo, Ava'ai faifaina yami Tove tolaugogona vivinagodi wata 'ifwaidi tosakona taiadi i 'ani'ani?" ¹²Iesu yadi vona i nogai i vona-awatabai 'waidie i vo, Egavo 'atumaidi kebu nuanuadi viga 'adi to'ive'atumai, 'aisedi toviga mogitana. ¹³^kWe'e 'omi 'wa na nagoi tamu Yaubada yana Vona yana Buki nageneye 'wa na 'iseni 'ana 'asetai 'wa na vena'ivinini. Vonanina side bani'odi,

^s 9:2 Luk 7:48-49 ^h 9:6 Ion 17:2, 5:8 ⁱ 9:9 Tomogonina buki de'e 'ana tokiluma.
^j 9:11 Luk 15:2, 19:7 ^k 9:13 Mad 12:7; 1 Tim 1:15

'Aisaya 'wa nikenikedi 'wa vevelomuyediga 'waikuye, kebu nuanuaku. Nuanuaku tomotoga 'wa na 'i'isanuakalikaliedi.”

Yau a maiga kebu taunidi i awave'atumaiediga faifaidi, a mai wata tosakona a na 'ita'ita'iedi.”

Velutoli ve'udigana 'ana 'asetai faifaina.

¹⁴ Mulieta Ioni Tobafitaiso yana tovetutuyamavo i maia Iesu 'waineye i velutolieni i vo, 'Ima wata totafalolo Falisi tutuya fueidi 'a veve'udigana 'ani bega yama velu'ui i na vetoketoke Yaubada 'waineye, we'e yamu tovetutuyamavo awale kebu i da ve'udiganaga?” ¹⁵ Iesu yadi vona i tutuli, taunina faifaina i vona-awatabai i vo, Tonagi yana sosoana 'waineye kebu tamu aitoi 'ana fata enavo i na talabodedi bega 'ani'ani i na baileni. We'e tamu 'aiata tomotoga 'ifwaidi i na maia tonaginina i na 'ive'avini i na naweni i lubwainedi enavonidi ma yadi nuavita i na ve'udigana.”

¹⁶ Wata Iesu i awatalatutula 'waidie yana ve sauluva 'ivauna faifaina wata me Diu yadi sauluva tuatuaina 'adi luwanawana faifaidi i vo, Kaleko tuatuaina i na 'anilabu'ui we'e 'ivaunega ta na bwadia kebu i da lubwaineniga. Fai bola ta na lekoai bwadi 'ivauna i na vesiai bega i na vefato'ai'ai tuatuaina i na 'ivesakoi.” ¹⁷ Wata bani'odi oine 'ana 'eba iwaga 'aisaya bunudiega faifaina Iesu i vona i vo, 'Ai'edi oine 'ivauna 'eba iwaga tuatuaina 'waineye i na iwagi i na yuveduai, i na iwaga 'ana ve'amubwadodo fai totolina wata 'eba iwaga 'akonadi i sako. We'e 'ai'edi oine 'ivauna wata 'eba iwaga 'ivauna nika bikabikana i na lubwaineni kebu i na yuveduai 'ailugana 'atumaidi.”

To'edakumeta natuna vevinena wata tamu vavine Iesu i 'abitonoviga ifufudi.

¹⁸ Tutuyanina Iesu i veve tomotoga 'waidie, nika tamu me Diu yadi to'edakumeta i le'wa. I mai ma yana ve'ililibu Iesu mataneye i 'odu i voneni i vo, Natuku vevinena 'asiauotoga yawaina i 'a'ava, nuanuaku ta na nago nimamu 'u na yatoi 'waineye i na yawasa.” ¹⁹ Iesu i nogai, bega i tovoi i nunagoga yana tovetutuyamavo wata mulineye i nagoi.

²⁰⁻²² I nunagoiga, tamu vavine wata mulidie i nago. Vavinenidi vevine 'adi viga i 'ewadi, malamala 12 nagedie kebu i da 'a'ailove viganina i 'eno'eno. Yadi nuanua 'waineye i vo, 'Ai'edi 'ana kaleko'ava 'a na 'abitonovimo 'a 'asetai 'a na ve'atumai.” Bega i vaganago Iesu muliotogineye 'ana kaleko mataifwana i 'abitonovi, nika i sivilai i 'isedi i vonedi i vo, Natuku, kebu 'wa na kolologa, yami vetumagana 'waikuye i 'ive'atumaimi.” Iesu yana voneye nika i ve'atumai.

¹ 9:14 Luk 18:11-12 ^m 9:15 Ion 3:29 ⁿ 9:16-17 1 Kol 10:21; 2 Kol 6:16
^o 9:20 Mad 14:36; 9:22 Mak 10:52; Luk 17:19

²³We'e Iesu i nago i luku to'edakumetanina yana vanuge. Tomotoga fueidi i 'isedi bonadi bwaikina i vevemogai we'e 'ifwaidi i 'umo'umo yadi sauluva bani'odi. ²⁴PBega Iesu i vonedi i vo, Matatabumi 'wa souyemi, de'e kwamana vevinena kebu i da wafaga, i 'eno'enomo." 'Aila'a i 'asetai kwamananina mogitana i wafa begaidi Iesu i sidibidibieni. ²⁵Siwe tutuyanina tomotoga i yavula Iesu i luku kwamananina yana tutudaba 'waineye, nimaneye i 'abi nika i tovoi. ²⁶Tovemogainidi i 'iseni, i nagoi kwamana yana yawasa-vaitugana i veifufuyeni yadi 'awalawanina nageneye bega tomotoga matatabudi i 'asetai.

Iesu tomatasako 'adi 'ailuga i 'ive'atumaidi.

²⁷Bei kwamana i 'ive'atumaiaga Iesu i 'iaweni i nunagoga tomatasako 'adi 'ailuga mulineye i nagoi i vevegolegole i vo, 'Omu Yaubada 'ana Venua'ivina, Kini Devida tubuna, 'u da 'isanuakalikaliea." ²⁸Iesu i mai i luku vanuge nika wata 'adi 'ailuga i mai i luku 'waineye bega Iesu i velutoliedi i vo, 'Wa vetumaganekuna a na 'ive'atumaimi 'alo kebu?" ²⁹⁻³⁰"Tomatasakonidi i vo, E'e 'Auvea," bega Iesu matadi i 'abitonovidina i vonedi i vo, Yami vetumagana 'wainega matami i na ve'atumai," nika i 'isadewa. Iesu i toke i vonedi i vo, Matami a 'ive'atumaidiga kebu tamu aitoi 'wa na voneniga." ³¹Siwe i tauya i nagoi i lu'ivo'ivona yadi 'awalawanina matatabuna nageneye.

Tomogo 'awana 'ebo'ebona Iesu i 'ive'atumaia.

³²Tomotoganidi matadi i sakoga i tauya i nunagoi, tomotoga 'ifwaidi tamu iadi i mieni, tomogonina basenadi yaiaina i agei 'awana i ve'ebo'ebo bega kebu 'ana fata i na welava. ³³Iesu i vona yaiaina i 'awa'a'ia nika tomogo i welava. Tomotoga i 'iseni, nuadi i voganidi i vo, Kebu tamu tutuya nani de'e bani'odi ta da 'iseniga yada 'awalawa de'e Isileli nageneye." ³⁴"We'e totafalolo Falisi i vo, Kebu, we'e yaiaina yadi to'edakumeta Seitani i agei yana toketokena i veleni bega i vonavona yaiaina i 'a'awa'a'idi."

Iesu tomotoga i 'isanuakalikaliedi.

³⁵Iesu i lauvivila i nago 'atamana bwaikidi wata siaidi 'waidie i veve 'eba miava'auta nagedie wata Vala 'Atumaina Yaubada nuanuana tomotoga i na veimeyedi yana 'Aila'a nageneye faifaina i lalau'age, we'e tomotoga fueidi, 'adi viga tulina tulina i 'ive'atumaidi. ³⁶"Aila'a i 'isedi nuana i vita faifaiddi fai 'adi vita fueidi, kebu i da 'asetadi bani'odi i na munega 'alo ava'aiega 'aivaita i na veluagai. Taunidi bani'odi 'aisaya sifi

P 9:24 Ion 11:11 q 9:27 Mad 1:1 r 9:29 Mad 8:13, 15:28 s 9:32-33 Mad 12:22
t 9:34 Mad 12:24; Mak 3:22 u 9:36 Mad 14:14; Mak 6:34

kebu 'adi to'isave'avinaga i veyogo-'avo'avovo. ³⁷ʻFai bani'odi i 'isediga yana tovetutuyamavo i vonedi i vo, 'Akonadi tomotoga fuei i lalauala nuanuadi yadi mia i na ve'atumai, bega i na vetumaganeku i na luku Yaubada yana 'Aila'a 'waineye, siwe 'omi tofolova kebu fuemiga bega yaku vona 'wa na lu'ivoneyeni. ³⁸Begaidi Yaubada taunina bani'odi tonibakula 'waineye 'wa na velu'ui bega tofolova fuei i na vetunedi i na 'ivaisemi 'wa da vo vuaganidi 'wa na mimaiedi Yaubada yana bubuwaka 'waineye.”

Iesu yana tomata'aulelevo 12 'adi wagava.

10 ¹ʻIesu yana tovetutuyamavo 12 i va'augidi, veimea i veledi bega 'adi fata i na vonamo yaiaina i na 'awa'a'idi wata tovigga 'adi viga tulidi tulidi i na 'ive'atumaidi. ²Tomata'aulelenidi 12 side 'adi wagava, nagami,

Saimoni, tamu 'ana wagava Fita,
Anidulu, Saimoni taina,
Iemesa ma taina Ioni, taunidi Sebedi natunavo,
³Filifi,
Batolomiu,
Tomasi,
Madiu, taunina takesi 'ana tolaugogona,
Iemesa, Alefasi natuna,
Tadiusa,

⁴Saimoni, toawa'idi'idi kebu nuanuana Loma gabemani i na veveimeyedi,
Iudasa Isakaliota, taunina Iesu 'ana to'etogiluva.

Iesu yana tomata'aulelevo yadi folova i veledi.

⁵Iesu yana tomata'aulelevo 12 i vetunedi yana vona i na lau'age-vuvuveni bega i velu'ase'asedi i vo, Mali tomotoga taunidi kebu Diu wata me Samelia 'waidie kebu 'wa na nagoiga. ⁶ʻNuanuaku 'wa na nagoi me Isileli 'aisedi 'waidie, taunidi vuyovuyodi 'wa da vo 'aisaya sifi. ⁷ʻWa na lau'age 'waidie 'wa na vo, Yaubada yana veimea fwayefwayeye 'ana tutuya sai'afoga i na souyeni.” ⁸Toviga 'wa na 'ive'atumaidi, towafa 'wa na sivetovoidi, waiwaiselidi 'wa na 'ive'atumaidi, wata egavo yaiaina i agediga, 'wa na vona i na 'awa'a'idi. Veimea ma yana toketokena a velemini kebu ma 'ana tutulaga, 'wainega 'wa na 'aivaita kebu tutula 'alo fu'e faifaidi 'wa na nuanua.” ⁹⁻¹⁰ʻWata a na vonemi, 'Wa na nunagoiga side naninidi kebu 'wa na 'ewadi 'wa na nawedi, mani lubulubu 'alo kileu,

ʻ 9:37 Luk 10:2; Ion 4:35 w 10:1 Mak 6:7; Luk 9:1 x 10:6 Iel 50:6; Mad 15:24
y 10:10 1 Kol 9:14; 1 Tim 5:18

venuana, 'ageyafayafa 'alo talauma 'adi veluga, 'alo wautogana. Naninidi faifaidi kebu 'wa na nuanua, fai tofolova i lubwainedi ma 'adi 'aivaita.

¹¹ 'Ai'edi 'wa na le'wai 'atamana bwaikidi 'alo siaidi 'waidie, 'wa na lauala tamu tomogo yana nuanua 'atumaidei 'waineye 'wa na nagoi, bei yana vanuge 'wa na miamia mulieta 'wa na tauya, kebu 'wa na miayabavuvua mali vanuga 'waidie. ¹² Tutuyanina vanuganina 'waineye 'wa na lukuga 'wa na vekaiwa tonivanuga 'waineye wata 'wa na vo, Yaubada i na nuakalikaliemi.” ¹³ 'Ai'edi vanuganina 'ana tomotoga ma yadi sosoana i na lu'uma'umaiemi Yaubada i na vesauluva-'atumaidei, we'e 'ai'edi kebu nuanuadi 'wa na lukuga 'waidie 'omi Yaubada i na vesauluva-'atumaidei we'e tomotoganidi kebu. ¹⁴ ^z 'Ai'edi ava'ai vanugaga 'alo 'atamanaga 'adi tomotoga i na vedumwe'ubu'ubusemi wata yami vona kebu i na nogaidiga, 'wa na 'iawedi 'wa na nagoi wata 'agemiega fwayafwaya 'wa na lubutubutuya, yadi 'eba 'isa bei wata kebu 'wa na lalau'age, wata bola vematavuloga i na veluagai Yaubada 'wainega. ¹⁵ ^a A vona mogitana 'waimie, 'awaie Vonayavuga 'ana 'Aiata 'waineye tosakona basenadiotoga i miamiani 'atamana Sodoma wata Gomola 'adi vematavuloga i na veluagai Yaubada 'wainega siwe sai'afo i na 'isanuakalikaliemi, we'e tomotoganidi i na vedumwe'ai'aiemiga vematavuloga bwaikaotogina i na veluagai 'aiatanina 'waineye.”

Tosakona Iesu yana tofolovavo vita i na veledi.

¹⁶ ^b A na vonemi, 'ou'ou walawala'ai 'aisaya sifi i ovaovadi, wata bani'odi a vevetunemi tomotoga kasikasisidi 'waidie vita i na velevelemi. Begaidi i lubwainemi ma yami 'aseta taunimi 'wa na 'isave'avinimi we'e yami sauluva i na bika bunebune bani'odi. ¹⁷⁻¹⁸ ^c Wa na 'isa'isa, fai 'omi yaku tomotoga bega 'ifwaidi tomotoga i na 'ive'avinimi i na nawemi 'eba vonayavuga 'waineye, wata yadi 'eba miava'auta 'waidie i na toke i na fitalimi. Toveimea bwaikidi wata kini matadie 'wa na vonayavuga, bei 'ami fata Vala 'Atumaina faifaiku 'wa na lu'ivoneyeni 'waidie wata mali tomotoga 'waidie taunidi kebu me Diu. ¹⁹⁻²⁰ ^d Tutuyanina i na 'ive'avinimiga kebu nuafoumi i na veviga 'wa na vo, Ava'ai a na voneyeni, 'alo bani'odi a na voneyedi,” fai tutuyanina 'waineye Yaubada i na awave'ede'edemi. Bega vonanidi 'waidiega 'wa na vonavona kebu taunimi yami vona, Tamami 'Anu'anununa 'waimiega i na vonavona.

²¹ Tomotoga fuedi yaku tomotoga i na vedumwe'ai'aiemi, 'ifwaidi tomotoga taidiavo 'alo tatadiavo i na 'anivelenedi 'aku tovedumwe'ai'ai 'waidie i na luvewafadi, we'e iaveta tulaidi 'ifwaidi natudiavo iavetadi i na 'anivelenedi i na wafa, wata yavayavava tamadiavo inadiavo taiadi

^z 10:14 Fol 13:51, 18:6 ^a 10:15 Nag 19:24-28; Iud 1:7 ^b 10:16 Ion 10:12; Fol 20:29
^c 10:18 Fol 25:23 ^d 10:20 Ion 14:26

i na vegaviedi bega i na wafa. ²² ^eFai 'wa vetumagana 'waikuye begaidi tomotoga fuei i na vedumwe'ai'aiemi, siwe egavo i na tokemaigedi i na nagoga tutuya 'eba ve'a'ava 'waineye 'ita'ita'i i na veluagai. ²³ 'Ai'edi tamu 'atamana 'waineye vita i na vevelemiga 'wa na dega 'wa na nagoi tamu 'atamana 'waineye. Siwe a vona mogitana 'waimie, yami folovanina bola kebu 'wa na sigoiaga, bola 'wa na lalauvivila me Isileli yadi 'atamana 'waidie, yau a vetomotogaotoga a na mai.

²⁴ ^fKwamana yana 'asetu kebu yana tove yana 'asetu i da vebwaika-'iaweni, wata tofola 'ana toveimea kebu i da vebwaika-'iaweni. ²⁵ ^gBegaidi 'ai'edi tove 'alo toveimea vita i na veluagadi, mogitana wata yadi kwakwamavo vitanidi i na veluagadi. 'Aila'anina 'waineye ta miamiani yau 'ana to'edakumeta siwe 'aku tovedumwe'ai'ai i awavesakoyeku i vo, 'Omu Seitani, yaiaina 'adi to'edakumeta." Yau i awavesakoyeku we'e 'omi yaku 'aila'a i na awavesako-otogemi.

Kebu tomotoga 'wa na kololoyediga.

²⁶ ^hVita i na velemi, siwe kebu 'wa na kololoyediga. Ava'ai tomotoga i na giveniga, matatabuna Yaubada i na sivemagesedi. Ava'ai i na nuagivediga Yaubada i na lu'ivoneyedi. ²⁷ ⁱAise'avami 'waimie a veveifufuga 'wa da vo dudubale, we'e 'omi 'wa na sivemagesedi 'aila'a 'waidie. Ava'ai ve'awayaya 'wainega 'wa nogaiga, 'atamanafouye 'wa na vetuleleyeni. ²⁸ ^jEgavo nuanuadi i na luvewafamiga kebu 'wa na kololoyedi, tomogo'avami i na luvewafadi, we'e 'anu'anunumi kebu. We'e mogitana ma yami ve'ililibu Yaubada 'wa na kololoyeni, 'ana fata tomogomi wata 'anu'anunumi taiadi i na luvewafadi 'ai-'ala'alase. ²⁹ 'Ai'edi manudanidani 'ailuga ta na kimwanedi 'adi tutula siaina, bani'odi toea 'aitamogana. We'e Yaubada mataneye manudanidani 'aitamogana 'aitamogana kebu nuana i da fani, kebu 'ana fata tamu i na wafa nagami Tamami i na tauyeni. ³⁰ We'e 'omi mataneye nani bwaikina i 'asetu'a'avami bani'odi nava'au matatabuna 'adi 'aila'a i 'asetadi. ³¹ ^kBegaidi kebu 'wa na kolologa, 'omi kebu nani-'avo'avovo manudanidani bani'odi, 'omi nani bwaikina Yaubada mataneye i na 'i'isave'avinimi.

³² 'Ai'edi aitoi i na lu'ivona tomotoga matadie faifaiku i na vo, Yau a tauyeku Iesu 'waineye taunina 'aku Toveimea," wata 'awaie abame bani'odi Tamaku mataneye a na vo, No'o tomotoganina yaku tomotoga." ³³ ^lWe'e 'ai'edi aitoi i na ve'eweku tomotoga matadie i na vo, Yau kebu Iesu 'aku Toveimeaga," wata 'awaie abame Tamaku mataneye a na ve'eweni a na vo, No'o tomotoganina kebu yaku 'aila'aga."

^e 10:22 Mad 24:9,13; Ion 15:18-21 ^f 10:24 Ion 13:16 ^g 10:25 Mad 12:24

^h 10:26 Mak 4:22 ⁱ 10:28 Iem 4:12 ^j 10:31 Mad 6:26 ^k 10:33 Mak 8:38; 2 Tim 2:12

Yada nuanua 'waidie, aitoi i kumeta?

³⁴Wata Iesu i vonedi i vo, Kebu 'wa na vo, Iesu i mai bega tomia fwayafwaya matatabuda ta na veiana.” Kebu, yau a maiga 'wainega tomotoga tauni'avadi i na ve'alamagi'ai ve'idi'idi i na souyeni. ³⁵⁻³⁶Ifwaidi yaku vona i na vetumaganeni, 'ifwaidi kebu, bani'odi tulaidi wata natudiavo iavetadi taiadi i na ve'ikwayekwayega faifaiku, vevine tulaidi wata natudiavo vevinedi taiadi. We'e vevine wata lawadiavo vevinedi taiadi i na ve'ikwayekwayega faifaiku, wata tomotoga 'adi gaviavo mogitana tauniotogidi yadi 'aila'a 'waidiega.

³⁷'Ai'edi aitoi tamana 'alo inana 'adi nuanua 'waineye i na kumeta, we'e yau 'aku nuanua i na vesiai kebu 'ana fata i na vetutuyamekuga. Wata 'ai'edi aitoi natuna iavetana 'alo vevinena 'adi nuanua 'waineye i na kumeta, we'e yau 'aku nuanua i na vesiai, kebu 'ana fata i na vetutuyamekuga. ³⁸'Ai'edi aitoi nuanuana mogitana i na mai 'waikuye, nagami taunina yana nuanua i na bailedi. Fai i na vematayakeyakeku veviga bwaikina i na veluagai yau bani'odi a na veluagai. Voke i na wafa faifaiku yau bani'odi a na wafa 'ai lagalagana 'waineye. 'Ai'edi aitoi kebu bani'odi i na vesaulvediga, taunina kebu 'aku tovetutuyama. ³⁹'Ai'edi aitoi yana mia 'ana 'atumaina i na ve'o'oleni, kebu nuanuana yawaina i na tauyeni faifaiku, taunina i na wafaotoga. We'e 'ai'edi aitoi yana mia 'ana 'atumaina wata yawaina i na tauyedi faifaiku mia 'atumaina wata miamia-vagaina i na veluagai.”

Iesu yana ve tutula 'atumaina faifaina.

^{40^m}Wata Iesu i vonedi i vo, 'Omi yaku tovetutuyamavo 'ai'edi aitoi ma yana nuakalikali i na 'ivaisemi siwe 'asa'aiana yau i 'ivaiseku, we'e 'ai'edi ma yana nuakalikali yau i na 'ivaiseku, siwe 'asa'aiana Yaubada, taunina 'aku tovetune i 'ivaiseni. ⁴¹'Ai'edi aitoi Yaubada yana Vona 'ana tolu'ivona ma yana nuakalikali i na 'ivaiseni fai taunina Yaubada yana tofolova, 'awaie ma fuedie 'adi tutula i na vesala. Wata 'ai'edi aitoi tamu tomotoga i na 'ivaiseni fai yana sauluva 'atumaina, 'awaie ma fuedie 'adi tutula i na vesala. ^{42ⁿ}A vona mogitana 'waimie yaku tofolovavo 'adi to'aivaita matatabudi 'adi tutula i na veluagai. 'Ai'edi tamu tomogo yaku tofolova siaina i na 'ivaiseni, avinodi yana 'aivaita siaina bani'odi ufa i na veleni i na yemu, siwe wata tutula i na veluagai yana 'aivaitanina faifaina.” Side bani'odi Iesu i ve yana tovetutuyamavo 'waidie.

Ioni tomotoga 'ifwaidi i vetunedi Iesu 'waineye.

11 ¹Tutuyanina Iesu yana ve i 'a'ava yana tovetutuyamavo 12 'waidie, 'atamananina i 'iaweni i nago 'atamana 'ifwaidi 'waidie 'awalawa Galili nageneye, bei i na ve wata i na lau'age.

¹ 10:38-39 Mad 16:24-25; Mak 8:34-35; Ion 12:25 ^m 10:40 Mak 9:37; Gal 4:14

ⁿ 10:42 Mad 25:40

²Tutuyanina 'waineye Ioni Tobafitaiso i miamia vanuga 'eba yogona 'waineye. 'Wainega Iesu yana folova valana i nogai begaidi 'ifwaidi yana tovetutuyamavo i vetunedi i na velutolieni. ³°Bega i maia Iesu 'waineye i vo, Ioni Tobafitaiso nuanuana i na 'asetai 'omu kumanimu faifaimu me Diu ta lulukamata ta vo, 'Awaie 'ada To'ita'ita'i i na mai Yaubada 'wainega," 'alo tulina faifaina ta na lukamata." ⁴Iesu yadi velutoli i tutuli i vo, 'Wa na vilami 'wa na nagoi Ioni 'waineye, ava'ai a veveifufuyedi 'wa nogaidiga wata a 'l'idewadi 'wa 'isediga faifaidi 'wa na voneni. ⁵°Side bani'odi 'wa na voneyedi 'wa na vo, Tomatasako i 'isadewa, tubusakosako i tubuoga, waiwaisesela i ve'atumai. Tanigadi 'uludi 'adi fata i na nogaya, towafa wafayega a sivetovoidi, wata Vala 'Atumaina 'ita'ita'i Yaubada 'wainega faifaina a lalau'age wekowekoma 'waidie." ⁶Wata 'wa na voneni 'wa na vo, 'Ai'edi aitoi kebu i da venuanaluga, i vetumaganamo 'waikuye, 'eba sosoana 'waineye."

Iesu Ioni i awa'ai'aia.

⁷Ioni yana tovetutuyamavo i tauya i nunagoi, Iesu 'aila'a 'waidie i veifufu Ioni faifaina i vo, Basenadi 'wa nagoi sali'avu'avuye Ioni 'waineye, ava'ai nuanuami 'wa da 'iseni? Tamu tomogo umaumana yana sauluva bikana bani'odi 'ayalele kaukau siaina i nunuga i 'anino'uya? Kebu. ⁸'Alo ava'ai 'wa da 'iseni? Tamu tomogo i vaigavu kaleko 'atumaidiega? Wata kebu. Tomotoganidi i vaigavuga bani'odi, yadi vanuga 'ai'aiwabudi 'waidie i miamiani. ⁹Nuanuaku a na 'asetai 'wa nagoga ava'ai 'wa da 'iseni? Tamu Yaubada yana tolu'ivona? E'e. Mogitana tolu'ivona. Siwe 'ifwaidi tolu'ivona sai'afu va'egai, we'e tomogonina 'wa 'iseniga bwaikaotogina. ¹⁰°Vona mogitana tomogo bwaikina fai basenadiotoga faifaina i kilumi Yaubada yana Buki nageneye. Yaubada i vona 'ana Venua'ivina 'waineye i vo, Taunina yaku tomata'aulele, a na vetunei i na kumeta yamu 'eda i na vusia."

¹¹A vona mogitana 'waimie tomia fwayafwaya matatabudi sai'afu va'egai, we'e Ioninina bwaikaotogina. Siwe tomotoganidi bwaikidi wata siaidi 'akonadi i lukuga Yaubada yana 'Eba Veimea nageneye i vagalaka, Ioni ma'itufa i obu fai bola kebu i da lukuga. ¹²⁻¹³Basenadiotoga Yaubada veimea i yatodi bega tomotoga i na vematayakeyakedi, bani'odi ve'etoboda Mosese 'wainega wata tolu'ivonavo 'adi kilukiluma. Veimeanidi i 'eno'eno nika Ioni Tobafitaiso i souyeni. Tutuyanina i velamu i maiga 'asiau, tomotoga fuedi ma yadi toketokena i ve'edaeloelo wata i vetunufelagi nuanuadi bwaikina i na luku Yaubada yana 'eba veimea nageneye. ¹⁴°Wata basenadiotoga Yaubada yana tolu'ivonavo

° 11:3 Mal 3:1 P 11:5 Mad 8:2-4, 9:1-8,23-36 ¶ 11:10 Mal 1:3; Mak 1:2; Ion 3:28
r 11:14 Mad 17:10-13

nagami i vona-vagata tamu tolu'ivona i na maiga faifaina. Tolu'ivonanina bwaikina, yana sauluva bani'odi Ilaitia kumanina basenadiotoga ma yawaina i nagomo abame. 'Ai'edi nuanuami yaku vona 'wa na vetumaganeni tolu'ivonanina bani'odi Ilaitia, 'asa'aiana Ioni. ¹⁵'Akonadi yaku vona 'wa nogai, siwe 'wa na venua'ivineni nika 'wa na 'asetai."

¹⁶⁻¹⁷Wata Iesu i vona 'aila'a 'waidie i vo, Tutuya de'e 'ana tomotoga ava'ai 'wainega a na awatalatutulemi? Yami sauluva ava'ai bani'odi? Tomotoganimi bani'odi yavayavava to'wava, nuanuadi i na vetutuyama 'atamanafouye. Tamu 'aila'a i vegole ediavo 'waidie i vo, Nuanuama tamu nani ta da 'idewai siwe 'wa baila. 'A lauinava siwe kebu 'wa da suya, 'a tailauwawa siwe kebu 'wa da vemogai. Kebu nuanuami yama nuania 'wa na fali'atumaiedi." ¹⁸'Omi yavayavavanidi bani'odi, kebu nuanuami Ioni Tobafitaiso wata yau yama nuania 'wa na fali'atumaiedi. Ioni i mai i veve'udigana 'ani bega yana velu'ui Yaubada 'waineye i na vetoketoke, wata kebu oine i da yemuga 'wa vona 'wa vo, Tomogo no'o, yaiaina i agei." ¹⁹'We'e yau a vetomotogaotoga a mai kebu a da ve'udiganaga, a 'ani'ani wata a yemuyemu siwe 'wa vo, 'Wa 'iseni, tomogo no'o. 'Awana bwalabwalaina, yana 'ani wata oine yana yemu 'afoina, takesi 'ana tolaugogona vivinagodi wata tovedumwe'ai'ai i veianedi." Egavo Yaubada yana nuania 'ase'asetadi i vevematayakeyakedi, i nuani Yaubada ma yana 'asetamogitana."

'Atamana 'ifwaidi bola vita i na veluagadi.

²⁰Basenadi 'atamana 'ifwaidi 'waidie Iesu 'eba nuavogana wata 'eba nua'ewa sai'afo matatabuna i 'idewadi, siwe tomotoganidi kebu i da nuaviladi yadi sakona 'waidiega. Begaidi Iesu 'atamananidi 'adi tomia i awavesakoyedi. ²¹I vo, Ieu, 'omi me Kolesini nuakalikalimi wata me Bedasaida nuakalikalimi, 'waimie vita bwaikidi i na souyedi. We'e basenadiotoga me Taia wata me Saidoni yadi sakona bwaikidi faifaidi Yaubada i leodi. 'Ai'edi 'eba nuavogananidi wata 'eba nua'ewanidi a 'idewadiga matamie a da 'idewadi matadie 'ako i da vemwakula wata kaleko sakoidi i ve'wesena, 'adi 'eba 'isa ma yadi nuavita i nuaviladi. ²²'A na vonemi, 'awaie Vonayavuga 'ana 'Aiata 'waineye me Taia wata me Saidoni 'adi vematavuloga i na veluagai Yaubada 'wainega, siwe sai'afo i na 'isanuakalikaliedi, we'e 'omi yaku vona 'wa baila kebu 'wa da nuavilamiga vita bwaikaotogina 'wa na veluagai. ²³'We'e 'omi me Kafaneomi taunimi 'wa awa'ai'aimi igodi 'wa vo, 'Ima 'atumaimea, abame 'a na luku," siwe mogitana Yaubada i na veimea 'wa na obu Vatu'ai Manamanawena 'waineye. Basenadiotoga Yaubada me Sodoma i leodi yadi sakona faifaidi, siwe 'ai'edi yaku folovanidi toketokedi a

§ 11:18 Mad 3:4 † 11:19 Luk 15:1-2 ¤ 11:22 Emo 1:9-10 ▼ 11:23 Nag 19:24-28; Iud 1:7

'idewadiga matamie a da 'idewadi matadie, i da nuaviladi 'atamananidi bola i da miamia. ²⁴W'A na vonemi, 'awaie Vonayavuga 'ana 'Aiata 'waineye Yaubada me Sodoma sai'afo i na 'isanuakalikaliadi wata 'adi vematavuloga i na velediga sai'afo, we'e 'omi kebu'a'ava."

Mia 'atumaina Iesu i na veleda.

²⁵xTutuyanina 'waineye Iesu i vona Yaubada 'waineye i vo, 'Omu abama wata fwayafwaya 'adi Toveimea, a vekaiwa 'waimuye fai yaku ve 'adi 'aseta 'u givedi taunidi 'ase'asetadi wata i awa'ai'aidiga 'waidiega bega i bavuyedi, we'e egavo i nunuaobuga yavayavava bani'odi, yaku ve 'ana 'aseta 'u kiavemagetadi 'waidie. ²⁶Tamaku, vona mogitana ava'ai yamu nuanua i lubwaineniga 'akonadi 'u 'idewai 'amu kiavesosoana."

²⁷yIesu i velu'ui i 'a'avana tomotoga i vonedi i vo, Nani matatabuna Tamaku i 'anivelenedi 'waikuye a veveimeyedi. Kebu tamu aitoi yau Yaubada Natuna i da 'asetaku, Tamaku 'aiseotogina 'aku to'aseta. Wata kebu tamu aitoi Tamaku i da 'asetai, yau Natuna 'aiseotogiku 'ana to'aseta wata 'ai'edi egavo nuanuaku, 'waidie Tamaku a na sivemageseni.

²⁸'Omi matatabumi 'wa 'abiawaga wata 'ami vita faifaidi 'wa vevenuafouviga 'wa na maia 'waikuye a na 'ivesafailidi bega yami mia i na ve'atumai. ²⁹Yaku ve bani'odi 'aifafula. Bega yaku 'aifafulanina 'wa na 'ewai taiadi venuana ta na 'ifafuli. Yau tonuaobu yaku sauluva bikadi bega 'waikuyega 'aseta 'wa na 'ewai wata 'ami vita a na ve'ewalovemi. ³⁰zYaku ve wata folova a na velemiga bani'odi ta 'aifafula kebu vitanaga.

Iesu i ve 'Aiata Veawai faifaina.

12 ¹aMulieta tamu 'Aiata Veawai 'waineye, Iesu ma yana tovetutuyamavo i nunagoi bakula 'waineamo, yana tovetutuyamavo i lase bega vuaga i kadidi i 'ani, fai 'akonadi tonibakula i tauyedi. ²We'e 'ifwaidi Diu totafalolo Falisi i 'isedi Iesu i voneni i vo, Awale? Me Diu yada ve'etoboda yamu tovetutuyamavo i geugeuya vuaga i kadikadi bani'odi folova yada 'Aiata Veawai 'waineye." ³bIesu Falisi yadi vona i tutuli i vo, 'Wa da vo kebu bani'odi Yaubada yana Buki 'wa da lu'iawawaiga, basenadiotoga Kini Devida ma enavo i lase faifaina. ⁴I luku Yaubada yana vanuga 'eba velu'ui nageneye, beledi tamu Yaubada 'ana 'anivelenena tovelomu i veledi ma enavo i 'ani. De'e wata yada ve'etoboda kebu tamu aitoi 'ana fata beledinina i na 'ania tovelomu 'aisedi faifaidi, i 'ania siwe kebu i da sakona fai i lase. ⁵cWata 'wa na nuani veimea i mai Mosese 'wainega, tovelomu i tauyedi i folofolova 'Aiata Veawai 'waineye vanuga 'eba velu'ui nageneye. Mogitana 'Aiata Veawai i geugeuya siwe

w 11:24 Mad 10:15 x 11:25 1 Kol 1:26-29 y 11:27 Mad 28:18; Ion 1:18, 3:35

z 11:30 1 Ion 5:3 a 12:1 VeL 23:25 b 12:3 1 Sam 21:1-6 c 12:5 Num 28:9-10

kebu sakonaga. ⁶A na vonemi, yada vanuga 'eba velu'ui nani bwaikina, siwe matamie tamu tomogo i tovtovoi bwaikaotogina. ⁷^dBasenadiotoga i kilumi Yaubada yana Buki 'waineye i vo,

'Aisaya 'wa nikenikedi 'waikuye 'wa vevelomuyedi, siwe kebu nuanuaku.

Nuanuaku tomotoga 'wa na 'isanuakalikaliedi.”

Vona de'e 'ai'edi 'wa da 'asetai, 'ako kebu yaku tovtutuyamavo 'wa da vonediga igodina i da sakona, i lubwaineni 'wa da 'isanuakalikaliedi.

⁸Yau a vetomotogaotoga 'Aiata Veawai 'ana Toveimea, 'aku fata 'aiatanina 'waineye tomotoga yadi sauluva faifaidi a na veimeyedi.”

Iesu i 'ive'atumai 'Aiata Veawai 'waineye.

⁹Iesu i vona'a'ava i tauya i nago me Diu yadi 'eba miava'auta 'waineye.

¹⁰'Eba miava'autanina nageneye tamu tomogo nimana 'okana i miamia.

We'e 'ifwaidi tomotoga i maia, igodi nuanuadi Iesu i na lumatani tamu sauluva sakoina faifaina bega i velutolieni i vo, Yada ve'etoboda bani'odi i voneyedi? 'Ai'edi ta na 'ive'atumai yada 'Aiata Veawai 'waineye,

i lubwaineni 'alo kebu?” ¹¹Iesu yadi vona i tutuli i vo, 'Ai'edi aitoi

'waimiega yana 'aisaya i na be'u kulie 'Aiata Veawai 'waineye, 'u na

'ivaiseni 'u na silakai 'alo kebu? Fai, a nuani mogitana bani'odi. ¹²Siwe

'aisaya sai'afo nani-'avo'avovo we'e tomotoga nani bwaikina. Bega yada ve'etoboda siwe tautauyina ta na 'aivaita 'Aiata Veawai 'waineye.”

¹³Mulieta Iesu tomogo i voneni i vo, Nimamu 'u si'otoi.” Tomogonina

nimana i sisi'otoiga nika i ve'atumai, nimana vi'ainega bani'odi. ¹⁴Falisi

i 'iseni i tauya i nagoi, 'eda'eda i lauala bani'odi i na munega Iesu i na luwewafai.

Yaubada yana Tofolova venua'ivinina.

¹⁵⁻¹⁶Tutuyanina Iesu i 'asetai Falisi nuanuadi i na luwewafai bega

'atamananina 'waineye i miamiaga i 'iaweni i tauya i nago mali

'awalawe ye siwe tomotoga fue di i veyogo'waila, mulineye i nagoi.

Toviga matatabudi i 'ive'atuma idi siwe wata i talabodebodedi kebu i na

lulu'ivoneyeniga Iesu aitoi. ¹⁷I talabodediga nika Yaubada yana tolu'ivona

'ana wagava Aisea yana vona 'ana mogitana i souyeni. Basenadiotoga

Yaubada yana Vona 'ana Venua'ivina faifaina i kilumi i vo,

¹⁸eDe'e yaku Tofolova, kumanina a venua'ivineni.

Taunina a nuakalikalieni, faifaina a sosoana.

'Anu'anunuku a na tauyeni i na agei,

Bega yaku veimea tonovidi i na lu'ivona tomotoga 'aila'a tulina tulina 'waidie.

^d 12:7 Ose 6:6; Mad 9:13 ^e 12:18-21 Ais 42:1-4; 12:18 Mad 3:17

^{19f}Kebu i na ve'ikwayekwayega wata kebu i na ve'ita'ata'ala.

Wata 'atamanafouye kebu bonana bwaikina i na noganogai.

²⁰Egavo mweadi 'wa da vo 'ayalele 'anino'una kebu i na kiadabadi i na 'ivaisedimo.

Egavo yadi vetumagana mweadi 'wa da vo mageta i da taulovolovogi kebu i na luve'weudi i na 'ivaisedimo.

Yana folova 'waineye i na tokemaiga i na nagoga nika Yaubada yana nuanua tonovidi i na vebwaika tomotoga 'waidie.

²¹Bega tomotoga 'aila'a tulina tulina yadi vetumagana i na yato-vagasedi 'aku Venua'ivina 'waineye i na lulukamaseni.”

Falisi Iesu i awavesakoyeni.

²²Mulieta tamu tomogo, basenadi yaiaina i agei bega matana i sako wata kebu 'ana fata i na welava, enavo i mieni Iesu 'waineye. Iesu tomogonina i 'ive'atumaia nika i welava wata i 'isa. ^{23g}Tomotoga fuedi i 'iseni nuadi i voganidi i vo, Voke 'asa'aiana kumanina Yaubada 'ana Venua'ivina, Kini Devida tubuna.”

^{24h}We'e tutuyanina me Diu totafalolo Falisi i nogai, i vona i vo, Seitani, ⁱ taunina yaiaina yadi to'edakumeta Iesu i agei yana toketokena 'wainega i vonavona yaiaina i 'a'awa'a'idi.” ²⁵Iesu 'akonadi i 'asetai Falisi yadi nuanua begaidi i vonedi i vo, 'Ai'edi 'eba veimea 'aise'avadi i na 'idia i na vetalaga 'eba veimeanina i na velovi. Wata 'ai'edi 'atamana 'alo vanuga 'ana tomia 'aise'avadi i na vetalaga, i na yavulaiwagi. ²⁶⁻²⁷'Wa vonaga yau Seitani yana toketokena 'wainega a vona tamu yana tomotoga i 'awa'a'ia. 'Ai'edi mogitana a da folofolova Seitani yana toketokena 'wainega, 'wa da 'asetai Seitani yana 'aila'a 'aise'avadi i 'idia i vevetalaga bola i na 'a'ava. We'e 'ifwaidi yami tomotoga i vonavona yaiaina i 'a'awa'a'idi, nika 'wa velutoliedi ava'aiega yadi toketokena i veluagadi. Bola i na vo, Kebu Seitani 'wainega,” nika 'wa na 'asetai 'omi 'wa vekali. ^{28j}We'e mogitana Yaubada 'Anu'anununa yana toketokena 'wainega yaiaina a vonevoned i 'a'awa'a'idi, 'wa 'iseniga 'wa da 'asetai 'akonadi Yaubada yana veimea i mai 'waimie.”

^{29k}Wata Iesu i vona-awatabai 'waidie i vo, Kebu tamu aitoi 'ana fata i na luku tamu tomogo toketokena yana vanuge i na vainago. We'e 'ai'edi nuanuana vainago nagami tomogonina i na 'iyogoyogoni, mulieta i na vainago.

³⁰'Ai'edi aitoi kebu taiadi 'a na folofolovaga, taunina 'aku gavia, we'e 'ai'edi aitoi kebu i na 'ivaiseku bega tomotoga i na vagavaidi i na mimaiedi 'waikuye, 'wa da vo tomotoga i da sogisogiedi, taunina yaku

^f 12:19 2 Tim 2:24 ^g 12:23 Ion 7:31 ^h 12:24 Mad 9:34 ⁱ 12:24 'Ana mogitana
Bielisibabi, Seitani tamu 'ana wagava. ^j 12:28 Fol 10:38 ^k 12:29 1 Ion 3:8

folova 'ana to'ivesako. ³¹ 'Begaiddi a na vonemi, tomotoga i sakosakonaga wata i vona-awadamana Yaubada 'waineye 'adi fata nuatavuna i na veluagai. We'e egavo i na vona-awadamana 'Anu'anunu 'Atumaina 'waineye, kebu tamu sai'afo Yaubada i na nuatavunidi. ³² 'Ai'edi aitoi yau a vetomotogaotoga i na awavesakoyekuga, 'ana fata nuatavuna i na veluagai, we'e 'ai'edi aitoi 'Anu'anunu 'Atumaina i na awavesakoyeniga kebu tamu sai'afo Yaubada i na nuatavuniga, i na 'eno-vagata.

³³ Wata bani'odi 'ai'edi welavi 'atumaina tutuya fueidi vuagina 'atumaina, we'e welavi sakoina tutuya fueidi vuagina sakoina. Welavi 'aitamogana 'aitamogana vuagidiega ta na 'asetadi ava'ai welaviga, wata bani'odi tomotoga yadi sauluva ta na 'isedi ta na 'asetadi tomotoga 'atumaiddi 'alo sakoidi. ³⁴ 'Omi 'o'olo sakoimi, kebu 'ami fata nani 'atumaiddi 'wa na 'inanadi. Vonanidi sakoidi 'wa 'inanadiga fai nuamie i 'eno'enovi. ³⁵ Tomogonina nuanua 'atumaiddi 'waineye i 'eno'enoviga, taunina tomogo 'atumaina, we'e tomogonina nuanua sakoidi 'waineye i 'eno'enoviga taunina tomogo sakoina."

³⁶ Wata a na vonemi, 'Aiatanina 'waineye tomotoga matatabumi 'wa na vonayavuga Yaubada mataneye, yami vona-'avo'avovo 'aitamogana 'aitamogana 'wa na lu'ivoneyedi. ³⁷ 'Ai'edi yami vona tonovidi i na awave'atumaiddi, 'ai'edi yami vona vekali Yaubada i na veimea vematavuloga 'wa na veluagai.

Iesu yana veimea ma 'ana 'eba 'isa.

³⁸ 'Mulieta 'ifwaidi ve'etoboda 'adi tove wata totafalolo Falisi Iesu i voneni i vo, Tove, nuanuama tamu 'eba nuavogana wata 'eba nua'ewa 'u na 'idewai, 'a na 'iseni 'a na 'asetamu 'omu ma yamu veimea Yaubada 'wainega 'alo kebu." ³⁹ Iesu i vonedi i vo, 'Omi tutuya de'e 'ana tomotoga yami sauluva sakoidi wata kebu nuanuami Yaubada yana nuanua. 'Wa vonavona nuanuami 'eba nuavogana wata 'eba nua'ewa a na 'idewai siwe a nuani kebu tamu a na 'idewaiga. ⁴⁰ 'Siwe tamu nani a na veifufuyeni yami 'eba 'isa. Basenadiotoga Yaubada yana tolu'ivona 'ana wagava Iona igodi i da dega Yaubada 'wainega nika tamu igana bwaikina i tononi bega kamoneye i miamia 'aiata wata lovana 'aitonu. Wata bani'odi yau a vetomotogaotoga 'awaie a na miamia fwayafwaya nageneye mulieta 'aiata 'ana vetonu 'waineye a na tovoi, 'asa'aiana kumanina yami 'eba 'isa. Tutuyanina igana Iona i 'alaiwageni i nago me Ninive 'waidie i lau'age, nika i nuaviladi yadi sakona 'waidiega. ⁴¹ 'We'e Vonayavuga 'ana 'Aiata 'waineye me Ninivenidi taiadi 'wa na tovoi Yaubada mataneye i na matawa'ulimi i na vo, Basenadi Iona i lau'age 'waimeye 'a nuavilama

¹ 12:31 Ibu 6:4-6 ^m 12:34 Mad 15:18 ⁿ 12:38 Ion 6:30; 1 Kol 1:22 ^o 12:40 Ioa 1:17
^p 12:41 Ioa 3:5

we'e 'omi kebu nuanuami.” Wata Iesu i vo, A na vonemi, Iona tomogo bwaikina we'e tomogonina matamie i tovoivoi bwaikaotogina. ⁴²“Wata bani'odi basenadiotoga me Siba yadi toveimea bwaikina Kwini' Siba 'ani'ieyega i mai Kini Solomoni yana 'aseta 'ana 'isa faifaina. Bega Vonayavuga 'ana 'Aiata 'waineye kwininina taiadi 'wa na tovoi Yaubada mataneye i na matawa'ulimi i na vo, Basenadi 'ani'ieyega a mai 'aseta 'ana 'isa faifaina wata a 'ewai, we'e 'omi kebu nuanuami 'wa na 'asetai bega 'wa na nuavilami.” Wata Iesu i vo, A na vonemi Kini Solomoni tomogo bwaikina we'e tomogonina matamie i tovoivoi bwaikaotogina siwe 'wa baila, kebu nuanuami 'wa na 'asetai.”

Yaiaina yana 'eba mia 'ana lauvai faifaina.

⁴³⁻⁴⁴Wata Iesu i vonedi vona-awatabaiega i vo. 'Ai'edi yaiaina i na 'awa'a'ia tamu tomogo 'wainega i na nago 'awalawa sakoineye bei i na lalauala-vuvua tamu yana 'eba mia. We'e 'ai'edi kebu i na veluagaiga i na vo, A na vilaku yaku 'eba mianina basenadi a 'iaweniga 'waineye.” Bega i na vilai, i na mai 'eba mianina i na 'iseni 'akonadi i 'idewai 'atumaina wata vunavunagina i 'eno'eno, siwe nage'avana.^s ⁴⁵‘Fai kebu 'ana veluvaiga i na souyeni i na nago wata yaiaina sakoiotogidi 7 i na vagavaidi i na miedi i na luku 'eba miananina 'waineye. Tomotoganina i na 'ivesakotogi mogitana, basenadi kebu bani'odiga. 'Omi tutuya de'e 'ana tomotoga wata bani'odi, 'wa vo, 'A na nuavilama yama sakona 'waidiega,” siwe 'awaie 'wa na sakotoga.”

Iesu inana wata tainavo i maia 'waineye.

⁴⁶“Iesu bola i veveifufu tomotoga 'waidie nika inana tainavo taiadi i le'wai. Tanotanoge i tovoi i vo, 'Ima nuanuama 'a na veifufu Iesu 'waineye.” ⁴⁷Tamu tomogo i nago Iesu 'waineye i voneni i vo, Inamu taimwavo taiadi sino'o, nuanuadi taiadi 'wa na veifufu.” ⁴⁸⁻⁴⁹Iesu tomotoga i vonedi i vo, 'Wa vonaga 'wa vo, Inamu wata taimwavo sino'o,” siwe a na vonemi. Side, yaku tovetutuyamavo, taunidi inaku, wata taikwavo. ⁵⁰‘Aitoi Tamaku abame yana nuanua 'ana todumwebika, taunina taiku, novuku, 'alo inaku.”

Luyavuyavulagi 'ana vona-awatabai.

13 ¹Mulieta 'aiatanina 'waineye Iesu vanuga i 'iaweni i nago balebaleye, bei i miabui i na ve. ²'Aila'a bwaikina i maia i tovoifineni begaidi wakayega i talalaka we'e tomotoga lelege i tovoi. ³Nani fuedi faifaidi i ve 'waidie vona-awatabaiega, i vo,

q **12:42** 1 Kin 10:1-10 r **12:42** 'Ana mogitana, Kwini i mai bolimanayega.

s **12:43-44** 'Anu'anunu 'Atumaina kebu tomogonina i da agei. t **12:45** 2 Fit 2:20

u **12:46** Mad 13:55 v **12:50** Ion 15:14

Tamu tomogo i nago bakule yana witi^w waifeidi i na bakulidi, we'e yadi sauluva luyavuyavulagi. ⁴Yana luyavuyavulagi 'waineye witi 'ifwaidi i ve'anita'idi 'eda balebaleye tomotoga yadi 'eba nago 'waineye, mulieta manuga i mai i 'anidi. ⁵⁻⁶'Ifwaidi i ve'anita'idi bwakebwakeye, nagami i tabo-matayo'o fai fwayafwaya kebu badubadunaga siwe mulieta inala i kabu i 'awagi'adi fai 'walamidi kebu i da vagaobuga. ⁷'Ifwaidi i ve'anita'idi 'awanavenaveye kebu 'adi 'oiga, i ugawegawedi. ⁸We'e 'ifwaidi i ve'anita'idi inageye fwayafwaya 'atumaina 'waineye i tabo i vuaga, 'ifwaidi 100, 'ifwaidi 60 wata 'ifwaidi 30." ⁹Wata Iesu i vo, 'Akonadi yaku vona 'wa nogai, siwe 'wa na venua'ivineni nika 'wa na 'asetai."

Vona-awatabai lamuna.

¹⁰Mulieta Iesu yana tovetutuyamavo i maia 'waineye i velutolieni i vo, Awale 'u veve tomotoga 'waidie vona-awatabaiega?" ¹¹*Bega Iesu i vonedi i vo, 'Akonadi Yaubada i tauyemi nani fueidi givagivadi 'wa 'asetadi yana veimea tomotoga 'waidie faifaina, we'e de'e tomotoganidi kebu. ¹²*)'Ai'edi aitoi sai'afu ma yana 'asetu Yaubada yana veimea tomotoga 'waidie faifaina, bega 'asetanina i na 'i'isave'aviniga, 'imoso'i Yaubada i na veleni nika yana 'asetu bwaikina. We'e aitoi kebu tamu yana 'asetaga siwe igodi i vo, Yau yaku 'asetu bwaikina," 'asetanina Yaubada i na eloi. ¹³Tomotoganidi i 'ise'iseni siwe kebu i da 'isa'inanaiga, wata i noganogai siwe kebu i da nogayadewai 'alo i da 'asetai begaidi a veve 'waidie vona-awatabaiega. ¹⁴⁻¹⁵*)Nika basenadiotoga Yaubada yana tolu'ivona 'ana wagava Aisea yana vona-vagata 'ana mogitana i souyeni, Yaubada i vo, Tomotoga de'e nuadi tabodadi, Tanigadi i 'ibodadi Bega kebu i na nogai. Matadi i 'uludi Bega kebu i na 'iseni. 'Ai'edi nuadi i da magetaiga I da nuaviladi 'waikuye A da 'ive'atumaidi. Begaidi i na nogaya-wayoga, kebu nuadi i na magetadi. Wata i na 'isa-wayoga siwe kebu i na 'isa'inanaiga."

¹⁶Aisea yana vonanina tomotoganidi faifaiddi, we'e 'omi 'eba sosoana 'waimie fai taunimi matamiega 'wa 'ise'iseni wata taunimi tanigamiega 'wa noganogai. ¹⁷^aA vona mogitana 'waimie basenadiotoga Yaubada yana tolu'ivonavo fueidi wata tomotoganidi yadi sauluva tonovidi, nuanuadi

^w 13:3 'Ana 'isa'isa bani'odi laisi. ^x 13:11 1 Kol 2:10 ^y 13:12 Mad 25:29; Luk 8:18
^z 13:14-15 Ais 6:9-10; Ion 12:40 ^a 13:17 1 Fit 1:10-12

bwaikina yaku folovanidi 'wa 'ise'isediga i da 'isedi wata yaku ve 'wa noganogaiga i da nogai, siwe kebu.”

Vona-awatabainina Iesu i kiavemagetai.

¹⁸Wata Iesu yana tovetutuyamavo i vonedi i vo, A na vonemi, luyavuyavulagi 'ana vona-awatabai 'ana kiavemageta side bani'odi. ¹⁹Waifei i ve'anita'idi 'eda balebaleye 'ana nuanua, bani'odi tomotoga vona i nogai Yaubada i na veimeyedaga faifaina, siwe kebu i da 'asetaiga. Bega Seitani, taunina Tosakona i mai tolau'age i bakuli i nuanuaniga i elodi. ²⁰Waifei i ve'anita'idi bwakebwakeye 'ana nuanua, bani'odi tomotoga ma yadi sosoana Yaubada yana Vona i nogai siwe yadi nuanua 'waidie kebu mogitana i da lukuga. ²¹^bI vetumagana siwe tutuya 'ale'usana. Tutuyanina vita 'alo ve'isakololo i na souyedi Vonanina faifaina i na baila-matayo'oyeni. ²²Waifei i ve'anita'idi gaweye 'ana nuanua, bani'odi tomotoga Yaubada yana Vona i nogai siwe yadi mia faifaidi i vevenuafouviga wata 'ai'aiwabu 'adi nuanua 'waidie bwaikina 'wa da vo i da ugawegawedi kebu i da vuaga. ²³We'e waifei i ve'anita'idi inageye fwayafwaya 'atumaina 'waineye 'ana nuanua, bani'odi tomotoga Yaubada yana Vona i nogai wata i 'asetai mulieta yadi folova Yaubada faifaina bani'odi i vuaga, 'ifwaidi 100, 'ifwaidi 60, wata 'ifwaidi 30.”

'Atumaidi wata sakoidi taiadi i tabowanawana.

²⁴Wata Iesu i ve tomotoga 'waidie tamu vona-awatabai 'wainega tomotoga 'atumaidi wata sakoidi faifaidi i vo, Yaubada yana veimea tomotoga 'waidie side bani'odi. Tamu tomogo witi waifeidi 'atumaidi i bakulidi. ²⁵Tamu lovana, tomotoga matatabudi i 'eno'enovi 'ana gavia i mai matagawagawa, witi 'ana 'isa'isa i luyavuyavuleni nika i tauya.

²⁶⁻²⁷Tutuyanina witi i vebwaika i adaga matagawagawa i vemageta bega tonibakulanina yana tofolovavo i 'iseni i mai i voneni i vo, 'Auvea, nagami waifei 'atumaidi ta bakulidi we'e tamu gawa ava'aiega i mai?” ²⁸Tomogo i vo, Tamu 'aku gavia i 'idewai.” Bega yana tofolovavo i velutolieni i vo, Bani'odi yamu nuanua, 'a na luabuabudi?” ²⁹Yadi 'auvea i vo, 'Asa'aiana, 'ai'edi 'wa na luabuabudiga, bola witiotoga 'wa na siabuyedi. ³⁰^dWa bailedi, i na tabowanawana, bola 'aiala 'ana tutuye to'aiala a na vonedi a na vo, Nagami matagawagawa 'wa na luabuabudi 'wa na 'itavidi 'wa na tawedi 'aie i na 'alaidi, we'e witiotoga 'wa na vedodogidi yaku bubuwakeye.”

Yaubada yana veimea tomotoga 'waidie yana vebwaika 'ana vona-awatabai.

³¹Wata Iesu i ve 'waidie vona-awatabaiega i vo, Yaubada yana veimea tomotoga 'waidie yana vebwaika side bani'odi. Tamu tomogo 'ayawana

^b 13:21 Kol 2:7 ^c 13:22 Luk 12:16-21; 1 Tim 6:9-10 ^d 13:30 Mad 3:12

bilana i 'ewai i bakuli mulieta i vebwaika. ³² Bilanina saiotogina siwe tutuyanina i vebwaika welavi bwaikaotogina bega manuga i mimaia didineye i vevegiuva.”

Yaubada yana veimea tomotoga 'waidie yana susula 'ana vona-awatabai.

³³ Wata Iesu i ve 'waidie vona-awatabaiega i vo, Yaubada yana veimea tomotoga 'waidie yana susula side bani'odi. Tamu vavine falawa bwaikina i vilai mulieta isita i yatoi, i susula falawa matatabuna 'waineye nika i vebwaika.”

Awale Iesu vona-awatabaiega i ve.

³⁴ Tutuya fuedi Iesu i veve tomotoga 'waidie vona-awatabaiega, kebu tamu tutuya i da vonaotoga. ³⁵ eDe'e bani'odi i vevega nika tamu Yaubada yana tolu'ivona yana vona 'ana mogitana i souyeni. Basenadiotoga i vona-vagata Yaubada 'ana Venua'ivina yana vona faifaina i vo,

Vona-awatabaiega a na veifufu 'waidie.

Nani fuedi givagivadi fwayafwaya 'ana 'idewavau 'wainega i maiga 'asiau, a na lu'ivoneyedi 'waidie.”

Matagawagawa 'ana vona-awatabai Iesu i kiavemagetai.

³⁶ Yana ve i 'a'avana, Iesu 'aila'a i 'iawedi i nago vanuge. Mulieta yana tovetutuyamavo i maia i luku 'waineye i voneni i vo, Nuanuama 'a na 'asetai matagawagawa i taboga bakule 'ana nuanua.”

³⁷⁻³⁸ fIesu i vo, Tomogonina waifei 'atumaidi i bakulidiga 'ana 'asetai yau, kumaniku a vetomotogaotoga. We'e tanoga, fwayafwaya matatabuna. Waifei 'atumaidi 'adi 'asetai tomotoganidi 'akonadi taunidi i tauyedi Yaubada 'waineye i veveimeyedi, we'e matagawagawa, tomotoganidi Yaubada i baila bega Seitani i veveimeyedi. ³⁹ Tomogonina matagawagawa 'ana toluyavuyavulagi taunina Seitani, tutuya 'aiala 'ana 'asetai Vonayavuga 'ana tutuya, we'e to'aiala taunidi anelose.

⁴⁰⁻⁴¹ gMatagawagawa i luabuabudiga i tunudi i 'alaidiga 'ana 'asetai side bani'odi. Fwayafwaya 'ana 'eba ve'a'ava 'waineye, yau a vetomotogaotoga yaku anelose a na vetunedi, tovetalaimimila wata 'ifwaidi tosakona i na va'augidi i na nawedi 'ai-'ala'alase bega kebu wata i na miamia Yaubada mataneye. ⁴² I na nawediga i na tawedi, bei i na 'we'we'wela wata maigidi i na yuyuyudi fai veviga bwaikina. ⁴³ hWe'e mulieta Yaubada yana tomotoga yadi sauluva tonovidi Tamadi yana 'Eba Veimea nageneye 'adi 'isa magemagetadi, 'wa da vo inala i da vulaoga.

'Akonadi yaku vona 'wa nogai, siwe 'wa na venua'ivineni nika 'wa na 'asetai.”

e 13:35 Same 78:2 f 13:38 1 Kol 3:9 g 13:41-43 Mad 25:31-46 h 13:43 Dan 12:3

**Yaubada yana veimea tomotoga 'waidie 'ana
'atumaina 'adi vona-awatabai.**

⁴⁴Wata Iesu i ve 'waidie i vo, Yaubada yana veimea tomotoga 'waidie 'ana 'atumaina side bani'odi. Basenadi tamu aitoi mani wata 'ai'aiwabu bwaikina i tavuni fwayefwayeye i 'eno'eno. Mulieta tamu tomogo i veluagai, i 'isenina wata i tavu-vaitugani. I sosoana bwaikina, i nago yana kukua matatabuna i vekimwaneyedi tutulidi i 'ewadi fwayafwayanina i kimwanei bega yana fwayafwaya fai 'ana 'atumaina nageneye i 'eno'eno.”

⁴⁵Wata Iesu i vo, Egavo taunidi i tauyedi bega Yaubada i na veveimeyedi yadi sauluva side bani'odi. Tamu tomotoga i lalauala nuanuana mwali bwaikina wata 'atumaotogina. ⁴⁶I na veluagaiga yana kukua matatabuna i na 'anivelenedi bega mwalinina i na tuveobuya.”

Tutuya 'eba ve'a'ava 'ana vona-awatabai.

⁴⁷⁻⁴⁸Wata Iesu i ve 'waidie vona-awatabaiega i vo, Yaubada yana veimea tomotoga 'waidie tutuya 'eba ve'a'ava faifaina side bani'odi. Tovuata igana tulina tulina i 'onadi, tutuyanina yadi vuata i adaga i yo'ei 'avale bei i lauvisi igana 'atumaidi yadi venuane i obu, sakoidi i tawedi. ⁴⁹⁻⁵⁰Wata bani'odi, bola tutuya 'eba ve'a'ava 'waineye, anelose i na nagoi tomotoga sakoidi i na va'augidi tomotoga 'atumaidi 'awasasadiega i na tawedi 'ai-'ala'alase, bei i na 'we'we'wela wata maigidi i na yuyuyudi fai veviga bwaikina.”

⁵¹Tutuyanina Iesu yana ve i 'a'avana, yana tovetutuyamavo i velutoliedi i vo, De'e vona-awatabainidi matatabuna 'wa 'asetadi 'alo kebu?” I vo, E'e 'a 'asetadi.” ⁵²Bega Iesu i vo, 'Ai'edi aitoi ve'etoboda i maia Mosese 'wainega i 'asetadiga, wata taunina i tauyeni bega Yaubada i veveimeyeni, taunina bani'odi tomogo 'ai'aiwabuna. Fai Yaubada yana Vona tuatuaidi wata yaku ve 'ivaudi i 'asetadi, 'ana fata mali tomotoga i na veve 'waidie.”

Me Nasaledi kebu nuanuadi Iesu.

⁵³⁻⁵⁴I'esu i vevega vona-awatabaiega i 'a'avana, i tauya i nago taunina yana 'atamane Nasaledi. Bei i ve tomotoga 'waidie yadi 'eba miava'auta nageneye siwe nuadi i voganidi yana ve faifaina. I vo, Ava'ai tomotoga de'e? Ava'aiega yana 'asetadi i 'ewai, bani'odi i munega 'eba nuavogana wata 'eba nua'ewa i 'i'idewadi?” ⁵⁵⁻⁵⁶Tomogo no'o kebu tulinaga, tamana kamuda, inana Meli wata tainavo ta 'asetadi, Iemesa, Iosefa, Saimoni wata Iudasa, wata novunavo taiadi ta miamiani. We'e yana

'asetanidi wata yana toketokenanina ava'aiega i veluagadi?" 57I bavuyeni begaidi kebu nuanuadi Iesu i baila. Bega Iesu i vonedi i vo, Yaubada yana tolu'ivonavo ma 'adi ve'ililibu tomotoga tulidi 'waidie, we'e yadi 'atamana tomotogidi wata yadi 'aila'a kebu i da ve'ililibuyediga." 58Fai kebu i da vetumagana 'waineye, begaidi kebu bei 'eba nuavogana wata 'eba nua'ewa fuedi i da 'idewadiga.

Ioni Tobafitaiso yana wafa.

14 1-2Tutuyanina 'waineye, Loma gabemani yadi to'edakumeta 'ana wagava Kini Elodi 'awalawa Galili nageneye i veveimea. Iesu yana folova toketokena valana Elodi i nogai yana tofolovavo 'ifwaidi i vonedi i vo, No'o Iesu, 'asa'aiana mogitana taunina Ioni Tobafitaiso, ma yana toketokena i yawasa-vaitugana i ve-Iesu, begaidi 'eba nuavogana wata 'eba nua'ewa i 'i'idewadi.

3Elodi bani'odi i voneyediga fai yana veimea 'wainega Ioninina i yogoni i yatoi vanuga 'eba yogona 'waineye. We'e Elodi basenadi taina Filifi tamu vavine i nagidi 'adi wagava Elodiasa mulieta Elodi i luobuyedi. 4Ioni Tobafitaiso vala i nogai bega tutuya fuedi i lulumatana-vebogia i vo, Awale taimu yana vavine 'u nagidi, yada ve'etoboda 'u geuya." 5Ioni yana vonanina faifaina Elodi i veimea vanuga 'eba yogona 'waineye i luku, nuanuana i na wafa siwe me Diu i kololoyedi fai i vo, Taunina tamu Yaubada yana tolu'ivona."

6-7We'e Elodi yana tubuga 'ana 'aiata 'waineye sakali bwaikina i 'idewai, Elodiasa natudi i voneni matadie i kayama. Elodi i 'iseni nuana i 'ewai bega i vona'awaufaufa 'waineye i vo, 'Ai'edi ava'ai nuanuamu 'u na velu'uiiga, vona mogitana a na velemu." 8Inana i nogai natudi i tolivetovoneni bega vavinenina ne'e'elina i nago Elodi 'waineye i vo, Nuanuaku Ioni Tobafitaiso i na wafa, 'unu'ununa 'aivoeye 'u na dodogi 'u na mieni 'waikuye, a na 'iseni a na 'asetai 'akonadi i wafa." 9Kini Elodi i nogai nuana i vita siwe kebu 'ana fata yana vona'awaufaufa i na lugeuya fai 'ana wakawaka matadie i vona, bega yana tolugaviavo i vonedi i nagoi Elodi yana nuanua i 'idewai. 10-11Vanuga 'eba yogona 'waineye Ioni 'odona i boboi, 'aivoeye i dodogi i mieni vavine i veleni. I 'ewai i nago inana i veledi. 12Tutuyanina Ioni yana tovetutuyamavo vala i nogai, i maia tomogo'avana i 'ewai i ve'ufai, mulieta i nagoi Iesu i voneni.

Iesu tomotoga 5,000 i ve'anidi.

13Tutuyanina Iesu i 'asetai Ioni 'akonadi i wafa, bega 'atamananina i 'iaweni i dodoga 'aiseneye i nago kebu tamu aitoi bei i da miamiaga 'waineye. Tomotoga yana tauya i 'asetai bega yadi 'atamana i 'iawedi i veyogo'waila i nagoi 'agediamo. 14^kTutuyanina Iesu i le'wa balebaleyeye

^k 14:14 Mad 9:36, 15:32

tomotoganidi i 'isedi 'aila'a bwaikina i miamiani, nuana i vita bwaikina faifaiddi bega yadi toviga i 'ive'atumaidi.

¹⁵ 'Akonadi lavilavi sai'afoga i na sidudubali tovetutuyamavo i maia Iesu 'waineye i voneni i vo, 'Akonadi tutuya i ve'ale'usa wata de'e bei kebu tomotoginaga, bega 'aila'anidi 'u na vonedi i na nagoi 'atamana 'waidie taunidi 'adi'adi i na kimwane.” ¹⁶ Iesu i vonedi i vo, 'Asa'aiana i na miamiani, siwe 'omi 'ai'edi ava'ai 'wa na veledi i na 'ani.” ¹⁷ Tovetutuyamavo i vo, 'Waimeye 'ani'ani mwadodoudi 5 wata igana 'ailuga, 'asa'aiana bani'odi, kebu fuediga.” ¹⁸ Iesu i vo, 'Wa miedi 'waikuye.”

¹⁹ Tomotoga i vonedi mosomoso tabwadie i miabui, mulieta Iesu 'ani'aninidi i 'ewadi, i 'isalaka abame i vekaiwa Yaubada 'waineye. I vekaiwa i 'a'avana, 'ani'ani i 'ivividi tovetutuyamavo i veledi bega tomotoga i veutadi. ²⁰ 'Aila'anidi matatabudi i 'ani, kamodi i aidi, mulieta tovetutuyamavo tomotoga nikilidi i va'augidi bayawa 12 i veadagidi. ²¹ 'To'aninidi iaveta tulai'avadi i lu'iawawadi 'adi 'aila'a 5,000, we'e vevine tulaidi wata yavayavava matatabudi kebu taiadi i da lu'iawawadiga.

Iesu ufa tabwaneamo i nago.

²² Tomotoga i ve'anidi i 'a'avana, yana tovetutuyamavo i vonedi i vo, 'Wa na dodoga wakeye, ta na viwaia lavu vi'ainega, yau tomotoga a na vonedi i na nunagoi mulieta yau a na vemuli. ²³⁻²⁴ ^m Tomotoga i tauya i nunagoi, Iesu i laka 'oyeye, 'aiseneye i na velu'ui. 'Akonadi i laviotogi Iesu 'aiseotogina bei i miamia, we'e yana tovetutuyamavo i yogokamwana lavunina bwaikina 'waineye, kaukau bwaikina i nunuga wata yagina i veveviladi.

²⁵ Sai'afoga tutuya i na kililia, Iesu i le'wa 'waidie, ufa tabwaneamo i mai. ²⁶ "Tutuyanina yana tovetutuyamavo i 'iseni ufa tabwaneamo i mimai i kololoyeni i bwau i vo, 'Wa 'isanaweni, yalua.” ²⁷ Nika Iesu i vonedi i vo, Kebu 'wa na kolologa, yau taunida.” ²⁸ Fita i vona-matayo'o i vo, Vetuma 'omu'e, 'u da vona ufa tabwaneamo a da wai 'waimuye.” ²⁹⁻³⁰ Bega Iesu i vo, 'U mai.” Yana voneye Fita i obu i nunago Iesu 'waineye nika i 'isadaba kaukau wata yagina i 'isedi i kololo igodi be'ama i monumonu i bwau i vo, 'Auvea, 'u da 'ita'ita'ieku.” ³¹ Iesu nimana i 'otoi Fita i 'ive'avini i voneni i vo, Awale 'u venuanaluga, yamu vetumagana 'waikuye siaina.” ³² I silakai i 'a'avana 'adi 'ailuga i dodoga, nika yagina i 'awatagoni. ³³ "Yana tovetutuyamavo i 'iseni i subiai i vo, Vona mogitana, 'omu Yaubada Natuna.”

^l 14:21 Mad 15:38 ^m 14:23-24 Luk 6:12, 9:28 ⁿ 14:26 Luk 24:36-37
^o 14:33 Mad 27:54

Iesu tovinga i 'ive'atumaidi 'atamana Genesaleta.

³⁴I duduna Genesaleta balebaleye bei yadi waka i yo'ei. ³⁵Tomotoga Iesu i 'isa'inanai bega vala i vetunedi 'awalawanina matatabuna 'waidie bega tovinga i miedi Iesu 'waineye. ³⁶^PI velu'ui 'waineye, nuanuadi tovinganidi i na 'abitonovidi, we'e 'ai'edi kebu, 'ana kaleko mataifwa'avana i na 'abitonovi. Egavo i 'abitonovaga matatabudi i ve'atumai.

Me Diu tubudiavo yadi ve faifaina.

15 ¹⁻²Mulieta 'ifwaidi me Diu totafalolo Falisi wata ve'etoboda 'adi tovevo i maia Ielusalemega Iesu i velutolieni i vo, Ve'etobodanidi i maiga tubudavo 'waidiega, awale yamu tovetutuyamavo kebu i da ve'ililibuyediga i geugeudi? 'Ani 'ana tutuye kebu nimadi i da lekoa-dewadi we'e i lulu-'avo'avovo." De'e bani'odi i voneyediga fai yadi nuanua i vo, 'Ai'edi nimada ta na lekoa-dewadi wata ta na tafalolo, Yaubada i na 'asetada yada nuanua vunavunagidi." ³Iesu yadi velutoli i tutuli i vo, Siwe 'omi wata awale Yaubada yana veimea kebu 'wa da ve'ililibuyediga 'wa geugeudi we'e taunimi yami nuanua 'waidie 'wa vematayakayaka. ⁴^qYaubada i vonaga i vo, Tamamu wata inamu 'u na ve'ililibuyedi," wata i vo, 'Ai'edi aitoi tamana 'alo inana i na awavesakoyediga i lubwaineni 'wa na luvewafai." ⁵⁻⁶Veimeanidi 'wa geugeudi fai 'wa veve 'wa vo, 'Ai'edi aitoi ma yana mani, siwe kebu nuanuana tamana wata inana i na 'ivaisediga, 'omi 'wa tauyeni bega i na vonedimo i na vo, Mani de'e a na 'aniveleneni Yaubada faifaina," vonanina 'wa fali'atumaieni. We'e mogitana i lubwaineni tamana wata inana maninina 'wainega i da 'ivaisedi. De'e bani'odi Yaubada yana Vona 'wa lulu-'avo'avovoi, ma'itufa yami nuanua 'wa vevematayakeyakedi. ⁷"Omi mogitana tovekali. 'Awami i tatalaboda nani fueidi faifaidi siwe wata 'wa 'i'idewadi. Basenadiotoga Yaubada yana tolu'ivona Aisea, Yaubada yana Vona 'wainega i vona-vagata faifaimi. I vonaga mogitana i vo,
⁸De'e 'aila'anidi 'awakebuladiega i ve'ililibuyeku,
 We'e kebu mogitana i da nuakalikalieku.
⁹Fai tomotoga yadi nuanua i veve i vo 'ako, Yaubada 'wainega,"
 Begaidi 'waikuye i 'o'odu-maimaiga."

Naninidi tomotoga i na 'ivesakodi.

¹⁰Iesu 'aila'a i goledi i nagoi 'waineye i vonedi i vo, A na vonemiga 'wa na venua'ivineni nika 'wa na 'asetai. ¹¹^sFalisi nuanuadi nima-'ilekoa siwe ava'ai i na luku tomotoga 'awadiamo kebu 'ana fata tomotoganidi i na 'iveyokedi, we'e mogitana vona 'alo nuanua sakoidi tomotoga 'waidiega i na souyediga, 'ana fata tomotoga i na 'iveyokedi."

¹²Mulieta Iesu yana tovetutuyamavo i maia i voneni i vo, Yamu vona 'wainega Falisi i kamogala, 'u 'asetai?" ¹³Iesu i vonedi i vo, Welavinidi Tamaku abame kebu 'ana bakubakulaga, matatabuna i na siabudi. ¹⁴'Falisinidi kebu faifaidi 'wa na nuanua. Avinodi taunidi tomotoga 'ada to'edakumeta, siwe bani'odi tomatasako fai Yaubada yana Vona kebu i da 'isa'inanadiga. Kebu 'ana fata tamu tomatasako iana tomatasako i na siveikani fai bola 'adi 'ailuga i na be'uluga vakavakale."

¹⁵Fita i voneni i vo, Nuanuaku vona-awatabainina 'u da kiavemagetai 'waimeye." ¹⁶Iesu i vo, 'Alo 'omi wata bola 'wa bavubavu? ¹⁷I lubwainemi 'wa da 'asetai naninidi i na luku tomotoga 'awadiamo i na nago kamodie mulieta i na wala'aieni. ¹⁸We'e naninidi sakoidi 'awadiega i na souyediga, 'ana fata tomotoga i na 'iveyokedi Yaubada mataneye, fai yadi nuanua 'waidiega i mai.

¹⁹"I na 'iveyokediga fai nuanuananidi i na 'ivesakodi nika luwewafa, lauobu, ve'avula-'avo'avovo, vainago, vekali, vebonaivo. ²⁰Side naninidi 'ana fata tomotoga i na 'iveyokedi Yaubada mataneye, we'e 'ai'edi 'wa na 'ani, siwe kebu nagami nimami 'wa na lekoo-dewadiga Falisi yadi nuanua bani'odi, kebu 'ana fata i na 'iveyokemiga."

Vavine yadi vetumagana.

²¹Mulieta Iesu ma enavo bei i miamiaga i 'iaweni, i nagoi tamu 'awalawa 'waineye, 'atamana Taia wata Saidoni liviladie. ²²I miamiani nika tamu vavine Keinana i le'wa, vavinenidi 'awalawanina 'waineye i miamia. Taunidi kebu vavine Diu siwe i mai i toke i velu'ui Iesu 'waineye i vo, 'Auvea, 'omu Yaubada 'ana Venua'ivina, Kini Devida tubuna 'u da 'isanuakalikalieama. Natuku vevinena yaiaina i agei bega i veveviga bwaikina." ²³Siwe kebu tamu ava'ai Iesu i da voneyeni 'waidie. Mulieta yana tovetutuyamavo i maia 'waineye i lukakadeni i vo, 'U veugeugedi, mulideye i mimai i vevetaniga-logilogi."

²⁴Tovetutuyamavo i vonavonaga begaidi Iesu vavine i vonedi i vo, Yaubada i vetunekuga me Isileli 'aise'avadi 'waidie, taunidi vuyovuyodi 'wa da vo 'aisaya sifi, we'e 'omi mali tomotoga kebu." ²⁵Siwe vavine i nogai Iesu yana vona i mai ma yadi ve'ililibu i 'odu 'ageneye, i vo, 'Auvea 'u da 'ivaisema." ²⁶Iesu i vo, Kebu i da lubwaineku kwakwama 'adi'adi a na elodi a na 'anivelenedi 'ou'ou 'waidie." ²⁷Vavine i 'asetai Iesu i vonavona nagami i na folova taunina yana 'aila'a me Diu 'waidie, faifainanina i voneni i vo, 'Auvea we'e mogitana. Siwe tutuyanina kwakwama i na 'ani'ani, 'ou'ou siaidi mukumuku i na luluyamuyamu. Faifainanina sai'afo 'u da 'ivaisema." ²⁸'Iesu yadi vona i nogai i vonedi i vo, Yami vetumagana toketokena, ava'ai nuanuami 'ana mogitana i na souyeni 'waimie," nika mogitana natudi i ve'atumai.

† 15:14 Mad 23:16 † 15:19 Gal 5:19-21 † 15:28 Mad 8:10,13

Toviga fuedi Iesu i 'ive'atumaidi.

²⁹Iesu ma enavo 'awalawanina i 'iaweni, Lavu Galili balebaleamo i nagoi, mulieta i laka tamu 'oya siaina 'waineye i miabui. ³⁰'Aila'a bwaikina i maia, yadi tovigafuedi i miedi, toviganiidi 'ifwaidi 'agedi sakoidi, tomatasako, tubusakosako, tomotoganidi kebu 'adi fata i na welavaga, wata 'ifwaidi tovigatoga. Toviganidi i miedi Iesu 'waineye matatabudi i 'ive'atumaidi. ³¹Tomotoga i 'iseni nuadi i voganidi fai egavo kebu i da welawelavaga siwe i welava, tubusakosako wata 'agedi i sako i yogodewa, wata tomatasako i 'isa-vaitugana. Me Isileli toketokenanina i 'iseni yadi Yaubada i subiai.

Tomotoga 4,000 Iesu i ve'anidi.

³²Iesu yana tovetutuyamavo i goledi i nagoi 'waineye i vonedi i vo, Tomotoga de'e faifaidi a nuavita fai 'akonadi 'aiata 'aitonu taiadi ta miamiani siwe kebu 'adi'adiga. Kebu nuanuaku ma 'adi lase a na vetunedi i na nagoi yadi vanuge fai bola 'edeye i na mwea." ³³Yana tovetutuyamavo i velutolien i vo, De'e kebu tomotoginaga, ava'aibe bei 'ani'ani ta na veluagai tomotoga de'e ta na ve'anidi?" ³⁴Wata Iesu i velutoli yana tovetutuyamavo 'waidie i vo, We'e 'omi, 'aivia 'ani'ani 'waimie?" I vo, Kebu fuediga, 'ani'ani mwadodoudi 7 wata igana siadi." ³⁵Bega Iesu 'aila'a i vonedi i miabui. ³⁶Mulieta 'ani'aninidi 7 igana taiadi i 'ewadi, i vekaiwa Yaubada 'waineye, i 'a'avana i 'ivividi wata i baidi tovetutuyamavo i veledi i veusedi 'aila'a 'waidie. ³⁷Matatabudi i 'ani, 'adi fata, mulieta yana tovetutuyamavo tomotoga nikilidi i va'augidi bayawa bwaikidi 7 i veadagidi. ³⁸To'aninidi iaveta tulai'avadi i lu'iawawadi 'adi 'aila'a 4,000, we'e vevine tulaidi wata yavayavava matatabudi kebu taiadi i da lu'iawawadiga.

³⁹'Ani i 'a'avana, Iesu tomotoga i vonedi i nagoi, we'e i dodoga wakeye i nago 'awalawa Magadani.

Tomotoga nuanuadi 'eba 'isa toketokena.

16 ¹Tamu tutuya me Diu to'edakumetavo 'ifwaidi i maia Iesu 'waineye, taunidi totafalolo 'adi wagava Falisi wata Sadusi. Nuanuadi i na silubuya bega i voneni i vo, Nuanuama 'eba nuavogana wata 'eba nua'ewa 'u na 'idewai 'a na 'iseni 'a na 'asetai 'omu 'u mai Yaubada 'wainega 'alo kebu." ²⁻³Siwe Iesu yadi vona i tutuli i vo, 'Ai'edi 'wa na 'iseni Malayaubani i na laka 'wa na 'asetai tutuya kumaga, wata 'ai'edi 'wa na 'iseni waowa i na vetovotovoia 'wa na 'asetai 'ako i na 'wei. Tugusanidi i na vemi bega 'ami fata 'wa na 'asetai ava'ai i na souyedi,

^w 15:31 Mak 7:37 ^x 15:32 Mad 14:14 ^y 16:1 Mad 12:38; Ion 6:30

we'e 'eba 'isa toketokedi Yaubada i 'i'idewadi matamie tutuya mulina faifaina kebu 'wa da 'isa'inaanadiga. ⁴ "Omi tutuya de'e 'ana tomotoga yami sauluva sakoidi wata kebu nuanuami Yaubada yana nuanua. 'Wa vonavona nuanuami 'eba nuavogana wata 'eba nua'ewa, a na 'idewai siwe a nuani kebu tamu a na 'idewaiga. Siwe tamu nani a na veifufuyeni yami 'eba 'isa. 'Eba 'isanina bani'odi Iona, taunina Yaubada yana tolu'ivona, igana bwaikina kamoneye i miamia 'aiata 'aitonu, mulieta i souyeni." Iesu i vona'a'ava, i 'iawedi i nago tulineye.

Iesu i vona-awatabai Falisi wata Sadusi faifaidi.

⁵ Mulieta Iesu ma yana tovetutuyamavo i damana lavu vi'ainega, siwe tovetutuyamavo nuadi i fani, kebu tamu 'ani'ani i da 'ewaiga. ⁶ "Bega Iesu vona-awatabaiega i velu'ase'asedi tomotoga sakoidi yadi sauluva kebu i na damana 'waidie i vo, 'Wa na 'i'isave'avinimi Falisi wata Sadusi yadi isita i na nunago i na vedamanimi."

⁷ "Aise'avadi i veifufu i vo, Isita^b beledi 'ana 'eba 'ivebwaika, bani'odi i voneyediga fai 'ida beledi kebu ta da 'ewadiga." ⁸ Iesu yadi vona i 'asetai bega i velutoliedi i vo, Awale nuafoumi i veviga 'wa veveifufu beledi faifaina? Yami vetumagana mweana. ⁹ "Bola kebu 'wa da 'asetakuga yau 'aku fata 'ani'ani a na velemini. Bega 'wa na nuani basenadi 'ani'ani 5 a 'ivividi, tomotoga 5,000 i 'ani, mulieta i 'ani-wayogeni bayawa fuedi 'wa veadagidi. ¹⁰ "Wata 'wa na nuani basenadi 'ani'ani 7 'waidiega tomotoga 4,000 a ve'anidi, wata bayawa fuedi 'wa veadagidi. ¹¹ Awale yaku vona kebu 'wa da 'asetauga. 'Omi 'wa vo 'ako, Yau a vonavona beledi faifaina," siwe kebu. Taunimi 'wa na 'i'isave'avinimi Falisi wata Sadusi yadi isita 'wainega." ¹² Mulieta tovetutuyamavo i 'asetai Iesu kebu i da vonavona isitanina beledi 'ana 'eba 'ivebwaika faifaina, we'e mogitana i vonavona Falisi wata Sadusi yadi ve-vekavekali kebu i na vedamanidiga.

Fita yana 'asetai Iesu faifaina i sivemageseni.

¹³ Iesu ma enavo i nagoi tamu 'awalawa 'waineye 'atamana Sisalia Filifai lilivaneye, bei yana tovetutuyamavo i velutoliedi i vo, 'Wa da nogaiga tomotoga yadi nuanua yau a vetomotogaotoga aitoi?" ¹⁴ "Tovetutuyamavo yana velutoli i tutuli i vo, 'Ifwaidi tomotoga i vonaga 'omu Ioni Tobafitaiso i yawasa-vaitugana, 'ifwaidi i vonaga 'omu Ilaitia abamega i obuma, wata 'ifwaidi i vonaga 'omu Ielemaia 'alo tamu Yaubada yana tolu'ivona wafayega i tovoi." ¹⁵ Iesu yana tovetutuyamavo i velutoliedi i vo, We'e 'omi, 'wa da nuaniga yau aitoi?" ¹⁶ fSaimoni

^z 16:4 Ioa 1:7 ^a 16:6 Luk 12:1 ^b 16:7 Isita falawa matatabuna 'waineye i na susula, bani'odi walabo 'aluna, 'ai'edi i na 'anibiai 'aisayanina matatabuna i na 'ivesakoi.
^c 16:9 Mad 14:17-21 ^d 16:10 Mad 15:34-38 ^e 16:14 Mak 6:14-15 ^f 16:16 Ion 6:69

Fita i vo, 'Omu Keliso, Yaubada Miamia-vagaina Natuna wata 'ana Venua'ivina.” ^{17g}Iesu i voneni i vo, Saimoni, 'omu Iona natuna, Yaubada i vesauluva 'atumaina 'waimuye fai 'aku 'aseta kebu tomotogaotoga i da vemu, yamu 'asetanina tonovina i mai abamega Tamaku 'wainega. ^{18h}Fai 'u 'asetakuga begaidi a na vonemu. 'Omu Fita, 'amu wagava 'ana saivila kileu. Yamu 'aseta faifaiku 'u sivemageseniga bani'odi kileu bwaikina, tabwaneye yaku 'Aila'a a na va'augimi. Yaku 'Aila'aniami 'wa na mia-vagata, Vatu'ai Manamanawenaⁱ 'ana tomia toketokedi kebu 'adi fata i na vetoketoke 'waimie. ^{19j}Veimea a na velemu, tomotoga yadi luku Yaubada yana 'Eba Veimea 'waineye faifaina. Ava'ai 'u na talabodeni fwayefwayeye, wata abame Yaubada i na talabodeni, ava'ai 'u na tauyeni fwayefwayeye, wata abame Yaubada i na tauyeni.”

²⁰Mulieta Iesu yana tovetutuyamavo i talabodebodedi i vo, Kebu tamu aitoi 'wa na voneni yau Keliso, Yaubada 'ana Venua'ivina.”

Iesu yana veviga wata yana wafa i veifufuyedi.

²¹Tutuya de'e 'wainega i nagoga Iesu i velamu i kikiavemageta yana tovetutuyamavo 'waidie ava'ai i na souyediga 'waineye faifaidi. I vo, I lubwaineku a na nago Ielusalema, bei veviga bwaikina a na veluagai me Diu yada to'edakumetavo 'au'auveadi, tovelomu 'adi to'edakumetavo, wata ve'etoboda 'adi tovevo 'waidiega. I na veimea a na wafa siwe 'aiata 'ana vetonu 'waineye Yaubada i na sivetovoiku.”

²²Fita Iesu i voneni i nagoi tulidie bega i talabodeni i vo, 'Auvea, kebu bani'odi 'u na voneyediga. Veviga wata wafa 'u veifufuyediga Yaubada i da talabodedi bega kebu i da sousouyedi 'waimuye.” ²³Iesu i sivilai Fita i voneni i vo, 'U vaganago, yamu nuanuananina Seitani yana nuanua. Yaku 'eda 'u velubodabodai, yamu nuanuananina tomia fwayafwaya yadi nuanua, kebu Yaubada 'wainega.”

^{24k}Wata Iesu i vona yana tovetutuyamavo 'waidie i vo, 'Ai'edi aitoi nuanuana mogitana i na mai 'waikuye taiadi 'a na nagoga, nagami taunina yana nuanua i na bailedi. Fai i na vematayakeyakeku veviga bwaikina i na veluagai yau bani'odi a na veluagai. Voke i na wafa faifaiku yau bani'odi a na wafa 'ai lagalagana 'waineye. ²⁵'Ai'edi aitoi yana mia 'ana 'atumaina i na ve'o'oleni, kebu nuanuana yawaina i na tauyeni faifaiku, taunina i na wafaotoga. We'e 'ai'edi aitoi yana mia 'ana 'atumaina wata yawaina i na tauyedi faifaiku, mia 'atumaina wata miamia-vagaina i na veluagai. ²⁶'Ai'edi tamu aitoi fwayafwaya matatabuna 'ana kukua i na 'ewadi mulieta yawaina i na 'a'ava, ava'ai 'ana 'atumaina? Kebu 'ana fata tamu nani 'wainega yawaina i na

g 16:17 Mad 17:5 h 16:18 1 Kol 3:11; Fol 4:10-12; Efe 2:20 i 16:18 Me Guliki bonadi Edesi. j 16:19 Ion 20:23 k 16:24 Luk 14:27

kimwanei. ²⁷Fai 'awaie yau a vetomotogaotoga a na souyeku Tamaku yana mageta mataududulina 'wainega, yaku anelose taiadi, mulieta tomotoga matatabudi a na tutulidi yadi sauluva 'aitamogana 'aitamogana 'adi 'isa'isa bani'odi. ²⁸A vona mogitana 'waimie, 'omi 'ifwaimi bola ma yawaimi 'wa na miamiani, yau a vetomotogaotoga 'wa na 'iseku a na mai tomotoga matatabumi a na veimeyemi.”

Iesu i vemaigisivilavila.

17 ¹'Aiata 6 i 'a'ava, mulieta Fita, Iemesa ma taina Ioni, Iesu i 'edakumesedi, 'aise'avadi i laka 'oyeye. ²"I miamiani nika matadie Iesu 'ana 'isa i vetuli, maigina i magetai inala bani'odi wata 'ana kaleko 'ana lau'avu mataududulina. ³I 'ise'iseni nika tomotoga 'adi 'ailuga i souyedi Iesu taiadi i veveifufu. Tomotoganidi abamega i obuma, Mosese wata Ilaitia, taunidi basenadiotoga Yaubada yana tolu'ivonavo. ⁴Nika Fita i vona Iesu 'waineye i vo, 'Auvea, 'ima taiadi ta maia i lubwaineni, 'ai'edi nuanuamu lau'weta 'aitonu a na 'idewadi, tamu 'omu faifaimu, tamu Mosese, tamu Ilaitia.”

⁵"Fita bola i veveifufu waowa mataududulina i mai i tavunidi, waowanina 'wainega bona i souyeni i vo, De'e Natuku nuafouku faifaina a sosoana bwaikina. Nuanuaku bonana 'wa na nogai.” ⁶Tovetutuyamavo 'adi 'aitonu bonananina i nogaiga i kololo-'afo'afo i lumata'afufu. ⁷Iesu i mai i 'abitonovidi i vonedi i vo, Kebu 'wa na kolologa, 'wa tovoi.” ⁸Tutuyanina i dadaga-lakata kebu tamu aitoi i da 'iseniga, Iesu 'aiseotogina.

⁹'Oyayega i obuobuma Iesu i toke i vonedi i vo, Naninidi 'wa 'isediga kebu tamu aitoi 'wa na voneniga, nagami yau a vetomotogaotoga wafayega a na tovoi, mulieta 'wa na lu'ivona.”

¹⁰"Yana tovetutuyamavo i velutolieni i vo, Awale ve'etoboda 'adi tovevo i vonaga i vo, Nagami Ilaitia i na mai, mulieta Yaubada 'ana Venua'ivina i na souyeni?” ¹¹Iesu yadi velutoli i tutuli i vo, We'e i vonaga mogitana, nagami Ilaitia i na mai Yaubada 'wainega, nani matatabuna i na 'ivenonogidi. ¹²"Siwe a na vonemi, Ilaitia tutulina 'akonadi i mai siwe tomotoga kebu i da 'isa'inanaiga, begaidi vitanidi nuanuadi i na veleniga mogitana i veleni. Wata bani'odi yau a vetomotogaotoga vita i na veleku.” ¹³"Nika tovetutuyamavo i nuani, i 'asetai Ioni Tobafitaiso faifaina i vonavona.

Kwamana yaiaina i ageiga, Iesu i 'ive'atumaia.

¹⁴Tutuyanina Iesu ma enavo i le'wai laube'uye 'aila'a 'waidie, tamu tomogo i mai ma yana ve'ililibu i 'odu Iesu mataneyeye. ¹⁵I voneni i vo,

¹ 16:27 Lom 2:6; Ve 22:12 ^m 17:2 2 Fit 1:16-18 ⁿ 17:5 Mad 3:17 ^o 17:10 Mal 4:5
^p 17:12 Mad 11:14 ^q 17:13 Luk 1:17

'Auvea, natuku iavetana 'u da 'isanuakalikalieni. Yaiaina i agei tutuya fuei i vevekadia i vavatu'oga wata i alala. Wata tutuya fuei i be'ube'u 'ai-'ala'alase wata ufeye. ¹⁶A mieni yamu tovetutuyamavo 'waidie siwe kebu 'adi fata i na 'ive'atumaiaa.” ¹⁷Iesu tomotoga i vonedi i vo, 'Omi tovekali. Awale Yaubada yana toketokena kebu 'wa da vetumaganeniga? Tutuya manamanawena taiadi ta miamia wata a totokemaigeke bwaikina siwe kebu 'wa da vetumaganeku mogitana. Kwamananina 'wa mieni ta na 'iseni.” ¹⁸Iesu yaiaina i voneni i 'awa'a'ia kwamana 'wainega nika i ve'atumai.

¹⁹Mulieta 'aise'avadie tovetutuyamavo Iesu i velutolieni i vo, Awale 'ima 'a vona yaiaina kebu i da 'awa'a'iaa?” ²⁰Iesu yadi vona i tutuli i vo, Fai bola yami vetumagana siaidi. A vona mogitana 'waimie, 'ai'edi yami vetumagana 'ana vebwaika bani'odi 'ayawana bilana, siaina siwe mulieta welavi bwaikina, 'ami fata 'wa da vona 'oya de'e 'waineye 'wa da vo, 'U tovoi 'u nago sino bei,” nika i da nago. De'e bani'odi yami vetumagana i na vevebwaikaga, nani matatabuna 'ami fata. [²¹'Ai'edi 'aiata 'ifwaidi nagedie 'wa na veve'udigana 'ani bega yami velu'ui Yaubada 'waineye i na vetoketoke, 'ami fata 'wa na vona yaiaina de'e bani'odi i na 'awa'a'idi, wata kebu tamu ava'ai 'wainega.”]

Iesu i veifufu-vaitugana yana wafa faifaina.

²²⁻²³Tutuyanina Iesu yana tovetutuyamavo i luvetubama 'awalawa Galili 'waineye Iesu i vonedi i vo, Yau a vetomotogaotoga sai'afoga i na 'aniveleneku tomotoga 'waidie, i na luvewafaku, siwe 'aiata 'ana vetonu 'waineye ma yawaiku Yaubada i na sivetovoiku.” Tovetutuyamavo i nogai, nuadi i vita bwaikina.

Vanuga 'eba velu'ui 'ana takesi.

²⁴Iesu ma yana tovetutuyamavo i maia 'atamana Kafaneomi, bei takesi vanuga 'eba velu'ui faifaina 'ana tolaugogona i maia Fita 'waineye i velutolieni i vo, Yamu Tove, takesi vanuga 'eba velu'ui faifaina, i yatoyato?” ²⁵Fita i vo, E'e, i yatoyato.”

Mulieta Fita i luku vanuge, bola kebu i da veifufuga, Iesu i vona-matayo'o i vo, Saimoni, 'u da nuani, fwayafwaya 'ana toveimea bwaikidi, nuanuadi egavo i na takesi? Taunidi natudiavo 'alo mali tomotoga?” ²⁶Fita i vo, Mali tomotoga i na takesi.” Iesu i voneni i vo, Vetuma yau fai Yaubada Natuna, yana vanuga 'eba velu'ui faifaina a na takesiga, kebu 'atumainaga. ²⁷Siwe 'ai'edi takesinina yato a na bailaga, tolaugogonanidi a na 'ivebunumayagidi bega 'asa'aiana ta na yato. Nuanuaku 'u na nago lavuye, igananina nagami 'u na 'onaiga 'awanega mani 'u na 'ewai. Maninina 'omu wata yau yada yato 'ana fata bani'odi.”

r 17:20 Mak 11:23 s 17:22-23 Mad 16:21 t 17:24 Sou 30:13

Aitoi bwaikaotogina Yaubada mataneye.

18 ¹“Tutuyanina 'waineye tovetutuyamavo i nagoi Iesu 'waineye i velutolieni i vo, Aitoi bwaikaotogina Yaubada yana 'Eba Veimea nageneye?” ²⁻³“Iesu tamu kwamana i goleni i mai matadie i tovoi, mulieta Iesu i vonedi i vo, A vona mogitana 'waimie 'ai'edi nuanuami 'wa na luku Yaubada yana 'Eba Veimea 'waineye, i lubwainemi 'wa na nuavilami 'wa na nuaobu yavayavava bani'odi. We'e 'ai'edi kebu nuanuami, kebu tamu sai'afo 'ami fata 'wa na lukuga. ⁴“Aitoi i na nuaobuga kwamana de'e bani'odi taunina bwaikaotogina Yaubada yana 'Eba Veimea nageneye. ⁵“De'e kwamananina 'wa 'ise'iseniga, 'ai'edi aitoi ma yana nuakalikali tamu kwamana de'e bani'odi i na 'ivaiseni faifaiku, siwe 'asa'aiana yau i 'ivaiseku.

Vetalaimimila 'wainega sakona i na souyeni

⁶'Ai'edi aitoi i na vetumagana 'waikuye de'e kwakwama bani'odi, siwe tamu tomotoga i na vetalaimimili i na sakonaga, bola tomotoganina veviga bwaikaotogina i na veluagai Yaubada 'wainega. Siwe nagami tomotoganina kebu i da vetalaimimilaga, bei tomotoga 'ifwaidi kileu vitana i da yogona-matayo'oi 'odoneye i da taweni malaveseye, veviga siaina i da veluagai. I da wafa-matayo'oga i lubwaineni, nika kebu i da vetalaimimilaga wata kebu veviga bwaikaotogina i da veluagai Yaubada 'wainega. ⁷Tomia fwayafwaya nuakalikalimi, fai 'awasasamie nani fueidi 'waidiega tomotoga i be'ube'u i sakosakona. 'Eba be'unidi mogitana i na sousouyedi 'waimie, siwe 'ai'edi aitoi tamu tomotoga i na kiavebe'uya bega i na sakonaga, nuakalikalina fai veviga bwaikina i na veluagai.

⁸'Ai'edi nimamu 'alo 'agemu sai'afoga i da kiavebe'umu 'u da sakona, 'u boboi 'u taweni. 'U na boboiga veviga sai'afo nika kebu 'u na sakonaga, mulieta 'amu fata 'aitamoganega 'u na luku abame. We'e nimamu 'alo 'agemu 'ailugana 'waidiega 'u na sakosakonaga, mulieta 'u na wafa 'u na luku 'ai-'ala'alase, veviga bwaikaotogina 'u na veluagai. ⁹'Ai'edi matamu vi'aina sai'afoga i da kiavebe'umu 'u da sakona, 'u kiamwanuya 'u taweni. 'U na kiamwanuyaga veviga sai'afo, nika kebu 'u na sakonaga, mulieta 'amu fata 'aitamoganega 'u na luku abame. We'e 'ai'edi matamu 'ailugana 'waidiega 'u na sakosakonaga, mulieta 'u na wafa 'u na luku 'ai-'ala'alase, veviga bwaikaotogina 'u na veluagai.

Vona-awatabai 'aisaya sifi vuyovuyona faifaina.

¹⁰'Wa na 'isa'isa i na nunago kwakwama de'e bani'odi kebu 'wa na awaobuobuyediga. A vona mogitana 'waimie yadi anelose abame tutuya matatabuna Yaubada mataneye i 'i'isave'avinidi.

[¹¹Yau a vetomotogaotoga a maiga, egavo Yaubada yana 'eda'eda i bavuyeni bani'odi i vuyo, a na 'ita'ita'iedi.] ¹²Wa da nuani. 'Ai'edi tamu tomogo ma yana 'aisaya sifi 100, we'e tamu i na vuyoga bani'odi i na munegi? Yana sifi 99 i na yatodi i na miamiani 'oya 'ifineye we'e i na nago sifinina i vuyoga i na lualeni. ¹³A vona mogitana 'waimie, tutuyanina i na veluagaiga yana sosoana bwaikaotogina sifinina faifaina, we'e yana sifi 99 kebu i da vuyoga, faifaiddi sai'afo. ¹⁴Wata bani'odi, Tamada abame kebu nuanuana tamu yaku kwamana i na vuyovuyo i na nunago vita i na veluagai.

Sakona 'ana kiavetonova faifaina.

¹⁵^a'Ai'edi iamu sakona i na 'idewai 'waimuye, 'u na nago 'waineye 'aise'avami yana sakonanina 'u na lu'ivona 'waineye. 'Ai'edi bonamu i na nogai i na ve'awamogitana siwe 'akonadi 'wa veiana. ¹⁶^aWe'e 'ai'edi bonamu kebu i na nogaiga, tomotoga 'adi 'ailuga 'alo 'adi 'aitonu 'u na nawedi matadie 'u na vewavawava 'u na sivetovetonovi. ¹⁷'Ai'edi taiadi kebu bonami i na nogaiga, 'u na sivemageseni tovetumaganavo matatabudi 'waidie. Mulieta 'ai'edi i na fa'ala-'afo'afoi 'wa na bailenimo fai taunina bani'odi tosakona.

¹⁸^bOmi yaku tovetutuyamavo a na vonemi, ava'ai 'wa na talabodeni fwayefwayeye, wata abame Yaubada i na talabodeni, ava'ai 'wa na tauyeni fwayefwayeye, wata abame Yaubada i na tauyeni.

¹⁹^cWata a na vonemi, de'e bei fwayefwayeye 'ai'edi 'ami 'ailuga yami nuania 'aitamoganege 'wa na velu'ui, Tamaku abame naninina nuanuami i na 'idewai. ²⁰'Ana fata i na 'idewai fai 'ai'edi tomotoga 'adi 'ailuga 'alo 'adi 'aitonu i na va'auta 'aku wagavayega, yau taiadi lilivadie.

Nuatavuna faifaina.

²¹Mulieta Fita i mai Iesu 'waineye i velutolieni i vo, 'Auvea, 'ai'edi iaku tutuya fueidi sauluva sakoina i na 'idewaiga 'waikuye, 'aivia yaku nuatavuna? Yana sakonanidi a na nuatavunidiga tutuya 7 'alo bani'odi?" ²²Iesu i vo, Kebu 7-'ava, bei 'u na nuuatavuna. ²³Wa na nuuatavunaga fai tomotoga Yaubada yana 'Aila'a nageneye side bani'odi. Tamu toveimea bwaikina, basenadi yana tofolovavo nani 'ifwaidi i 'ewa-maimaigidi 'wainega, nuanuana i na tutulidi. ²⁴Tofolovanidi 'aitamogana 'aitamogana i vonevonedidi i mimai 'waineye we'e tamu i luku 'waineye i na tutula basenadi i 'ewai mani bwaikaotogina bani'odi 10 milioni Kina. ²⁵Tofolovanina kebu 'ana fata i na tutuli bega yana toveimea i vona i vo, Tomogo de'e taunina, yana vavine, natunavo wata yana kukua

y 18:11 Luk 19:10 z 18:15 Luk 17:3; Gal 6:1 a 18:16 Ion 8:17 b 18:18 Ion 20:23
c 18:19 Ion 15:7

matatabuna 'wa na nawedi tamu tomotoga i na kimwanedi yana tofolova-maimaiga, tutulidi 'wa na miedi bega maninina i 'ewaiga i na taobwai. ²⁶Tofolovanina ma yana ve'ililibu i be'u yana toveimea mataneyeye i voneni i vo, 'U ve'wada 'u na lulukamata, nani matatabuna bola a na tutulidi.” ²⁷Yana toveimea i nuavita faifaina bega i vo, 'Asa'aiana a nuatavuni, 'u nago, kebu 'u na tutulaga.”

²⁸Tofolovanina i sousouyeni nika tamu iana tofolova i veluagai, kumanina basenadi mani sai'afo siaina bani'odi 100 Kina i veleni. 'Odoneye i 'abi sai'afoga i da kiami'ai i voneni i vo, Maninina basenadi a velemuga, 'asiauotoga 'u na tutuli.” ²⁹Iana i be'u mataneyeye i voneni i vo, 'U ve'wada 'u na lulukamata, bola a na tutuli.” ³⁰Siwe kebu bonana i da nogaiga, nuanuana i na tutuli bega yana veimea 'wainega i silukuveni vanuga 'eba yogona 'waineyeye, bei i na miamia i na tutulina i na souyeni.” ³¹Ifwaidi tofolovavo iadi yana sauluva i 'iseni nuadi i vita bwaikina, bega i nagoi yadi toveimea 'waineyeye i lu'ivona.

³²Mulieta yana tofolova, kumanina igodi i da tutula 10 milioni Kina i goleni i mai i voneni i vo, 'Omu tofolova sakoimu, 'u velu'ui-nuakalikali 'waikuyeye maninina igodi 'u da tutuliga a nuatavuni. ³³I lubwainemu 'omu wata iamua 'u da 'isanuakalikaliyeni, yau bani'odi a 'isanuakalikaliemu.” ³⁴Yana toveimea ma yana nuasako i silukuveni vanuga 'eba yogona 'waineyeye, bei vematavuloga i na veluagai 'ai'edi i na tutulagana i na souyeni.”

³⁵^dVona-awatabainina i 'a'avana Iesu i vo, 'Ai'edi tofolovanina sakoina 'wa na salaiga, kebu ma yami nuakalikali emiavo yadi sakona 'wa na nunuatavunidiga, wata bani'odi Tamaku abame 'aitamogana 'aitamogana vita bwaikina i na velemi.”

Iesu i ve sa'ila faifaina.

19 ¹Iesu yana ve nuatavuna faifaina i 'a'ava, 'awalawa Galili i 'iaweni, i vilai i nago Ufa Iolidani i damani i nago 'awalawa Iudia. ²'Aila'a bwaikina i yogo'waili i nagoi, bei toviga i 'ive'atumaidi.

³Me Diu totafalolo Falisi nuanuadi tomotoga i na nuasako Iesu 'waineyeye begaidi 'aila'a matadie i velutolieni i vo, 'Ana fata tamu tomogo yana vavine i na vesa'ila-maimaigidi, kebu tamu lamunaga?” ⁴^eIesu yadi velutoli i tutuli i vo, Yaubada yana Buki nageneyeye de'e vonanina nagi faifaina 'wa da vo kebu 'wa da lu'iawawaiga. I vo,

Tutuya 'eba velamu 'waineyeye Yaubada tomotoga i 'idewadi, Iavetana wata vevinena.”

⁵^fWata Yaubada i vo,

Faifainanina 'ai'edi tomogo i na nagiga, 'akonadi i 'awa'idia tamana wata inana 'waidiega, yana vavine taiadi i luvetubama.

^d 18:35 Mad 6:15; Efe 4:32; Kol 3:13 ^e 19:4 Nag 1:27 ^f 19:5 Nag 2:24; Efe 5:31

'Adi 'ailuga siwe 'wa da vo tomotoga 'aitamogana.”

⁶Kebu 'ana fata ta na vo, 'Adi 'ailuga,” fai taiadi i luvetubama ta na vo, 'Aitamogana.” Bega Yaubada 'akonadi i luvetubamidiga, kebu 'ana fata mali tomotoga 'alo taunidi i na vemia'idiedi.” ⁷⁸Falisi Iesu i velutolieni i vo, Vetuma ava'ai faifaina basenadiotoga Mosese i tauyeda tamu lubulubu 'waineye sa'ila vonana ta na kilumi vavine ta na veledi ta na vo, 'Omi 'akonadi 'wa 'a'ava 'waikuyega?” ⁸Iesu i vonedi i vo, Mosese i tauyemiga fai sauluva 'atumaina 'wa baila, we'e tutuya 'eba velamu 'wainega i maiga 'asiau Yaubada kebu bani'odi i da voneyediga. ⁹“Siwe a na vonemi, 'ai'edi aitoi yana vavine kebu sauluva sakoina i da 'idewaiga siwe i na vesa'ilidi mulieta tamu vavine i na nagidi 'akonadi i sakona Yaubada mataneye.”

¹⁰“Yana tovetutuyamavo i voneni i vo, 'Ai'edi sakona 'aisena faifaina Yaubada i tauyeni sa'ila, vetuma nagi 'asa'aiana.” ¹¹Iesu i vo, Tomotoga matatabudi kebu 'adi fata taunidi i na tauyedi venina 'waineye, egavo Yaubada i na 'ivaisedi 'aisedi 'adi fata. ¹²Egavo kebu i na nagiga yadi lamu tulina tulina. Side bani'odi, tomotoga 'ifwaidi fai i vetubusakosako, 'ifwaidi fai daba i 'ewai bega kebu 'adi fata 'waidiega kwakwama i na souyedi, we'e 'ifwaidi nuanuadi Yaubada i na veimeyedi wata 'aisena 'waineye i na folofolova bega kebu i da nagiga. Egavo yaku vonanina i nuani 'waidie 'atumaina, i lubwainedi yaku vonanina i na vematayakeyakeni.”

Iesu nuanuana yavayavava.

¹³Tomotoga 'ifwaidi natudiavo i miedi nuanuadi Iesu i na 'abitonovidi i na velu'ui faifaidi, siwe yana tovetutuyamavo i talabodebodedi. ¹⁴“Nika Iesu i vo, Kwakwama 'wa bailedi i na maia 'waikuye, fai egavo taunidi tonuaobu yavayavava de'e bani'odi 'adi fata taunidi i na tauyedi bega Yaubada i na veimeyedi yana 'Aila'a nageneye.” ¹⁵Nimana i yatoi 'aitamogana 'aitamogana 'waidie, i velu'ui mulieta i tauya.

Tamu tubuvauvau 'ai'aiwabuna.

¹⁶Tamu tutuya tamu tomogo i mai Iesu 'waineye i velutolieni i vo, Tove, nuanuaku 'u na voneku bega tamu nani 'atumaina a na 'idewai bega mia 'atumaina wata miamia-vagaina a na veluagai.” ¹⁷Iesu yana velutoli i tutuli i vo, Ava'ai faifaina 'u velutolieku nani 'atumaina faifaina. Tomotoga tamu, 'aiseotogina 'atumaina. 'Ai'edi nuanuamu mia 'atumaina wata miamia-vagaina 'u na velugaiga, tomotoganina, taunina Yaubada, yana veimea 'u na vevematayakeyakedi.” ¹⁸⁻¹⁹“Tubuvauvaunina i vo, Ava'ai veimeaga?”

g 19:7 VeL 24:1-4 h 19:9 Mad 5:32 i 19:10 1 Kol 7:1-2,7-9 j 19:14 Mad 18:2-3
k 19:18-19 Sou 20:12-16; Lom 13:9

Bega Iesu i voneni i vo, Kebu 'u na luvewafaga, kebu tamu aitoi yana vavine 'u na luobuyediga, kebu 'u na vainagoga, kebu 'u na vekali tamu tomogo yana sauluva faifaina, tamamu wata inamu 'u na ve'ililibuyedi, we'e iamu 'u na nuakalikali, taunimu 'amu nuakalikali bani'odi."

²⁰Tubuvauvaunina Iesu yana vona i tutuli i vo, Veimeanidi 'u voneyediga matatabuna a vematayakeyakedi. Siwe wata ava'ai nuanuamu a na 'idewai?" ²¹Iesu i voneni i vo, 'Ai'edi nuanuamu yamu sauluva 'atumai'avana 'u na vilamu 'u na nago, yamu kukua wata nani matatabuna 'waimuye i 'eno'enoviga 'u na vekimwaneyedi, tutulidi 'u na 'ewadi, bega egavo i vewekowekomaga 'u na 'ivaisedi. 'U na veledina, nika 'omu 'akonadi 'u ve'ai'aiwabu abame, mulieta 'u na mai 'u na vetutuyameku." ²²Tubuvauvaunina Iesu yana vona i nogai nuana i vita i tauya fai yana kukua bwaikina nuana i loloi.

²³Tomogonina i tauya i nunago, Iesu yana tovetutuyamavo i vonedi i vo, A vona mogitana 'waimie, 'ai'aiwabudi yadi luku Yaubada yana 'Eba Veimea 'waineye vitana. ²⁴Wata a na vonemi, bawe yadi luku aima mataneamo vitana, we'e 'ai'aiwabudi yadi luku abame, 'waidie vitaotogina." ²⁵Yana tovetutuyamavo i nogaiga, nuadi i voganidi i velutolieni i vo, Vetuma aitoi 'ana fata Yaubada i na 'ita'ita'ieni bega mia 'atumaina wata miamia-vagaina i na veluagai?" ²⁶Iesu i 'isanago 'waidie i vo, Tomotoga tauni'avadi kebu 'adi fata 'ita'ita'i i na veluagaiga, we'e Yaubada 'waineye nani matatabuna 'ana fata."

²⁷^mNika Fita i vona i vo, Maide 'ima nani matatabuna 'a bailedi 'a maia 'a vetutuyamemu. 'Awaie ava'ai 'a na veluagai Yaubada 'wainega?" ²⁸"Iesu i vonedi i vo, A vona mogitana 'waimie, 'awaie Yaubada nani matatabuna i na 'ive'ivaudi, tutuyanina 'waineye yau a vetomotogaotoga ma yaku veimea abame a na miabui 'eba miabui mataududulina 'waineye. We'e 'omi yaku tovetutuyamavo 12 veimea a na velema bega waumanidi 12 tubuda bwaikina Isileli 'wainega i souyediga matamie i na vonayavuga, 'wa na veimeyedi. ²⁹Egavo yadi vanuga i 'iawedi faifaiku, 'alo tamadiavo, inadiavo, novudiavo, ediavo, natudiavo, 'alo yadi tanoga i 'iawedi faifaiku, 'awaie naninidi 'adi tutula bwaikaotogina i na veluagadi ma 'adi 'imoso'i, bani'odi 100 nani 'aitamogana i baileniga faifaina, wata mia 'atumaina miamia-vagaina taiadi i na veluagai. ³⁰We'e tomotoga fuedi 'asiau i kumetaga, 'awaie i na vemuli, we'e fuedi 'asiau i vemuliga, ma'itufa i na kumeta."

Vona-awatabai tofolova 'adi tutula faifaina.

20 ¹Wata vona-awatabaiega Iesu i vonedi i vo, Yaubada yana 'Aila'a 'adi tutula 'ana 'ewa side bani'odi. Tamu tomogo ma

¹ 19:21 Mad 6:20; Fol 2:45; 19:21-22 Mad 13:22 ^m 19:27 Mad 4:18-20 ⁿ 19:28 Ve 3:21

yana bakula 'awa'awaiogose i tovoi i nago i lauuala yana tofolova i na 'ewadi. ²Tomotoga 'ifwaidi i veluagadi i vonedi i nogaya wata 'adi tutula i lu'ivona-vagaseni 'waidie i vo, 'Aiata 'aitamogana 'ami tutula lubulubu 'aitamogana," mulieta i vetunedu i nagoi i na folova. ³⁻⁴Inala i vagalakama wata i nago 'atamanafouye tomotoga 'ifwaidi i veluagadi i mia-maimaiga bega i vonedi i vo, 'Omi wata 'wa na nagoi 'wa na folova yaku bakule, i na 'a'ava a na tutulimi tutula mogitana bani'odi. ⁵I nagoi i folofolova, mulieta 'aiata 'ana utukamwane wata lavilavie 'ifwaidi i veluagadi i 'ewadi. ⁶Lavilaviogose wata i nago 'atamanafouye, 'ifwaidi i veluagadi i tovi-maimaiga bega i velutoliedi i vo, Awale 'wa mia-maimaiga, kebu tamu ava'ai 'asiau 'wa da 'i'idewaiga?" ⁷Tomotoganidi i vo, Tamu aitoi i da 'ewamana, 'waineye 'a da folova, fai kebu, bega 'a miamiani." Tonibakula i vonedi i vo, A nuani 'omi wata 'wa na nagoi 'wa na folova yaku bakule."

⁸'Akonadi sai'afoga i na dudubali, tonibakula tofolova 'adi to'isave'avina i voneni i vo, Tofolova 'u na goledi 'u na tutulidi, nagami egavo i vemuli 'u na tutulidi, i na nagoga egavo nagami a 'ewadiga i na vemuli." ⁹Tofolovanidi lavilaviogose i 'ewadiga 'adi tutula i veledi, lubulubu 'aitamogana. ¹⁰We'e kumanidiavo 'awa'awaiogose i 'ewadiga i 'iseni yadi nuanua i vo, Tovemuli i folova tutuya 'ale'usana siwe lubulubu 'aitamogana i 'ewai, we'e 'ima 'aiata matatabuna 'a folovaga 'ako bwaikina 'a na 'ewai." Siwe wata i tutulidi lubulubu 'aitamogana 'aitamogana. ¹¹⁻¹²'Adi tutula i 'ewa'a'avana, i vebonavoluvolu tonibakula 'waineye i vo, Vevemulidi i folova 'awasasa 'aitamogana, we'e 'ima 'aiata matatabuna a folova inala bwaikina 'waineye, awale taiadi 'ama tutula i vesala?" ¹³Tonibakula tamu iadi i voneni i vo, Iaku, 'u ve'wada a na vonemu. Kebu a da vekaliemiga, 'asiau ta veifufuga 'u nuanuani a vo, Lubulubu 'aitamogana a na velemi," 'wa nogaya. ¹⁴'Akonadi a velemiga 'asa'aiana 'wa 'ewadi 'wa nagoi yami vanuge. Nuanuaku vevemulidi 'adi tutula wata 'omi 'ami tutula taiadi i na vesala. ¹⁵Yau tauniku yaku mani, yaku 'eba veimea. Kebu yaku nuakalikali mali tomotoga 'waidie faifaina 'wa na ve'unumagigi." ¹⁶Wata Iesu yana vona i luvaitugani i vo, Egavo 'asiau i vemuliga, 'awaie i na kumeta, we'e egavo 'asiau i kumetaga ma'itufa i na vemuli."

Iesu yana vona 'ana vetonu yana wafa faifaina.

¹⁷⁻¹⁸^oTutuyanina Iesu i nunago Ielusalema yana tovetutuyamavo 12 i vonedi taiadi tulidie i nagoi i vonedi i vo, A na vonemi, ta nunagoiga Ielusalema bei yau a vetomotogaotoga i na 'etogiluveku tovelomu 'adi to'edakumetavo wata ve'etoboda 'adi tovevo 'waidie i na veimea a

o 20:17-18 Mad 16:21, 17:22-23

na wafa. ¹⁹Mulieta i na 'aniveleneku mali tomotoga taunidi kebu Diu 'waidie, i na sidibidibieku, i na toke i na fitaliku wata i na tutufwaseku 'ai lagalagana 'waineye. 'Aiata 'ana vetonu 'waineye, Yaubada i na sivetovoiku.”

Iemesa ma taina Ioni inadi yadi velu'ui Iesu 'waineye.

²⁰Mulieta Sebedi yana vavine ma natudiavo i maia Iesu 'waineye, inadi ma yadi ve'ililibu i 'odu Iesu mataneye i velu'ui Iesu 'waineye natudiavo Iemesa wata Ioni faifaidi. ²¹Iesu i velutoliedi i vo, 'Ava'ai nuanuami?” Vavinenidi i vo, Tutuyanina 'u na ve-Kini nuanuama de'e natukwavonidi 'u na tauyedi tamu 'amu 'atagiega i na miabui, tamu 'amu wamayega i na miabui.” ²²Iesu i vonedi i vo, 'Omi kebu 'wa da vena'ivinaga 'wa vevelu'ui 'waikuye.” I 'a'avana, natudiavo 'waidie i vona-awatabai yana veviga wata yana wafa faifaidi i vo, Sai'afoga veviga 'ana vedi a na yemuyeni, we'e 'omi 'ami 'ailuga 'ami fata vedinina 'wa na yemuyeni?” Yana vona i tutuli i vo, E'e, 'ama fata.” ²³Iesu i vo, 'Wa vonaga mogitana, 'aku vediega 'wa na yemu, siwe miabui 'aku 'atagiega wata 'aku wamayega yau kebu a da veveimeyediga, 'eba miabuini egavo Tamaku i vena'ivinediga faifaidi.”

²⁴Tutuyanina ediavo tovetutuyamavo 'adi 10 Iemesa ma taina inadi yadi velu'ui i 'asetai, 'waidie i kamogala. ²⁵'Begaidi Iesu matatabudi i va'augidi i vonedi i vo, 'Akonadi 'wa 'asetai toveimea bwaikaotogidi wata to'edakumetavo yadi veimea toketokedi 'waidiega tomotoga i veveimeyedi. ²⁶We'e 'omi kebu bani'odi 'wa na munega. 'Ai'edi aitoi 'waimiega nuanuana i na vetomogo-bwaika, nagami i na vetofolova enavo 'waidie bani'odi tamu kwamana. ²⁷We'e 'ai'edi aitoi nuanuana i na veto'edakumeta 'waimie nagami i na vetofolova-maimaiga 'waimie. ²⁸'Yau a vetomotogaotoga 'wa na vetutuyameku. Yau a maiga, kebu a da vo, Tomotoga 'wa na foloveku,” we'e mogitana a mai a na vetofolova tomotoga faifaimi, wata yawaiku a na tauyeni tomotoga fuemi a na tuveobumi sakona 'waidiega.”

Tomatasako 'adi 'ailuga Iesu i 'ive'atumaiddi.

²⁹Iesu ma enavo 'atamana Ieliko 'wainega i tautauya, 'aila'a bwaikina mulineye i nagoi. ³⁰'We'e tomatasako 'adi 'ailuga 'edeye i miamiani nika i nogai i le'wa i nunago, bega i vegolegole i vo, 'Auvea, 'omu Yaubada 'ana Venua'ivina Kini Devida tubuna, 'u da 'isanuakalikaliema.” ³¹'Aila'a i nogai i yagaidi i vo, 'Wa ve'wada,” nika tomatasakonidi i toke i vegolegole i vo, 'Auvea, 'omu Yaubada 'ana Venua'ivina Kini

P 20:22 Mad 26:39 q 20:25-27 Luk 22:25-26 r 20:28 Luk 22:27; Fil 2:7
s 20:30 Mad 9:27

Devida tubuna, 'u da 'isanuakalikaliema.”³² Iesu i tovoi i goledi i maia i velutoliedi i vo, Ava'ai nuanuami a na 'idewai?”³³ I vo, 'Auvea, nuanuama matama 'u na siayegidi.”³⁴ Iesu i 'isanuakalikaliEDI matadi i 'abitonovidi, nika i 'aniayegidi Iesu mulineye i nagoi.

Iesu i luku Ielusalema.

21¹⁻² Iesu ma yana tovetutuyamavo i nunagoi Ielusalema i le'wai 'atamana Bedifegi, 'Oya Olive 'waineye. 'Atamananina kebu 'ani'iega Ielusalema 'wainega. Bei Iesu tovetutuyamavo 'adi 'ailuga i vonedi i na kumeta wata i vo, 'Atamana debanagomega 'waineye 'wa na nagoi, tutuyanina 'wa na sousouyemi 'aisaya doniki ma natudi 'wa na 'isedi tamu vanuga 'waineye i luifwedi i tovtovoi. 'Wa na yavudi 'wa na miedi 'waikuye. ³'Ai'edi tamu aitoi i na vo, Awale 'wa yavuyavudi,” side bani'odi 'wa na voneyedi 'wa na vo, 'Auvea nuanuana,” nika i na tauyedi.”⁴ Iesu nuanuana doniki ma natudi i na miedi 'waineye nika tamu Yaubada yana tolu'ivona yana vona-vagata 'ana mogitana i na souyeni. Basenadiotoga i kilumi Yaubada 'ana Venua'ivina faifaina i vo, ⁵'Ielusalema“ 'ana tomotoga 'wa na vonedi 'wa na vo, 'Akonadi yami Kini i viwai 'waimie, Taunina tonuaobu, doniki kwavuneye i laka, E'e, mogitana ma yana nuaobu doniki tubuvauvauna 'waineye i dodoga.”

⁶⁻⁷ Bega tovetutuyamavo 'adi 'ailuga i kumeta Iesu yana nuanua i 'idewai, donikinidi ma natudi i miedi 'adi kalekoyega kwavudie i yatodi bega Iesu i laka doniki tubuvauvauna kwavuneye. ⁸'Aila'a bwaikina ma yadi ve'ililibu yana 'eda i 'ivivigavuya 'adi kalekoyega wata welavi lukudiega. ⁹”Tokumeta wata tovemuli i vegolegole i vo,

Kaiwa, kaiwa,”

Yaubada 'ana Venua'ivina Kini Devida tubuna 'waineye ta na vekaiwa.

'Auvea 'ana wagavayega i mimai,

Wata ma yana nuakalikali i na vevesauluva 'atumaina 'waineye,

Bega Yaubada tabwaotogineye ta na subisubiai.”

¹⁰ Tutuyanina Iesu i luku Ielusalema fuedi i gagali i vo, Aitoi tomotogaga?”¹¹ Ediavo 'ifwaidi i vo, Taunina tamu Yaubada yana tolu'ivona 'ana wagava Iesu, Nasalediega 'awalawa Galili nageneye.

Iesu i luku vanuga 'eba velu'ui 'waineye.

¹² Iesu i luku vanuga 'eba velu'ui nageneye i 'isedi tokimwane wata tovekimwane matatabudi i sogiedi i obu, mani tulina tulina 'adi

† 21:5 Sek 9:9 u 21:5 'Ana mogitana Saioni, Ielusalema tamu 'ana wagava.

v 21:9 Same 118:26 w 21:9 'Ana mogitana Osana, me Diu bonadiega.

tosivedavedamana^x yadi talalia i tutuviladi we'e bunebune 'eba velomu faifaidi 'adi tovekimwane yadi 'eba miabui i tutufefeledi. ¹³¶I vonedi i vo, Basenadiotoga i kilumi Yaubada yana Buki 'waineye, Yaubada i vo, Yaku vanuga 'ana wagava vanuga 'eba velu'ui tomotoga faifaidi," We'e 'omi 'wa sivilai, tovainago yadi 'eba giva."

¹⁴I 'a'avana, mulieta tomatasako wata 'agedi sinunumidi i maia vanuga 'eba velu'ui nageneye, Iesu i 'ive'atumaidi. ¹⁵⁻¹⁶¶Tovelomu 'adi to'edakumetavo wata ve'etoboda 'adi tovevo 'eba nua'ewa toketokedi Iesu i 'i'idewadi i 'isedi, wata i nogai vanuga 'eba velu'ui nageneye yavayavava i vegolegole i vo, Yaubada 'ana Venua'ivina, Kini Devida tubuna ta na subiai." Naninidi i 'isedi wata i nogaidi begaidi ma yadi kamogala i velutolieni i vo, Yavayavavanidi bonadi 'u nogai?" Iesu i vo, E'e, mogitana a nogai. We'e 'omi Yaubada yana Buki nageneye vona de'e 'wa da vo kebu 'wa da lu'iawawaiga i vona Yaubada 'waineye i vo, Yavayavava tulaidi, wata mwedamwedaldidi 'u 'alaveleveledi, 'Waidiega 'amu subia 'u veveluagai."

¹⁷Iesu i vona'a'ava, i 'iawedi i nago 'atamana Bedani, bei i 'eno.

Iesu yana voneye 'ala'ai i bwavu-matayo'o.

¹⁸I 'atai Bedaniega i vilai i mimai Iesu i lase. ¹⁹'Ala'ai i 'iseni 'eda lilivaneye i vo 'ako, Ma vuagina," siwe i nago i 'iseni tolobwa'avana. Welavinina 'waineye i vona i vo, 'Omu 'asa'aiana, kebu wata 'u na vuavuaga," nika 'ala'ai i bwavu-matayo'o.

²⁰Tovetutuyamavo i 'iseni nuadi i voganidi i vo, Bani'odi i munega i bwavu-matayo'o?" ²¹"Iesu yadi velutoli i tutuli i vo, A vona mogitana 'waimie, 'ai'edi kebu ma yami venuanaluga 'wa na vetumaganamo, yau 'ala'ai 'waineye a 'idewaiga, 'omi wata bani'odi 'wa na 'idewai. Kebu de'e bani'odi 'aisena, siwe wata 'ami fata de'e 'Oya Olive 'wa na voneni 'wa na vo, 'U tovoi, 'u obu eyage," nika i na obu. ²²^b'Ai'edi ma yami vetumagana 'wa na vevelu'uiga, 'ana fata naninidi nuanuami 'wa na veluagadi."

I velutolieni Iesu yana veimea lamuna.

²³¶Iesu i maiga Ielusalema, i luku vanuga 'eba velu'ui nageneye, tomotoga 'waidie i ve. Tovelomu 'adi to'edakumetavo wata me Diu to'edakumetavo 'au'auveadi i maia Iesu i velutolieni i vo, Nuanuama 'a na 'asetai aitoi i vetunemu bega naninidi 'u 'i'idewadi 'alo aitoi veimea i velemu?" ²⁴Iesu i vo, Nuanuaku tamu velutoli a na velemi, 'ai'edi yaku velutoli 'wa na tutula-'atumaiga a na vonemi yau aitoi veimea i veleku

^x **21:12** Me Loma yadi mani kebu 'ana fata 'wainega i na 'anivelena-maima ga, bega i sisivedamana nuanuadi me Diu yadi mani. ^y **21:13** Ais 56:7 ^z **21:16** Same 8:2
^a **21:21** Luk 17:6 ^b **21:22** Mad 7:7; Ion 14:13-14 ^c **21:23** Ion 2:18

nani de'e a 'i'idewadi. ²⁵ 'Wa da nuani, Ioni Tobafitaiso aitoi veimea i veleni bega tomotoga i bafitaisodi? Yaubada 'alo tomotoga?"

To'edakumetanidi 'aise'avadi i veifufu i vo, Bani'odi ta na voneyedi? 'Ai'edi ta na vo, Yaubada veimea Ioni i veleni," 'ako i na vo, Vetuma awale kebu Ioni yana vona 'wa da vetumaganeni?" ²⁶ ^dWata 'ai'edi ta na vo, Tomotoga veimea Ioni i veleni," bola vita ta na veluagai 'aila'a 'waidiega fai i nuani Ioni taunina tamu Yaubada yana tolu'ivona." ²⁷ Begaidi Iesu yana velutoli i tutuli i vo, 'Ima kebu 'a da 'asetaigna aitoi veimea i veleni Ioni." Iesu i vonedi i vo, Yau wata kebu a na vonemiga aitoi veimea i veleku bega naninidi a 'i'idewadi."

**Tovematayakayaka yadi luku Yaubada yana
'Aila'a 'waineye 'ana vona-awatabai.**

²⁸ Wata to'edakumetanidi i vonedi i vo, 'Omi 'wa na nuani, tamu tomogo natunavo iavetadi 'adi 'ailuga. Tulaina i voneni i vo, Natuku, nuanuaku 'asiau bakule 'u na folova." ²⁹ Siwe natuna i vo, Yau a baila," mulieta i nuanua kebu'ega i nago i folova.

³⁰ Wata tamadi i nago natuna bwasiona i voneni i vo, 'Omu nuanuaku 'u na nago bakule 'u na folova. Natunanina i nogayeni i vo, 'Atumaina 'auvea, a na nago," siwe kebu i da nagoga.

³¹ Bega Iesu to'edakumetanidi i velutoliedi i vo, Aitoi mogitana tamadi yana nuanua i 'idewai?" Yana velutoli i tutuli i vo, Tulaina." Iesu i vonedi i vo, A vona mogitana 'waimie, takesi 'ana tolaugogona vivinagodi wata vevine toalagogona ma'itufa i lukuluku Yaubada yana 'Aila'a 'waineye we'e 'omi voke kebu. ³² "Tomotoganidi nagami tosakona siwe i nuaviladi kwamananina tulaina bani'odi, Tamada yana nuanua i 'idewadi, we'e 'omi kwamana bwasiona yana sauluva 'wa salai. Ioni Tobafitaiso i mai Yaubada yana 'eda'eda tonovidi i vemiga, 'wa nogayenimo siwe kebu 'wa da 'idewadi. Tomotoganidi yadi sauluva sakoidi ma yadi vetumagana i nuaviladi Yaubada yana nuanua i 'i'idewadi, we'e 'omi yadi nuavilana 'wa 'iseni siwe kebu 'wa da vo, 'A na nuavilama."

Tofolova sakoidi 'adi vona-awatabai.

³³ Wata to'edakumetanidi 'waidie Iesu i vona i vo, De'e tamu vona-awatabai. Tamu tomogo kalefa talagina i yatoi wata i kalieni. Vuagina 'ana 'eba vatanitani i 'idewai wata kileu i didigi, tabwaneye 'eba 'atu'ai i yogoni. Mulieta tomotoga 'ifwaidi nimadie i yatoi i na 'isave'avinini, i 'a'avana nika i tauya i nago 'ani'ie.

³⁴ Tutuyanina i kumaga, tonibakula 'ifwaidi yana tofolovavo i vonedi i nago yana bakula 'ana to'isave'avinavo 'waidiega vuaga 'ifwaidi i na

^d 21:26 Mad 21:46 ^e 21:32 Luk 7:29-30

miedi faifaina. ³⁵To'isave'avinanidi yana tofolova i 'ive'avinidi, tamu i nikeimo, tamu i nikei i wafa, wata tamu i lukileuya i wafa. ³⁶Mulieta tonibakulanina tofolovavo fueidi i vetunedi wata bani'odi i munegidi.

³⁷'Eba ve'a'avaotoga taunina natuna i vetunei i vona i vo, De'e natuku, i na ve'ililibuyeni." ³⁸Siwe tutuyanina to'isave'avinanidi i 'iseni i mimai 'aise'avadi i vo, Natunanina 'awaie de'e bakula i na veimeyeni, bega 'wa maia ta na luwewafai matatabuna ta na 'ewai." ³⁹'Bega i 'ive'avini i taweni i obu kalimulie, bei i luwewafai." ⁴⁰Mulieta Iesu me Diu to'edakumetavo i velutolied i vo, 'Wa da nuani, tutuyanina tonibakula i na maiga, to'isave'avinanidi bani'odi i na munegidi?" ⁴¹Yana velutoli i tutuli i vo, 'A nuani tosakonanidi i na nikedi i na wafa, mulieta tomotoga 'ifwaidi i na vonedi i na veto'isave'avina bega tutuyanina i na kumakumaga vuaga i na 'a'anivelenedi 'waineye."

⁴²⁻⁴³Wata Iesu i vonedi i vo, 'Omi me Diu yama to'edakumetavo, siwe yami veto'isave'avina Yaubada yana 'Aila'a 'waineye i na elomi mali tomotoga i na veledi. Taunidi i na veto'isave'avina Yaubada yana 'Aila'a 'waineye, yadi sauluva 'atumaidi bani'odi vuaga." Wata Iesu Yaubada yana Vona i sivemageseni tomotoga i vedumwe'ai'alieniga faifaina i vo, To'aiyogona folova tamu i 'iseni siwe i baileni, Folovanina taunina 'unututu.

Yada 'Auvea Yaubada folovanina i vetovoi-vaitugani, 'Ana 'isa 'waideye 'eba nua'ewa."

[⁴⁴Egavo i na tayaidi i na be'u folovanina tabwaneye i na tudabedabedi, wata 'ai'edi folovanina i na 'anifoia tomotoga tabwadie i na tukudakudadi i na vefwayafwaya."]

⁴⁵Tovelomu 'adi to'edakumetavo wata Diu totafalolo Falisi Iesu yana vona i nogai i 'asetai 'adi vona-awatabai, taunidi bani'odi to'aiyogonanidi wata to'isave'avinavo sakoidi. ⁴⁶Igodi nuanuadi i da 'ive'avini siwe tomotoga i kololoyedi fai i vo, Taunina tamu Yaubada yana tolu'ivona."

Vona-awatabai taunidi Yaubada i tayegidiga faifaiddi.

22 ¹⁻²Wata Iesu i ve tomotoga 'waidie vona-awatabaiega i vo, Tomotoga yadi luku Yaubada yana 'Aila'a 'waineye side bani'odi. Tamu toveimea bwaikina natuna iavetana yana nagi 'ana sakali i 'idewai. ³I 'idewadewa i 'a'avana yana tofolovavo i vonedi i vo, 'Wa na nagoi tomotoganidi a tayegidiga, 'wa na vonedi i na maia." I nagoi i vonevonediga nika i baila. ⁴Mulieta toveimeanina yana tofolovavo 'ifwaidi i vonedi i vo, Tomotoganidi a vonedi i bailaga, wata 'wa na vonedi 'wa na vo, Bulumakau veve'anidi wata 'ifwaidi 'aisaya 'akonadi i lalamidi wata nani matatabuna i 'idewadi i lulukamata. 'Wa na maia

sakalinina 'waineye.”⁵⁻⁶ Siwe wata i baila i nagoi taunidi yadi nuanua 'waidie. Tamu i nago yana bakule, tamu i nago yana sitoa 'waineye, we'e 'ifwaidi toveimea yana tofолоvavo i 'ive'avinidi i nikedi i wafa. ⁷Toveimeanina vala i nogai i nuasako bwaikina, bega yana tolugaviavo i vonedi i nagoi to'ainikenidi i luvevafadi wata yadi 'atamana i kabuni.

⁸I 'a'avana toveimeanina yana tofолоvavo i goleva'augidi i vonedi i vo, 'Ani'ani 'akonadi a 'idewadewa i lulukamata, siwe tomotoganidi a vonediga i baila, taunidi yadi nuanua i ve'etobodedi. ⁹Tutuya de'e 'wa na nagoiga 'atamana bwaikina 'waineye bei egavo 'wa na veluagadiga 'wa na vonedi i na maia yaku sakali 'waineye i na 'ani.” ¹⁰Bega tofолоvavo i nagoi 'atamane tomotoga fueidi i veluagadi, yadi sauluva 'atumaidi 'alo sakoidi matatabudi i vonedi i maia bega toveimeanina yana vanuga bwaikina i veadagi.

¹¹⁻¹²Tomotoganidi i lukulukuga vanuge, nagi 'ana kaleko i veleveledi bega i vavaigavu, mulieta toveimeanina i mai i na 'isedi. Tamu tomogo i 'iseni, nagi 'ana kaleko kebu i da vigavuyeni bega i velutolieni i vo, Iaku, 'omu kebu nagi 'ana kaleko 'u da vigavuyeni, awale 'u lukuma?” Tomogonina kebu tamu ava'ai i da voneyeniga.

¹³^hBega toveimeanina yana tofолоvavo i vonedi i vo, Nimana wata 'agena 'wa yogonidi 'wa taweni i na obu dudubale, bei i na 'we'we'wela wata maigina i na yuyuyuya fai veviga bwaikina.”

¹⁴Iesu yana vona i ve'a'avai i vo, Yaubada tomotoga fueidi i goledi, nagediega 'adi 'aivia bani'odi i venuma'ivinedi we'e fueidi i baila.”

Takesi 'ana yato faifaina Iesu i velutolieni.

¹⁵Totafalolo Falisi Iesu yana vona i nogai bega i nagoi 'aise'avadi i veifufu, nuanuadi i na velutolieni bonana i na nogai 'ai'edi i na vekali 'adi fata i na 'ive'avini. ¹⁶Bega yadi tomotoga wata 'ifwaidi Elodi yana tomotoga i vetunedi i maia Iesu 'waineye i velutoli i vo, Tove, yamu sauluva tonovidi, kebu 'u da vevekaliga. 'A 'asetamu tomotoga toketokedi kebu 'u da kololoyediga 'u lulumatanidi, we'e tomotoga sakoidi kebu 'u da vivieyediga, siwe 'u veve mogitana Yaubada yana nuanua tomotoga 'waimeye. ¹⁷'U da nuani, i lubwaineda 'ida me Diu ta na takesi Loma yadi toveimea bwaikina Sisa 'waineye 'alo kebu? Nuanuama 'a na 'asetai.”

¹⁸Iesu yadi nuanua sakoina i 'asetai begaidi i vonedi i vo, 'Omi tovekali, awale igodi 'wa sisiloloku. ¹⁹⁻²⁰Maninina 'wainega ta yatoyato takesi, 'wa na mieni ta na 'iseni.” Maninina i mieni i 'iseni i velutoliedi i vo, De'e mani 'waineye, aitoi 'anununa wata 'ana wagava?” ²¹'I vo, Sisa.” Bega Iesu i vonedi i vo, Vetuma 'ai'edi ava'ai Sisa faifaina, 'wa na 'aniveleneni 'waineye, we'e ava'ai Yaubada faifaina, wata 'wa na

^h 22:13 Luk 13:28 ⁱ 22:21 Lom 13:7

'aniveleneni 'waineye.” ²² Iesu yana vona i nogai, nuadi i voganidi 'asa'aiana i 'iawenimo.

Yawasa-vaitugana 'ana velutoli.

²³ ^j 'Aiatanina 'waineye, 'ifwaidi Diu totafalolo 'adi wagava Sadusi i maia Iesu 'waineye. Taunidi tovana igodina tomotoga kebu i na yawasa-vaitugana. ²⁴ ^k Tomotoganidi Iesu i velutolieni i vo, Tove, basenadiotoga Mosese yada veimea i kilumi i vo, 'Ai'edi tamu tomogo i na wafaga siwe kebu natunavoga, 'wabulina taina i na nagidi bega kwakwama i na vetubugidi tatana 'ana wagava wata 'ana wauma faifaidi.” ²⁵ We'e 'ima basenadi yama 'atamana 'waineye tamu tomogo ma tainavo 'adi 'aila'a 7, tulaiotogina i nagi kebu tamu natunaga i wafa. 'Wabula yadi bwa i nagia. ²⁶ Wata i wafa, 'adi vetonu yadi bwa i nagidi, i nagoga taidiavo matatabudi 'wabulanidi taiadi i nagi. ²⁷ Mulieta 'eba ve'a'ava 'waineye vavine yawaidi i 'a'ava. ²⁸ 'Omi 'wa vonaga 'awaie towafa matatabudi i na yawasa-vaitugana, 'aiatanina 'waineye aitoi mogitana yana vavine fai matatabudi taiadi i nagi?”

²⁹ Iesu yadi velutoli i tutuli i vo, 'Omi 'wa vekali mogitana fai Yaubada yana Buki wata yana toketokena 'wa bavuyedi. ³⁰ Tutuyanina towafa i na yawasa-vaitugana, yadi sauluva bani'odi anelose, nagi kebu. ³¹⁻³² ^l 'Omi yami vona 'ana nogaya 'wa vo, Towafa kebu i na tovoi-vaitugana,” siwe a na vonemi. 'Ai'edi Mosese 'ana kilukiluma 'wa da lu'iawawa-dewai 'wa da 'iseni Yaubada i vonavona 'waimie yawasa-vaitugana faifaina i vo, Yau Ebelamo, Aisake, wata Iakobo yadi Yaubada.” De'e bani'odi Yaubada i voneyediga fai tomotoganidi basenadiotoga i wafa siwe 'asiau ma yawaidi taiadi i miamiani. Begaidi ta na 'asetai egavo 'akonadi i wafa 'asiau ma yawaidi i miamiani, kebu tamu aitoi wafawafanaga Yaubada mataneye.” ³³ Tutuyanina 'aila'a Iesu yana ve i nogai nuadi i voganidi.

Veimea bwaikaotogina.

³⁴⁻³⁵ Totafalolo Sadusi yadi velutoli Iesu i tutula-'atumaia bega kebu nuanuadi wata i na veifufu. Tutuyanina totafalolo Falisi i nogai, i va'auta iadi tamu i vena'ivinene, taunina ve'etoboda 'adi tove, i vetunei Iesu 'waineye. Nuanuadi i na velutolieni bonana i na nogai 'ai'edi i na vekali 'adi fata i na 'ive'avini. ³⁶ I velutolieni i vo, Tove, veimeanidi Mosese 'wainega i maiga, ava'ai veimeaga bwaikaotogina?” ³⁷ ^m Yana velutoli Iesu i tutuli i vo, 'Auvea yami Yaubada 'wa na nuakalikalieni mogitana nuamiega, 'anu'anunumiega, wata yami nuania 'waidiega.” ³⁸ 'Asa'aiana veimeanina bwaikaotogina wata kumekumetana. ³⁹ ⁿ We'e 'ana veluga

j 22:23 Fol 23:8 k 22:24 VeL 25:5 l 22:32 Sou 3:6 m 22:37 VeL 6:5
n 22:39-40 Vei 19:18; Lom 13:9-10; Gal 5:14

wata bwaikaotogina, emiavo 'wa na nuakalikaliEDI taunimi 'ami nuakalikali bani'odi. ⁴⁰Veimea matatabuna i maiga Mosese 'wainega, wata Yaubada yana tolu'ivonavo yadi vona matatabuna, lamudi side veimeanidi 'ailuga."

Velutoli Yaubada 'ana Venua'ivina faifaina.

⁴¹⁻⁴²Mulieta totafalolo Falisi i maia Iesu 'waineye i velutoliedi i vo, 'Omi 'wa da nuaniga, Keliso kumanina Yaubada 'ana Venua'ivina tubuna aitoi?" Yana velutoli i tutuli i vo, Kini Devida." ⁴³Iesu i vo, Tubunamona siwe awale 'Anu'anunu 'Atumaina Devida i tolivetovoni bega i ve'awa-Toveimea 'waineye? Basenadiotoga i vo,

⁴⁴°Yaubada i vona 'aku Toveimea 'waineye, i vo,

Veimea a velemuga bega 'u na miabui 'aku 'atagiega,

I na nagoga 'amu gaviavo a na leodi bega 'u na veveimeyedi."

⁴⁵Keliso mogitana Devida 'ana wauma 'wainega i souyeni, siwe i vebwaika-'iaweni Devida, faifainanina Devida i ve'awa-Toveimea Keliso 'waineye." ⁴⁶Kebu tamu aitoi 'ana fata Iesu yana vona i na tutuli, i ve'wadamo, wata 'awaie kebu i na vevelutolieniga fai i kololoyeni.

Iesu i matakia ve'etoboda 'adi tove wata Falisi faifaidi.

23 ¹Mulieta Iesu i veifufu 'aila'a wata yana tovetutuyamavo 'waidie. ²⁻³I vo, Ve'etoboda 'adi tovevo wata totafalolo Falisi veimeanidi i maiga Mosese 'wainega 'adi tokiavemageta. Fai taunidi Mosese tutulina bonadi matatabuna 'wa na nogaidi wata 'wa na vevematayakayaka, siwe yadi sauluva kebu 'wa na vetutuyamediga fai nani fuedi i tatalabodedi siwe wata i 'i'idewadi. ⁴Yadi ve wata ve'etoboda vitadi, 'wa da vo venuana vitadi i da veve'ewami, siwe kebu tamu sai'afu i da 'ivaisemi bega veimeanidi 'wa na 'idewadi.

⁵Nani fuedi i 'i'idewadi tomotoga matadie, nuanuadi i na 'ise'isedi 'adi subia faifaina. Tamu veimea i ve'ililibuyeniga side. Yaubada yana Vona 'ifwaidi i kilukilumidi i dodogidi didiwaka 'waidie, debadie wata nimadie i yogoyogoned i yabeyabedi. Nuanuadi didiwaka bwaikidi bega fuedi i na 'ise'isedi. Wata 'adi kaleko i lulumanamanawedi velu'ui faifaina nuanuadi tomotoga i na subisubiadi. ⁶Sakali 'waidie nuanuadi i na mimiabui ma 'adi wagava taiadi, wata me Diu yada 'eba miava'auta 'waidie i mimiabui to'edakumetavo taiadi. ⁷Yadi nuanua bwaikina tomotoga ma yadi ve'ililibu i na vevekaiwa 'waidie 'atamanafouye, wata i na ve'awa-tove 'waidie.

⁸Kebu i da lubwainemi tomotoga i na ve'awa-tove 'waimie fai ma fuemie Yaubada natunavo wata yami 'Auvea 'aitamogana. ⁹Tamami

° 22:44 Same 110:1; Fol 2:34-35 P 23:5 Mad 6:1; Sou 13:9

'aiseotogina abame i miamia, begaidi kebu tamu aitoi 'ana wagava 'wa na silakai 'waineye 'wa na vonavona 'wa na vo, Tamada.”¹⁰ Wata kebu i da lubwainemi tamu aitoi ma yana subia i na golegolemi i na vo, Tove,” fai yami Tove 'aitamogana Keliso, kumaniku Yaubada 'ana Venua'livina.¹¹ Aitoi 'ana wagava bwaikina 'waimiega, i lubwaineni ma yana nuaobu i na vetofolova 'waimie.¹² Aitoi taunina i na awa'ai'aiaga, 'awaie Yaubada i na kiaobuyeni, we'e aitoi taunina tonuaobu 'awaie Yaubada i na kialakai.

Me Diu to'edakumetavo Iesu i awavesakoyedi.

¹³ Omi ve'etoboda 'adi tovevo wata totafalolo Falisi, nuakalikalimi. 'Omi tovekali. Egavo nuanuadi i na luku Yaubada yana 'Aila'a 'waineye bega i na veveimeyedi, siwe 'omi yadi 'eda 'wa ve'etobodai. 'Omi kebu nuanuami 'wa na lukuga 'wa baila, we'e egavo nuanuadi i na luku siwe 'wa tovibodedi. [¹⁴ Omi ve'etoboda 'adi tovevo wata totafalolo Falisi, nuakalikalimi. 'Omi tovekali. Vekaliiega 'wabu'wabulavo yadi vanuga 'wa eloelodi wata 'wa vevelu'ui manamanawedi 'ami subia faifaina. Yami sauluvanidi sakoidi faifaiddi vematavuloga bwaikaotogina 'wa na veluagai.]

¹⁵ Omi ve'etoboda 'adi tovevo wata totafalolo Falisi, nuakalikalimi. 'Omi tovekali. Fwayefwayeamo wata eyageamo 'wa nunagoi 'ani'ie bega 'ai'edi tamu tomotoga 'wa na veluagai 'wa 'ewa'ewai i na vetovetutuyama 'waimie wata yami sauluva i na vetutuyamedi. 'Wa veve 'waineye mulieta yana sakona 'omi yami sakona i na vebwaika-'iawedi. Ma fuemie vita 'wa na veluagai 'ai-'ala'alase, siwe yami tovetutuyamavo 'adi vita 'wa da vo i da luvelugai.”

¹⁶ Wata Iesu to'edakumetanidi i awavesakoyedi fai nani 'atumaidi wata bwaikidi i baila, nuanuadi nani-'avo'avovo bega i vonedi i vo, 'Omi to'edakumetanimi matami 'uludi, nuakalikalimi. Fai 'wa veve 'wa vo, 'Ai'edi aitoi nuanuana yana vona'awaufaufa i na kiavetoketokei bega i na vo, A vona'awaufaufa Yaubada yana vanuga 'eba velu'ui 'wainega,” 'omi 'wa vo, 'Ana fata yana vona'awaufaufanina i na geuya.” We'e 'ai'edi i na vo, A vona'awaufaufa vanuga 'eba velu'ui 'ana vaigavu 'waidiega,” 'omi 'wa vo, Yana vona'awaufaufanina fa'alina, kebu 'ana fata i na geuya.”¹⁷ Omi 'wava'wavami, matami 'uludi. Ava'ai bwaikina? Vaigavu 'alo Yaubada yana vanuga 'eba velu'ui, kumanina vaigavunina i 'ivetabuya.”¹⁸ Wata 'wa veve 'wa vo, 'Ai'edi aitoi nuanuana yana vona'awaufaufa i na kiavetoketokei bega i na vo, A vona'awaufaufa 'eba velomu 'wainega,” 'omi 'wa vo, 'Ana fata yana vona'awaufaufanina i na geuya.” We'e 'ai'edi i na vo, Yaubada 'ana 'anivelena 'eba velomu tabwaneye, 'wainega a

vona'awaufaufa," 'omi 'wa vo, Yana vona'awaufaufanina fa'alina, kebu 'ana fata i na geuya." 19'Omi mogitana matami 'uludi. Ava'ai bwaikina? Yaubada 'ana 'anivelena 'alo 'eba velomu, kumanina nuakalikalina i 'ivetabuya? 20'Bega 'ai'edi tamu tomogo i na vona'awaufaufa 'eba velomu 'wainega, bega 'akonadi nuakalikalina 'eba velomu tabwane eye taiadi i awavetubamidi. 21'Wata 'ai'edi tamu tomogo i na vona'awaufaufa vanuga 'eba velu'ui 'wainega, 'akonadi Yaubada taiadi i awavetubamidi fai yana 'eba mia. 22'Wata bani'odi 'ai'edi tamu tomogo i na vona'awaufaufa abama 'wainega, 'akonadi Yaubada yana 'eba miabui wata taunina bei i miamiaga taiadi i awavetubamidi.

23'Omi to'edakumetanimi, nuakalikalimi. 'Omi tovekali. Veimea siaidi 'wa veve'ililibuyedi we'e veimea bwaikidi 'wa baibaileidi. 'Ai'edi 'ani'ani 10 'waimie, 'aitamogana 'wainega 'wa na 'anivelena-maimaiga Yaubada 'waineye. Wata nani saiotogidi bani'odi matasilisilili 10, 'aitamogana 'wainega 'wa na 'anivelena-maimaiga Yaubada 'waineye. Bani'odi 'wa na vevesauluvediga 'atumaina, siwe wata veimea bwaikidi 'wa da vematayakeyakedi, bani'odi sauluva tonovidi, 'isanuakalikaliki wata tutuya fueidi taunimi 'wa da tautauyemi Yaubada 'waineye. Naninidi bwaikidi 'wa da 'i'idewadi wata siaidi taiadi. 24'Omi to'edakumetanimi, matami 'uludi. Nani siaidi faifaidi 'wa nuanua, we'e nani bwaikidi 'wa vevenuafanidi, yami sauluva bani'odi tamu tomogo 'ana alu'aie nawagala i na obu i na iwayavuleni, we'e maidoga i na yemuyamo.

25'Omi to'edakumetanimi, nuakalikalimi. 'Omi tovekali. Tomogomi 'wa 'ivivigavudi we'e inagemi vainago 'ana ve'isakololo wata veumokai, yami sauluva bani'odi vedi wata 'aivoe, dumwedi 'wa tamatamadi we'e inagedi yoke 'anikudana. 26'Omi Falisi, matami 'uludi. Nagami vedi inageneye yoke 'wa na tamai, nika bega wata tomogona vunavunagina.

27'Omi to'edakumetanimi, nuakalikalimi. 'Omi tovekali. 'Omi bani'odi taumata, tabwana i 'ivivigavuya we'e inagena bokana.

28'"Ami 'isa 'wainega 'wa da vo 'atumaimi, we'e inagemi vekali wata sakona i veadagimi.

Iesu i vona-vagata to'edakumeta 'adi vematavuloga faifaina.

29'Omi to'edakumetanimi, nuakalikalimi. 'Omi tovekali. Basenadiotoga tubumiavo Yaubada yana tolu'ivonavo i luvewafadi. We'e 'omi taumata 'atumaidi 'wa 'idewadi matumatu 'waidie tolu'ivonanidi luludi faifaidi, wata Yaubada yana tomotoga 'atumaidi i wafaga 'adi 'eba nuave'avina 'wa 'ivivigavudi. 30'Wata 'omi 'wa vonavona 'wa vo, 'Ima 'ako basenadi tubumavo taiadi 'a da miamiaga, ava'ai i 'idewaiga 'ako 'aisedi i da 'idewai, bani'odi Yaubada yana tolu'ivonavo i nikedi i wafa." 31'"De'e

§ 23:22 Mad 5:34 † 23:28 Luk 16:15 ¨ 23:31 Fol 7:52

bani'odi 'wa voneyediga, taunimi 'wa lu'ivoneyemi 'omi to'ainikenidi tubudiavo. ³²Vetuma tubumiavo 'wa na saladiga 'wa 'idewai, Yaubada yana tolu'ivonavo matatabudi 'wa na luwewafadi.

³³ʷOmi tosakona 'adi 'aila'a, 'o'olo bani'odi. Yami sakonanidi faifaidi Yaubada i na veimea 'wa na luku Vatu'ai Manamanawena 'waineye, siwe kebu 'ami fata 'wainega 'wa na dega. ³⁴ʷBega a na vonemi, tolu'ivonavo, to'asetavo wata tovevo a na vevetunedi 'waimie, 'ifwaidi 'wa na nikedi i na wafa, 'ifwaidi 'wa na tutufwasedi 'ai lagalagana 'waidie, 'ifwaidi 'wa na toke 'wa na fitalidi yami 'eba miava'auta 'waidie wata 'wa na lusogi-vuvuedi 'atamana 'aitamogana 'aitamogana 'waidiamo. ³⁵ʷBegaidi Yaubada yana tomotoga 'atumaidi i luwewafadiga faifaidi, wata taunimi yami sauluvanidi sakoidi faifaidi, 'adi vita matatabuna 'omi 'wa na tovoiedi. Basenadiotoga Keni taina Ebeli kebu yana sakonaga i luwewafai. Bei tubumiavo 'ainike i velamuya i maiga Sekalaia 'waineye, kumanina Belekaia natuna, yami 'aila'a i luwewafai vanuga 'eba velu'ui nageneye, 'eba velomu lilivaneye. ³⁶A vona mogitana 'waimie, 'adi vematavuloga matatabuna i na mai 'asiau tomotoganimi 'waimie.”

Me Ielusalema faifaidi Iesu i taivonavona.

³⁷ʷIesu i taivonavona i vo, Ieu, me Ielusalema, me Ielusalema, Yaubada yana tolu'ivonavo 'wa luwewafadi wata yana tomata'aulelevo i vetunediga 'waimie, 'wa tutuvewafadi kileuyega. Kamukamu natudiavo fafedie i vevedodogidi, wata bani'odi yau, tutuya fuedi igodi a da 'avalamaigimi siwe 'wa baibaileku. ³⁸⁻³⁹ʷTutuya de'e i na nagoga yami 'atamana i na velovi, we'e yau kebu wata 'wa na 'ise'isekuga i na nagoga mulieta 'wa na vo, Taunina i mai 'Auvea 'ana wagavayega ta na subiai,” nika bei wata 'wa na 'iseku.”

Iesu i veifufu vanuga 'eba velu'ui 'ana geu faifaina.

24 ¹Iesu i vona'a'avana i tautauya vanuga 'eba velu'ui 'wainega yana tovetutuyamavo i mai nani 'ifwaidi i 'isediga vanuga 'eba velu'ui 'waineye nuanuadi i na veni. ²ʷIesu i vonedi i vo, Vanuganina 'wa 'ise'iseniga mogitana 'ana 'isa 'atumaina, siwe 'awaie 'ami gaviavo i na maia matatabuna i na geuya, wata kileunidi bega i bibinaga i na tutuwealidi, matatabuna i na tubakabakaledi.”

Tutuya vitadi faifaidi Iesu i vona-vagata.

³Mulieta Iesu i nago i laka 'Oya Olive tabwaneye i miabui. Yana tovetutuyamavo i maia 'aise'avadi i velutolieni i vo, Nuanuama 'a na

ʷ 23:33 Mad 3:7 ʷ 23:34 1 Tes 2:15 x 23:35 Nag 4:8; Ibu 11:4 y 23:37 Fol 7:59
z 23:39 Same 118:26 a 24:2 Luk 19:44

'asetai no'o vanuga 'eba velu'ui 'ana geu faifaina 'u vonaga, ma'avia, wata ava'ai tugusaga i na vema bega 'a na 'asetai sai'afoga 'u na vilamu 'u na mai, wata fwayafwaya 'ana 'eba ve'a'ava."

⁴⁻⁵ ^bIesu i vonedi i vo, 'Wa na 'isa'isa bega kebu tamu aitoi i na vekaliemiga, fai tomotoga fuei i na mai 'aku wagavayega igodi i na vo, Yau 'asa'aiana Keliso, Yaubada 'ana Venua'ivina." Yadi vonayega fuei i na vevekaliedi. ⁶Lilivamie vetalaga butu'aidi 'wa na noganogaidiga wata 'ani'ieyega vala'avadi, siwe a vovona-vagasemi, kebu nuafoumi i na veviga. Naninidi mogitana i na souyedi we'e fwayafwaya 'ana 'eba ve'a'ava bola. ⁷'Eba veimea bwaikidi wata 'eba veimea bwaikidi 'ifwaidi taiadi i na vevetalaga, we'e 'awalawa wata 'awalawa 'ifwaidi taiadi i na vevetalaga. 'Awalawa fuei 'waidie yoyoyo i na yueyue wata i na loka. ⁸Tutuyanina vavine i na vebutudiga veviga bwaikina i na vebaedi, wata bani'odi naninidi a veifufuyediga tutuyanina i na souyediga veviga wata 'we'wela i na velamu.

⁹^cTomotoga 'aila'a tulina tulina faifaiku i na vedumwe'ai'aiemi, i na 'ive'avinimi i na 'anivelenemi vita 'wa na veveluagadi, mulieta i na luvewafami. ¹⁰Fai vita 'wa na veveluagadiga fuei yadi vetumagana i na mwea i na baileku, ediavo i na vedumwe'ai'aiiedi wata i na 'etogiluvedi wafa 'waineye. ¹¹^dWata tolu'ivona-vekavekali fuei i na souyedi tomotoga fuei i na vekaliedi. ¹²Sakona i na vebwaika-'afo'afo ma'itufa tomotoga fuei yadi nuakalikali i na vesiai. ¹³Siwe egavo i na vetoketoke i na tototovoi fa'alina i na nagoga tutuya 'eba ve'a'ava 'waineye 'ita'ita'i i na veluagai Yaubada 'wainega.

¹⁴^eYaku tomotoga Vala 'Atumaina i na lulu'age-vuvueni 'aila'a tulina tulina 'waidie, i na lu'ivona 'waidie Yaubada nuanuana tomotoga fuei i na luku yana 'Aila'a nageneye bega i na veveimeyedi. De'e Valanina nagami tomotoga matatabudi i na 'asetai, mulieta fwayafwaya 'ana 'eba ve'a'ava.

Tamu nani maigikokololona.

¹⁵^f(Buki tokiluma bonaku, Iesu yana vona de'e 'wa na lu'iawawaiga 'wa na venua'ivineni nika 'wa na 'asetai.) Wata Iesu i vonedi i vo, Bola tamu nani 'wa na 'iseni maigikokololona vanuga 'eba velu'ui nageneye i na tototovoi. Naninina faifaina basenadiotoga Yaubada yana tolu'ivona 'ana wagava Daniela i vona-vagata, vonanina Yaubada yana Buki 'waineye i 'eno'eno. ¹⁶Tutuyanina tugusanina i na souyeni, egavo i miamiani 'awalawa Iudia nageneye, i lubwainedi i na dega i na nagoi

^b 24:5 Mad 24:23-24; 1 Ion 2:18 ^c 24:9 Mad 10:22; Ion 16:2 ^d 24:11 1 Ion 4:1
^e 24:14 Mad 28:19 ^f 24:15 Dan 11:31

'oyeye. ¹⁷⁻¹⁸ 'Ai'edi aitoi masi'edeye i na miamia, kebu 'ana fata i na luku vanuge yana kukua i na 'ewadi i na dega-matayo'o, wata aitoi i nagoga bakule, kebu 'ana fata i na vilai i na mai vanuge 'ana kaleko 'ana 'ewa faifaina. ¹⁹ Toveinainage wata vauvau nuakalikalidi fai kebu 'adi fata i na dega-matayo'o veviga bwaikina i na veluagai. ²⁰ Yaubada 'waineye 'wa na vevelu'ui bega naninina kebu i na sousouyeni toalu'uye 'wei bwaikina 'ana tutuye 'alo 'Aiata Veawai 'waineye. ²¹ ^sYaubada fwayafwaya i 'idewavauyeni i maiga 'asiau veviga i sousouyedi siwe sai'afo, we'e 'aiananina 'waineye veviga bwaikaotogina i na souyeni, i na 'a'avana kebu wata bani'odi i na sousouyeni. ²² Vitanina de'e 'ana tutuya Yaubada i na 'ive'ale'usai, 'ai'edi kebu, tomotoga i na 'a'ava. Tomotoganidi Yaubada i venuma'ivinediga faifaidi i na 'ive'ale'usai bega yadi mia i na ve'atumai.

Keliso-vekavekali i na souyedi.

²³⁻²⁴ ^hTutuyanina 'waineye 'ai'edi aitoi i na vonemi i na vo, Sino'o, Keliso i le'wa," 'alo i na vo, Side taunina," kebu bonana 'wa na nogai 'wa na vo 'ako, Mogitana," fai keliso-vekavekali wata tolu'ivona-vekavekali i na sousouyedi. I na souyediga 'eba nuavogana wata 'eba nua'ewa i na 'i'idewadi, igodi nuanuadi tomotoganidi Yaubada i venuma'ivinediga vekaliega nuadi i na 'ewadi. ²⁵ Naninidi 'awaie i na souyediga 'akonadi 'wa nogai, a vovona-vagasemi.

²⁶ Begaidi 'ai'edi aitoi i na vo, Keliso sino'o, wala'aie," kebu bei 'wa na nagoga, 'ai'edi i na vo, Keliso side vanuga nageneye," bonana kebu 'wa na nogaiga. ²⁷ Kebu bonadi 'wa na nogaiga fai yau a vetomotogaotoga yaku souyagi 'wa da vo tomuyoana i da kianamali abama matatabuna i da magetai, tomotoga matatabumi 'wa na 'isa'a'avaku.

²⁸ 'Ai'edi manusibosibo 'wa na 'isedi i na vava'lauta bei mogitana tamu nani wafana i 'eno'eno.

Iesu yana vila-vaitugana faifaina.

²⁹ ⁱTutuyanina vitanina i na 'a'avana nika inala i na lu'waugi, weta'i yana mageta i na 'a'ava, 'ubwana i na avuta abamega, wata nani matatabuna toketokedi abame i na yue. ³⁰ ^jTutuyanina 'waineye tugusa yau a vetomotogaotoga faifaiku i na souyeni abame, we'e fwayefwayeye 'aila'a tulina tulina ma yadi venuma'ivinediga i na 'we'wela fai i na 'iseku yau a vetomotogaotoga abamega a na mimai waowa 'wainega ma yaku toketokena wata ma magetaku mataududulina. ³¹ ^kEvulega butu'aina bwaikina i na yuvei, mulieta yaku anelose a na vetunedi yaku tomotoga venuma'ivinedi i na va'augidi i na miedi. Tomotoganidi i na miediga

^g 24:21 Dan 12:1 ^h 24:24 2 Tes 2:9; Ve 13:13 ⁱ 24:29 2 Fit 3:10; Ve 6:12-13
^j 24:30 Ve 1:7; Mad 26:64 ^k 24:31 1 Kol 15:52; 1 Tes 4:16

fwayafwaya matatabuna 'wainega, inala yana 'eba lakayega wata yana 'eba inivayega, bolimanayega wata yavalatayega.

³²Modawa 'wa na nuani. Tutuyanina i na idiaga ta 'asetai 'aisaya i veyafa. ³³Wata bani'odi 'ai'edi tugusanidi a voneyediga 'wa na 'isedi, 'wa na 'asetai yaku souyagi 'akonadi i le'wale'wa. ³⁴A vona mogitana 'waimie, tutuya de'e 'ana tomotoga bola i na miamiani naninidi matatabuna i na souyedi. ³⁵Abama wata fwayafwaya 'awaie i na 'a'ava, we'e yaku vona kebu tamu sai'afo i na 'a'ava, i na 'eno-vagata.”

Iesu yana mai-vaitugana 'ana tutuya kebu tamu aitoi i da 'asetai.

³⁶'Wata Iesu i vonedi i vo, Yaku mai-vaitugana kebu tamu aitoi i da 'asetai, ava'ai 'aiataga 'alo ava'ai 'awasasaga 'waineye a na vilaku. Anelose abame kebu i da 'asetai, 'alo yau, kumaniku a vetomotogaotoga, Tamaku 'aiseotogina i 'asetai. ³⁷^mYaku mai-vaitugana 'waineye tomotoga yadi sauluva bani'odi Noa yana tutuye tomotoganidi. ³⁸⁻³⁹"Basenadiotoga Noa yana tutuye tomotoga i nunuatavutavuna, 'ani'ava, yemu'ava, nagi'ava, ava'ai i sousouyediga tomotoganidi kebu i da 'asetai, nika Noa i dodoga yana wakeye mwai bwaikina i ula tomotoganidi matatabudi i ve'alawafawafa. Yau a vetomotogaotoga yaku mai-vaitugana wata bani'odi. ⁴⁰Tutuyanina 'waineye tomotoga 'adi 'ailuga i na folofolova bakule, tamu i na 'ewai i na naweni, we'e tamu i na baileni. ⁴¹Vevine 'adi 'ailuga 'ani'ani i na 'i'idewadewa, tamu i na 'ewadi i na nawedi, we'e tamu i na bailedi.

⁴²°Begaidi 'wa na miamia 'wa na 'isa'isa fai yau 'ami Toveimea yaku souyagi 'ana tutuya kebu 'wa da 'asetai. ⁴³^p'Wa na nuani. Tamu tomogo tovainago yana mai 'ana tutuya i da 'asetai, i da 'isa'isa bega tovainagonina kebu 'ana fata i na luku yana vanuge. ⁴⁴'Omi wata bani'odi 'wa na 'isa'isa fai 'aiatanina 'waineye 'wa na vo, Kebu i na maiga,” yau a vetomotogaotoga bei a na le'wa.

**Vona-awatabai Iesu yana mai wata tofolova
'adi tutula 'ana 'ewa faifaidi.**

⁴⁵A na vonemi tofolova 'atumaina, kumanina ma yana 'asetai wata ma 'ana vetumagana. 'Ana toveimea i voneni yana tofolovavo 'ifwaidi i na 'i'isave'avinidi wata 'adi'adi i na veveledi 'aiata 'aitamogana 'aitamogana mulieta i tauya. ⁴⁶Tutuyanina 'ana toveimea i na vilai i na mai, 'ai'edi i na vematayakayaka folovanidi i na folofolovidi 'eba sosoana bwaikina tofolovanina 'waineye. ⁴⁷^aA vona mogitana 'waimie, 'ana toveimea i na voneni yana vanuga wata yana kukua matatabuna 'adi to'isave'avina.

^l 24:36 Fol 1:7; ¹ Tes 5:1-2 ^m 24:37 Nag 6:5-8 ⁿ 24:39 Nag 7:6-23 ^o 24:42 Mad 25:13
^p 24:43 Ve 3:3 ^q 24:47 Mad 25:21,23

48-49 We'e 'ai'edi tofolova sakoina, bola yana nuanua i na vo, 'Aku toveimea bola, kebu i na mai-matayo'oga," bega enavo tofolova i na nikenikedi we'e mali tomotoga sakoidi taiadi i na 'ani'ani wata ufa toketokena i na yemuyemu bega ma fue die nuadi i na lugaugaudi. 50 Bani'odi i na vevesauluvediga tamu tutuya tofolovanina kebu i da 'asetai ga yana toveimea i na mai yawaina i na velovogi. 51 I na toke i na niki yana sauluvanina sakoina faifaina mulieta 'eba veviga bwaikina 'waineye i na yatoi, tovekali taiadi i na 'we'we'wela wata maigidi i na yuyuyudi."

Tomotoga yadi luku Yaubada yana 'Aila'a 'waineye 'ana vona-awatabai.

25 1 'Wata Iesu i vonedi i vo, 'Aiatanina a na vilaku a na mai, tomotoga yadi luku Yaubada yana 'Aila'a 'waineye side bani'odi. Tamu vavine i na nagi bega enavo ne'e'ela 10 ma yadi mageta i nagoi tomogo 'ana lukamata faifaina. 2 'Adi 5 ma yadi 'asetai, wata 5 nuadi 'anigaugaudi. 3-4 Nuadi 'anigaugaudi yadi mageta ma ufadi we'e i na 'a'avaga faifaina kebu tamu i da 'ewaiga, we'e 'adi 5 ma yadi 'asetai yadi mageta i iwagidi wata yadi ufa i 'ewadi. 5 Tonaginina i 'ivogavogana bega vevinenidi 'adi 10 matadi i duduna i 'eno-mataiva.

6 'Akonadi 'eno-waube'u nika vegole i nogai i vo, Side tonagi i mimai. 'Wa maia, 'wa na yogobodebodeni." 7-8 Vevinenidi 10 i 'isa yadi mageta i kialakaidi nika vevine nuadi 'anigaugaudi i vona ediavo 'waidie i vo, Yama mageta i 'weu'weu, yami ufayega 'wa da iwagama." 9 Vevine ma yadi 'asetai ediavo yadi vona i tutuli i vo, Kebu, ufa de'e 'omi wata 'ima kebu 'ada fataga. 'Wa nagoi 'eba kimwane 'waineye bei yami ufa 'wa na 'ewadi." 10 Ne'e'elanidi nuadi 'anigaugaudi i tauya i nunagoi kimwane faifaina, nika tonagi i le'wa. Ne'e'elanidi 'adi 5 i 'idewadewa i lulukamata taiadi i luku nagi 'ana 'ani 'waineye, 'awa i sibodai."

11 'I saiboda mulieta vevinenidi kimwane faifaina i nagoiga i le'wai, i vegole i vo, 'Auvea, 'Auvea, 'a da lukuwa." 12 Tonaginina i vo, Aigodi 'omi kebu a da 'asetamiga."

13 'Iesu yana vonanina 'ana 'eba ve'a'ava 'waineye i vo, Begaidi 'omi 'wa na 'isa'isa fai yaku mai-vaitugana 'ana 'aiata 'alo 'ana 'awasasa kebu 'wa da 'asetai ga."

**Tomotoga yadi folova 'ana tutula Yaubada
'wainega 'ana vona-awatabai.**

14 Wata Iesu i vona-awatabai yana mai faifaina i vo, Tamu tomogo i tautauya 'ani'ie yana tofolovavo i goleva'augidi yana kukua matatabuna i veledi i na 'isave'avinidi. 15 "Tamu i veleni lubulubu 5,000, tamu lubulubu

r 25:1 Luk 12:35 s 25:11-12 Luk 13:25-27 t 25:13 Luk 12:40 u 25:15 Lom 12:6

2,000, we'e tamu lubulubu 1,000, nika i tauya. 'Aitamogana 'aitamogana i velediga yadi 'aseta wata yadi toketokena 'ana 'etowava 'wainega.

¹⁶Tofolovanina lubulubu 5,000 i 'ewaiga i nago kebu i da mia-maimaiga maninina i vefoloveni, wata 'wainega 'imoso'i i veluagai lubulubu 5,000. ¹⁷Wata bani'odi tofolovanina lubulubu 2,000 i 'ewaiga i vefoloveni, wata lubulubu 2,000 i 'ewai. ¹⁸We'e tofolovanina 'adi vetonu, kumanina lubulubu 1,000 i 'ewaiga, i nago fwayafwaya i alai 'ana toveimea yana mani i tavuni.

¹⁹Toveimeanina i nagoga tutuya manamanawena i mia, mulieta i vilai i mai yana toflovavo i vonedi i maia nuanuana i na 'asetai yana mani i 'imoso'iedi 'alo kebu. ²⁰Tofolovanina lubulubu 5,000 i 'ewaiga i luku maninina ma 'ana 'imoso'i lubulubu 5,000 i veleni i vo, 'Auvea, basenadi lubulubu 5,000 'u velekuga a vefoloveni, side wata lubulubu 5,000 a veluagai." ²¹"Ana toveimea i voneni i vo, Mogitana 'omu todumwebika, yamu folova 'atumaiotogina. Mani sai'afo siaina 'waineye 'u dumwebika, bega a na yatomu 'u na veto'isave'avina mani bwaikina 'waineye. 'Waikuye taiadi ta na miamia ta na sososoana."

²²Mulieta tofolovanina lubulubu 2,000 i 'ewaiga i luku i vona 'ana toveimea 'waineye i vo, 'Auvea, basenadi lubulubu 2,000 'u velekuga a vefoloveni, side wata lubulubu 2,000 a veluagai." ²³Yana toveimea i voneni i vo, Mogitana, 'omu todumwebika, yamu folova 'atumaiotogina. Mani sai'afo siaina 'waineye 'u dumwebika, bega a na yatomu 'u na veto'isave'avina mani bwaikina 'waineye. 'Waikuye taiadi ta na miamia ta na sososoana."

²⁴Mulieta tofolovanina lubulubu 1,000 i 'ewaiga i luku i vona 'ana toveimea 'waineye i vo, 'Auvea a 'asetamu, 'omu tomogo fa'alimu. Kebu 'u da bakubakulaga, 'u 'a'aialamo, toflovava i folofolova we'e 'omu tutula'ava 'u 'ewa'ewamo. ²⁵Yau a kololo 'ai'edi yamu mani a da vevuyoi bega a nago a giveni fwayafwaya nageneye. Side yamu maninina, 'asa'aiana 'u 'ewai." ²⁶'Ana toveimea i yagaia i vo, 'Omu toflovava sakoimu, dumwemu 'aina. 'Omu yamu nuanua igodina yau kebu a da bakubakulaga, a 'a'aialamo wata toflovava i folofolova faifaiku, we'e yau tutula'ava a 'ewa'ewamo. ²⁷Bega 'u nuani yaku mani 'u da naweni banika 'waineye. A vilaku a mai yaku maninina ma 'ana 'imoso'i a da 'ewai."

²⁸Bega yana toflovavo 'ifwaidi i vonedi i vo, Lubulubu 1,000 'wa eloi taunina toflovava sakoina, kumanina ma yana lubulubu 10,000 'wa na veleni. ²⁹"Wa na eloiga fai 'ai'edi aitoi 'ana veuveuta 'wainega i na folova-'atumai, wata 'ana 'imoso'i i na veluagai bwaikaotogina, we'e 'ai'edi aitoi 'ana veuveuta kebu i na folova-'atumaieniga veuveutanina siaina i na elo'a'avai. ³⁰We'e de'e tofolovanina dumwena 'aina ava'ai

'ana 'atumaina? 'Wa naweni 'wa taweni i na obu dudubale bei i na 'we'we'wela wata maigina i na yuyuyuya.”

Tomotoga i na vonayavuga Iesu mataneye.

³¹⁻³²xWata Iesu i vonedi i vo, 'Awaie yau a vetomotogaotoga ma yaku mageta mataududulina a na mai abamega anelose matatabudi taiadi. Ma yaku veimea a na miabui 'eba miabui 'ai'aiwabuna 'waineye, mulieta tomotoga 'adi 'aila'a tulina tulina fwayafwaya matatabuna 'wainega i na maia i na vonayavuga matakuye. I na 'a'ava a na 'ivisidi bani'odi 'aisaya 'adi to'isave'avina sifi wata goti i yayato'edi. ³³Yaku tomotoga a na yatodi 'aku 'atagiega we'e 'ifwaidi tomotoga 'aku wamayega.

³⁴yI na 'a'avana mulieta yau yadi Kini tomotoganidi 'aku 'atagiega a na vonedi a na vo, 'Omi 'akonadi Tamaku i vesauluva 'atumaina 'waimie, 'wa maia 'wa na luku yana 'Eba Veimea 'waineye. Bola fwayafwaya kebu i da 'idewaiga, Yaubada 'eba veimeanina i 'idewa-vagaseni faifaimi.

³⁵'Wa na lukuga fai basenadi a lase, 'wa ve'aniku, 'anigoku i lala, ufa 'wa veleku, tuliku siwe 'wa goleku a laka yami vanuge. ³⁶Kebu 'aku kalekoga, 'wa ve'weseniku, a viga, 'wa lukebeku, a luku vanuga 'eba yogona 'waineye, 'wa fofegofegeku.” ³⁷Yaku tomotoganidi yadi sauluva 'atumaidi i na velutolieku i na vo, 'Auvea, ma'avia 'a 'isemu 'u lase 'a ve'animu, 'alo 'anigomu i lala ufa 'a velemu? ³⁸Ava'ai tutuyaga 'a 'isemu kebu a da 'isa'inanamuga 'a golemu 'u laka yama vanuge, 'alo kebu 'amu kalekoga a ve'wesenimu? ³⁹Wata ma'avia 'u viga 'alo 'u luku vanuga 'eba yogona 'waineye 'a fofegogemu?” ⁴⁰zYau yadi Kini yadi velutoli a na tutuli a na vo, A vona mogitana 'waimie, tutuyanina tamu iaku tomogo-avo'avovo 'wa 'ivaiseniga siwe 'asa'aiana yau 'wa 'ivaiseku.”

⁴¹aWe'e tomotoganidi 'aku wamayega a na vonedi a na vo, 'Omi 'akonadi Yaubada i veimea vematavuloga 'wa na veluagai, 'wa nagoi 'ai-'ala'alata kebu yana 'weuga 'waineye, 'ainina Yaubada i 'idewa-vagaseni Seitani enavo yaiaina taiadi faifaidi. ⁴²⁻⁴³'Wa na nagoiga fai basenadi a lase siwe kebu 'wa da ve'anikuga, 'anigoku i lala ufa 'wa bodaku, yau tuliku 'wa 'iseku siwe kebu 'wa da goleku a da wai yami vanuge. Kebu 'aku kalekoga 'asa'aiana 'wa 'isekumo, a viga wata vanuga 'eba yogona 'waineye a luku siwe kebu 'wa da 'isave'avinikuga.” ⁴⁴Tovedumwe'ai'ainidi i na velutolieku i na vo, 'Auvea, ma'avia 'a 'isemu, 'u lase, 'anigomu i lala, wata kebu 'amu kalekoga 'a bodamu. We'e 'omu tomogo tulimu, 'u viga, 'alo vanuga 'eba yogona 'waineye 'u luku 'a dumwe'aiemu kebu 'a da 'ivaisemuga?” ⁴⁵Yau yadi Kini yadi velutoli a na tutuli a na vo, A vona mogitana 'waimie, tutuyanina tamu

x 25:31 Mad 16:27 y 25:34 Luk 12:32 z 25:40 Voa 19:17; Ibu 6:10 a 25:41 Ve 20:10; Mad 7:23

iaku tomogo-'avo'avovo 'wa bodaiga 'alo kebu 'wa da 'ivaiseniga, siwe 'asa'aiana yau 'wa bodaku wata kebu 'wa da 'ivaisekuga.”⁴⁶ Mulieta a na veimea tovedumwe'ai'ainidi i na nago vematavuloga kebu yana 'a'avaga 'waineye, we'e tomotoganidi yadi sauluva 'atumaidi mia 'atumaina wata miamia-vagaina i na veluagai.”

I lauala Iesu 'ana laugiva faifaina.

26¹⁻² Iesu yana mai-vaitugana faifaina i ve i 'a'avana, mulieta yana tovetutuyamavo i vonedi i vo, 'Akonadi 'wa 'asetai 'aiata 'ailuga i na 'a'avana Sakali Uvi'agalatagona i na velamu. Tutuyanina 'waineye yau a vetomotogaotoga i na 'aniveleneku i na tutufwaseku 'ai lagalagana 'waineye.”

³ Tutuyanina 'waineye tovelomu 'adi to'edakumetavo wata me Diu to'edakumetavo 'au'auveadi i va'auta tovelomu 'adi to'edakumeta bwaikina 'ana wagava Kaiafa yana vanuga bwaikina 'waineye. ⁴ Bei i veifufu bani'odi i na munega givagivayega Iesu i na 'ive'avini i na luvewafai. ⁵ Siwe wata i vo, Kebu sakalie ta na 'ive'aviniga i na nunago tomotoga fuedi i na daba fai nuanuadi Iesu.”

Iesu 'ana iwaga 'atamana Bedani 'waineye.

⁶ Iesu bola i miamia 'atamana Bedani, Saimoni kumanina basenadi i vewaiwaiseselaga yana vanuge. ⁷ I 'ani'ani nika tamu vavine bunama i mieni, magaina 'atumaina wata 'ana tutula bwaikina Iesu nava'auna i iwagi. Bei i koiaga kileu i 'idewai 'ana 'isa 'atumaotogina, 'ana wagava alibasita.

⁸ Iesu yana tovetutuyamavo i 'iseni ma yadi luvulewa i manini i vo, Awale bunama i ve'amubwadodoyeni? ⁹ Bunamanina i lubwaineni i da vekimwaneyeni mani bwaikina i da veluagai 'wainega wekowekoma i da 'ivaisedi.” ¹⁰ Iesu yadi nuanua i 'asetai bega i vonedi i vo, Vavine kebu 'wa na 'ivebunumayagi. Naninina i 'idewaiga 'atumaotogina 'waikuye i lubwaineni. ¹¹ Wekowekoma tutuya fuedi taiadi 'wa na miamia we'e yau kebu. ¹² ^c I iwagikuga tomogoku i 'idewa-vagaseni 'aku ve'ufa faifaina, me Diu yada sauluva bani'odi. ¹³ A vona mogitana 'waimie, bola Valaku 'atumaina i na lulu'ageyeni fwayafwaya matatabuna 'waineye, vavininina yana folova 'waikuye wata i na lulu'ivoneyeni 'ana 'eba nuave'avina.”

Iudasa nuanuana Iesu i na 'etogiluveni.

¹⁴⁻¹⁵ Mulieta Iesu yana tovetutuyamavo ¹² 'waidiega tamu iadi 'ana wagava Iudasa Isakaliota i nago tovelomu 'adi to'edakumetavo 'waidie

^b 26:2 Sou 12:1-27; Mad 20:18 ^c 26:12 Ion 19:40

i vonedi i vo, 'Ai'edi Iesu a na 'aniveleneniga 'waimie ava'ai 'wa na veleku?" Yana vona i noganogaiga kileu siliba matatabuna 30 i veleni. ¹⁶Tutuyanina 'wainega i nagoga Iudasa i velamu i lalauala 'eda'eda 'atumaidi Iesu 'ana 'etogiluva faifaina.

Iesu ma yana tovetutuyamavo i 'ani.

^{17d}Me Diu Sakali Uvi'agalatagona 'ana 'aiata 'eba velamu 'waineye beledi kebu 'ana 'ivebwaika i 'ani'ani, 'adi 'eba tolinuata'i basenadiotoga Yaubada tubudiavo i 'ita'ita'iedi 'awalawa Itifita 'wainega faifaina. 'Aiatanina 'waineye Iesu yana tovetutuyamavo i maia i velutolieni i vo, Ava'aibe bei nuanuamu Uvi'agalatagona 'ana 'ani'ani 'a na 'idewadewa?" ¹⁸Iesu yadi velutoli i tutuli i vo, 'Wa na nagoi Ielusalema, tomogonina 'akonadi 'wa 'asetai, 'wa na voneni 'wa na vo, Yama Tove i vonaga yana tutuya 'akonadi i le'wa nuanuana 'ima yana tovetutuyamavo taiadi Uvi'agalatagona faifaina 'a na 'ani yamu vanuge." ¹⁹Yana tovetutuyamavo i tauya i nagoi, ava'ai Iesu i vonediga Uvi'agalatagona faifaina i 'idewadewa.

²⁰Akonadi i lavia, bega Iesu ma yana tovetutuyamavo 12 i maia i miabui i na 'ani. ²¹I 'ani'ani Iesu i vonedi i vo, A vona mogitana 'waimie, 'waimiega tamu i na 'etogiluveku. ²²Tovetutuyamavo yana vona i nogai nuafoudi i veviga bega 'aitamogana 'aitamogana i vevelutolieni i vo, 'Auvea, voke yau, siwe a nuani kebu." ^{23e}Iesu i vo, 'Ama 'ailugana 'ama beledi 'a lulu'utuva 'aivoeye, kumanina." ²⁴Basenadiotoga i kilumi Yaubada yana Buki 'waineye yau a vetomotogaotoga i na nikeku a na wafa, i vonaga mogitana, we'e yau a vetomotogaotoga 'aku to'etogiluva nuakalikalina. 'Ako kebu i da tubugaga 'atumaina, siwe fai i tubuga yana sakonanina faifaina veviga bwaikina i na veluagai." ²⁵Iudasa, taunina to'etogiluva i vona i vo, Tove, voke yau, siwe a nuani kebu." Iesu i vo, 'U vonaga, 'asa'aiana 'omu."

Iesu yana 'ani.

^{26f}Bola i 'ani'ani, Iesu 'ani'ani i 'ewai, i vekaiwa Yaubada 'waineye mulieta i 'ivivia i 'a'avana yana tovetutuyamavo i veledi. I vonedi i vo, 'Ani'ani de'e 'asa'aiana tomogoku, 'wa na 'ewai 'wa na 'ania."

^{27-28g}Mulieta oine ma vedina i 'ewai, i vekaiwa Yaubada 'waineye i 'a'avana i veledi i vo, Matatabumi 'wa na yemu. Oine de'e 'asa'aiana dayagiku, i na ilolo fuemi faifaimi bega Yaubada yami sakona i na nuatavunidi. Yaku wafanina 'wainega Yaubada yana Veakutagona 'Ivauna basenadi faifaina i vona'awaufaufa i na velamu 'waimie. ²⁹A vona

^d 26:17 Sou 12:14-20 ^e 26:23 Same 41:9 ^f 26:26-28 Ion 6:54-56 ^g 26:27-28 Sou 24:8; 1 Kol 10:16

mogitana 'waimie, oine de'e kebu wata a na yemuga, i na nagoga mulieta oine 'ivauna taiadi ta na yemu Tamaku yana 'Eba Veimea nageneye.”
³⁰Iesu i vona'a'ava lei subisubia tamu i silakai i lei mulieta i nago i laka 'Oya Olive.

Iesu i vona-vagata Fita i na ve'eweniga faifaina.

³¹Iesu i vona yana tovetutuyamavo 'waidie i vo, 'Ako lovananina matatabumi 'wa na degaloveku fai basenadiotoga Yaubada yana Buki 'waineye i kilumi faifaimi i vo,

Yaubada to'isave'avina i na nikei i na wafa, we'e 'aisaya sifi i na ve'aladegadega.”

³²Vonanina i kilumiga i na nikeku faifaina mogitana, siwe tutuyanina Yaubada i na sivetovoiku a na kumeta a na nago Galili bei ta na veluaga.”

³³Fita i vona-matayo'o i vo, 'Ai'edi tomotoga matatabudi i na degalovemu, we'e yau kebu tamu sai'afo a na degalovemuga.” ³⁴Iesu Fita i voneni i vo, A vona mogitana 'waimuye 'ako lovane bola kamukamu kebu i na kwagega nagami tutuya 'aitonu 'u na bavusebuku.” ³⁵Fita i vo, 'Ai'edi taiadi ta na wafaga i lubwaineku, siwe kebu a na vo, Yau Iesu kebu a da 'asetai.” Ava'ai Fita i voneyeniga, enavo 'ifwaidi wata bani'odi i vona.

Iesu i nago Gedesemani bei i velu'ui.

³⁶Mulieta Iesu ma yana tovetutuyamavo i nagoi tamu wala'ai 'atumaina 'waineye 'ana wagava Gedesemani, bei yana tovetutuyamavo i vonedi i vo, Side bei 'wa na miabui 'wa na miamiani, yau sino bei a na nago a na velu'ui.” ³⁷⁻³⁸^kTomotoga 'adi 'aitonu i vonedi taiadi i nagoi, Fita, wata Sebedi natunavo 'adi 'ailuga Iemesa wata Ioni. Venuafouviga wata nuavita bwaikina Iesu i vebaeni i vonedi i vo, Yaku nuavita bwaikaotogina 'wa da vo nuafouku i da 'e'etokadia wata 'wainega sai'afoga a na wafa. Side bei 'wa na miamia kebu 'wa na 'enoga ta na 'isa'isa.”

³⁹I vaganago i lumata'afufu i velu'ui i vo, Tamaku, 'ai'edi yamu nuanua i na lubwaineniga vita de'e wata wafa 'u da 'ewadi 'waikuyega. Siwe 'asa'iana, de'e kebu yau yaku nuanuaga, 'omu yamu nuanua bega a na vematayakeyakenimo.”

⁴⁰I velu'ui i 'a'avana i vilai i nago yana tovetutuyamavo i 'isedi i 'eno'enovi. I luvagonidi Fita i voneni i vo, Awale 'wa 'eno'enovi, ta da 'isa'isa 'awasasa 'aitamogana. ⁴¹'Wa na 'isa'isa wata 'wa na velu'ui nika kebu vetalaimimila 'waineye 'wa na be'uga. Nuanuami 'wa na 'ivaiseku siwe yami toketokena i mwea.”

^h 26:31 Ion 16:32; Sek 13:7 ⁱ 26:32 Mad 28:7 ^j 26:34 Mad 26:69-75 ^k 26:38 Ion 12:27
^l 26:39 Ibu 5:7-8

⁴²Wata 'ana veluga Iesu i vaganago i velu'ui i vo, Tamaku, 'ai'edi kebu 'ana fata 'aku vita wata wafa 'u na 'ewadiga, 'asa'aiana a tauyeku 'waidie, yamu nuanua a na 'idewai.” ⁴³Wata i vilai i mai yana tovetutuyamavo i 'isedi i 'eno'enovi fai matadi i duduna-'afo'afo. ⁴⁴Wata i 'iawedi i vilai i nago 'ana vetonu i velu'ui, yana velu'uinidi i luvaituganidi.

⁴⁵⁻⁴⁶Mulieta i vilai i mai yana tovetutuyamavo i vonedi i vo, 'Omi 'alo 'wa 'eno'enovi. 'Wa 'isanaweni, 'aku to'etogiluva i le'wa. Yau a vetomotogaotoga yaku tutuya 'akonadi i le'wa bega i na 'aniveleneku tosakona yadi toketokena 'waineye. 'Wa tovoi ta na nagoi 'waidie.”

Iesu 'ana 'ive'avina.

⁴⁷Bola Iesu i veveifufu nika Iudasa i mai, kumanina tamu Iesu yana tovetutuyamavo 12 'waidiega. 'Aila'a bwaikina taiadi i maia, ma yadi kefata wata fulumai, tovelomu 'adi to'edakumetavo wata me Diu to'edakumetavo 'au'auveadi 'waidiega i vetunedi i maia.

⁴⁸To'etogiluvanina 'akonadi 'aila'a i vona-vagasedi yana tugusa i vo, Tomogonina a na 'avalamaigiga, kumanina nuanuami, 'wa na 'ive'avini.”

⁴⁹Tutuyanina i le'wai, Iudasa tonovina i nago Iesu i 'avalamaigina i voneni i vo, Tove, kaiwa.”

⁵⁰Iesu i voneni i vo, Iaku, ava'ai nuanuamu 'u 'idewa-matayo'oi.” Mulieta Iudasa enavo i maia Iesu i toke i 'ive'avini. ⁵¹Tamu Iesu yana tovetutuyama i 'isedi, yana kefata i yo'ei tovelomu bwaikina yana tofolova igodi i da nikei taniga'avana i tutuomuya. ⁵²Iesu tovetutuyamanina i voneni i vo, 'U 'ailove, yamu kefata 'ana 'eba 'aidodoga 'waineye 'u dodogi, egavo kefatayega i na vetalagaga wata mali tomotoga kefatayega i na luvewafadi. ⁵³'Wa da nuani, 'ai'edi nuanuaku a da velu'ui Tamaku 'waineye, anelose 'aila'a 12 'alo 'aivia bani'odi i da vetunedi i da 'ita'ita'iekua. ⁵⁴I da 'ita'ita'iekuga, ava'ai basenadiotoga i kilumiga Yaubada yana Buki nageneye naninidi i lubwainedi i na souyedi, 'ako kebu 'adi mogitana i da souyediga.”

⁵⁵Tomotoganidi i maia Iesu 'ana 'ive'avina faifaina i vonedi i vo, Yau 'wa da vo to'ainike bega 'wa maia ma yami kefata wata fulumai 'aku 'ive'avina faifaina. 'Aiata 'aitamogana 'aitamogana a mimiabui vanuga 'eba velu'ui nageneye a veve siwe kebu bei 'wa da 'ive'avinikuga. ⁵⁶'Wele naninidi 'wa 'idewadiga 'waikuye nika ava'ai basenadi Yaubada yana tolu'ivonavo i kilumidi faifaiku yana Buki 'waineye, 'adi mogitana i souyedi.”

Iesu i vona'a'avana yana tovetutuyamavo matatabudi i degalovei.

Iesu i tovoi Diu Kaniselo matadie.

⁵⁷Lovananina 'waineye ve'etoboda 'adi tovevo wata me Diu to'edakumeta 'au'auveadi i va'auta tovelomu bwaikina yana vanuge

'ana wagava Kaiafa. To'ive'avinanidi Iesu i 'ewai i mieni 'waidie. ⁵⁸Fita i yogo'waila siwe 'ani'ieogose kebu lilivadie, i nago i luku vanuganina 'ana kali nageneye, tanotanoge i miabui tolugaviavo taiadi, Iesu i vemata'i'l'ieni.

⁵⁹Vanuganina nageneye tovelomu 'adi to'edakumetavo wata 'ifwaidi Diu Kaniselovo Iesu yana vonayavuga i noganogai nuanuadi vekaliega i na 'ivewafai, siwe kebu tamu yana sakona i da veluagaiga. ⁶⁰⁻⁶¹^pTomotoga fue di i tovoi i lu'ivona-vekavekali siwe kebu mogitanaga. Mulieta 'eba ve'a'ava 'waineye tomotoga 'adi 'ailuga i tovoi i vona i vo, Tamu tutuya 'a nogai de'e kumanina i vo, Yau vanuga 'eba velu'ui a da geuyaga, 'aku fata 'aiata 'aitonu nagedie a da vetovoi-vaitugani." ⁶²Tovelomu bwaikina i tovoi i voneni i vo, I vevitamuga, bonadi 'u tutuli, i vona mogitana 'alo kebu?"

⁶³'Siwe Iesu kebu tamu ava'ai i da voneyeniga i veve'wada. Wata tovelomu bwaikina i velutoli-vaitugana Iesu 'waineye i vo, Yaubada miamia-vagaina mataneye 'u na vona mogitana kebu 'u na vekaliga, mogitana 'omu Keliso, Yaubada 'ana Venua'ivina wata Natuna 'alo kebu?"

⁶⁴Tovelomu bwaikina yana velutoli Iesu i tutuli i vo, 'U vonaga, 'asa'aiana bani'odi. Siwe matatabumi a na vonemi. 'Awaie yau a vetomotogaotoga 'wa na 'iseku ma yaku veimea Yaubada Bwaikaotogina 'ana 'atagega a na miabui, wata abamega a na obuobuma waowa 'wainega."

⁶⁵'Iesu yana vona faifaina tovelomunina ma yana kamogala 'ana talauma i silabu'i i vo, 'Wa nogai? I vona-awadamana Yaubada 'waineye. 'Akonadi yana sakona 'wa nogai, tovevita 'ifwaidi 'asa'aiana, kebu i na vonavonaga. ⁶⁶'We'e 'omi 'wa da nuani i na wafa 'alo kebu?" Kaniselovo yana vona i tutuli i vo, Yana vonanina 'ana nogaya i lubwaineni wafa."

⁶⁷⁻⁶⁸"Mulieta i kiwakiwala maigineye, nimadi i nunumidi i nikenikei, i 'a'avana matana i umadina nimadiega i nikenikei wata i sidibidibieni i vo, 'Omu igodi Yaubada 'ana Venua'ivina, yama fio, 'u da nuaniga aitoi i nikemu?"

Fita i ve'eweni Iesu.

⁶⁹We'e Fita i miabui i miamia tanotanoge, i miamiaga nika tamu vavine, tovelomu bwaikina yana tofolova, i mai i voneni i vo, Iesu tomogo Galili, 'omu wata taiadi 'wa yabayaba."

⁷⁰⁻⁷¹Siwe tomotoga fue di matadie i ve'ewa i vo, 'Omu ava'ai 'u vonevoneyeni."

Mulieta i vaganago kali 'ana 'eba luku 'waineye, wata tamu tofolova vevinena Fita i 'iseni tomotoga i vonedi i vo, Tomogo de'e Iesu tomogo

^p 26:60-61 Ion 2:19-21 ^q 26:63 Ais 53:7 ^r 26:64 Dan 7:13; Mad 24:30
^s 26:65 Ion 10:33 ^t 26:66 Ion 19:7; Vei 24:16 ^u 26:67 Ais 53:5

Nasaledi taiadi i yabayaba.” 72 Nika wata Fita i ve'ewa i vo, Tamada, kebu tamu sai'afo a da 'asetai tomogonina.”

73 Kebu tutuya manamanawenaga, nika tomotoganidi bei i miamianiga i nagoi Fita 'waineye i voneni i vo, Vona mogitana, 'omu tamu Iesu iana, yamu itu 'ana nogaya 'omu wata Iesu ma fuemie me Galili.” 74 Nika Fita i ve'awafatafata i vo, 'Ai'edi a da vevekaliga, Yaubada i da nikeku, we'e aigodi, tomogonina kebu a da 'asetai-tonovi.” Fita i vona'a'ava nika kamukamu i kwage. 75 1 Nogai, i nuani Iesu yana vona i voneniga i vo, 'Ako lovane bola kamukamu kebu i na kwagega nagami tutuya 'aitonu 'u na bavusebuku.” Fita vonanina i nuani i souyeni 'atamane i taibwaubwau.

Iesu i naweni Failato 'waineye.

27 1 I 'atai 'awa'awaiogose tovelomu 'adi to'edakumetavo, wata me Diu to'edakumetavo 'au'auveadi Iesu yana wafa 'ana 'eda tonovina faifaina i vena'ivina. 2 I veifufu i 'a'avana bulava kainumu 'wainega i yogoni i naweni i 'aniveleneni Failato 'waineye, taunina gabemani, toveimea bwaikina Loma 'wainega.

Iudasa yana wafa ifufuna.

3 3 Tutuyanina Iudasa, taunina to'etogiluva i 'asetai to'edakumetanidi yadi veimea Iesu i na wafa, i nuavilai, maninina siliba 30 i naweni nuanuana i na vevilai tovelomu 'adi to'edakumetavo wata me Diu to'edakumetavo 'au'auveadi 'waidie. 4 I vonedi i vo, Yau a sakona, tomogonina a 'etogiluneniga yana sauluva tonovidi, siwe 'wa veimea i na wafa.” I voneni i vo, 'Omu taunimu, awale 'u vonevonema?” 5 Bega Iudasa maninina i taweni i nago vanuga 'eba velu'ui 'ana 'efe'efeye, mulieta i obu i nago taunina i 'eto'imeni.

6 Tovelomu 'adi to'edakumetavo maninina i 'ewai i vona i vo, De'e maninina tamu tomogo yana wafa tutulina, 'ai'edi ta na yatoi vanuga 'eba velu'ui 'ana mani taiadi yada veimea ta na geuya.” 7 I veifufu i 'a'avana taunidi yadi nuanua i fali'atumaieni bega maninina 'wainega tamu tanoga i kimwanei. Tanoganina nagami nau 'ana to'abi yadi fwayafwaya dekudekuna 'wainega i 'abi'abidi nau, siwe tutuya de'e i kimwanei i na vetaumata mali tomotoga faifaiddi. 8 Fai maninina 'wainega i kimwaneiga bega i velamu i maiga 'asiau i golegoleni Tanoga Dayadayagina.

9-10 x Tanoganina i kimwaneiga, Yaubada yana tolu'ivona 'ana wagava Ielemaia yana vona-vagata 'ana mogitana i souyeni. Basenadiotoga i vona i vo,

Me Isileli taunidi yadi nuanua i fali'atumaieni,

tomogo tutulina i yatoiga mani siliba 30, 'wainega nau 'ana to'abi yadi tanoga i kimwanei. 'Ana kimwane faifaina yau nagami 'Auvea Yaubada i voneku."

Iesu i vonayavuga Failato mataneye.

¹¹We'e Iesu i tovoitovoi Failato mataneye, taunina gabemani Loma 'wainega, i velutolieni i vo, 'Omu me Diu yadi kini?" Iesu i vo, 'Asa'aiana 'u vona bani'odi." ¹²'Siwe tutuyanina tovelomu 'adi to'edakumetavo wata me Diu to'edakumetavo 'au'auveadi i vevevita-maimaigiga Iesu kebu i da vonavona i veve'wadamo. ¹³Begaidi Failato i voneni i vo, I vevevitamuga nani tulina tulina 'waidiega 'u noganogai 'alo kebu?" ¹⁴Siwe Iesu i baila kebu nuanuana vonanidi i na tutulidi begaidi Failato nuana i vogani.

Failato i veimea Iesu i na wafa.

¹⁵Malamala 'aitamogana 'aitamogana me Diu i sakasakali Uvi'agalatagona faifaina. Sakalinina 'waineye me Diu fue diu tamu iadi yogoyogonina i vevenua'ivineni bega gabemani i 'e'etoyavuya vanuga 'eba yogona 'wainega. ¹⁶Tutuyanina 'waineye tamu tomogo 'ana wagava Balaba i miamia vanuga 'eba yogona nageneye, taunina to'ainike tomotoga fue diu i 'asetai. ¹⁷⁻¹⁸"Me Diu to'edakumetavo yadi nuanua Failato i 'asetai, fai Iesu i ve'unumagigieni begaidi i 'aniveleneni. Bega tutuyanina tomotoga fue diu i va'auta Failato i velutoliedi i vo, Aitoi tomotogaga nuanuami a na 'etoyavuya, Balaba, 'alo Iesu, kumanina i golegoleni Keliso?"

¹⁹Failato i miabuiga vonayavuga 'ana 'eba miabui 'waineye, bola i vevelutolitoli nika tamu tomogo vala i mieni Failato yana vavine 'waidiega i vo, Tomogo we'e kebu i da sakonaga. Kebu tamu ava'ai 'u na 'idewai 'waineye fai lovane 'a 'enoneganega 'a 'iseni 'a kololo wata nuafouma i veviga."

²⁰Failato yana vavine 'adi 'enoneganega bola i veveifufuyeni, tovelomu 'adi to'edakumetavo wata me Diu to'edakumetavo 'au'auveadi 'aila'a nuadi i 'ani'anidi bega Failato i na voneni Balaba i na 'etoyavuya we'e Iesu i na luvewafai.

²¹"Mulieta Failato i velutoli-vaitugana 'waidie i vo, Aitoi tomotogaga nuanuami a na 'etoyavuya?" 'Aila'a i vo, Nuanuama Balaba." ²²Wata Failato i velutoliedi i vo, We'e Iesu, kumanina i golegoleni Keliso, bani'odi a na munegi?" I vo, 'U tutufwaseni 'ai lagalagana 'waineye." ²³Nika Failato i velutoli-vaituganedi i vo, Yana sakona ava'ai?" Siwe tomotoga i toke i vegolegole i vo, 'U tutufwaseni 'ai lagalagana 'waineye." ²⁴Tutuyanina Failato i 'asetai tomotoga kebu nuanuadi yana nuanua,

y 27:12 Mad 26:63; Ais 53:7 z 27:18 Ion 11:47-48, 12:19 a 27:21 Fol 3:14

'aise'avadi i veve'alamagi'ai sai'afoga vetalaga i da souyeni, bega ufa i mieni matadie nimana i lekoadi. I vonedi i vo, De'e yami 'eba 'isa, tomogo de'e yana wafa 'ana vita yau kebu a na tovoieni, 'omi 'ami vita.”²⁵ 'Aila'a matatabudi yana vona i tutuli i vo, 'Asa'aiana yana wafa 'ana vita 'ima natumavo taiadi 'a na tovoieni.”²⁶ Fai tomotoga nuanuadi Balaba, Failato i 'etoyavuya we'e ma'itufa i veimea Iesu i toke i fitali i 'a'avana i 'aniveleneni me Loma tolugaviavo 'waidie i na tutufwaseni 'ai lagalagana 'waineye.

Tolugaviavo Iesu i 'ivekokovi.

²⁷Mulieta Failato yana tolugaviavo Iesu i naweni gabemani yadi vanuga bwaikina 'waineye. Bei tolugaviavo 'aila'anidi matatabudi i maia i tovfifineni i na sidibidibieni. ²⁸'Ana kaleko i yavudi mali kaleko yamoyamoina 'wainega i vekalekoi. ²⁹I vekalekoi i 'a'avana fisili ma yana 'ibadi i 'etofifini 'unu'ununeye i biuleni wata wautogana i 'ewai i vekia'umia 'ana 'atagiega. Vaigavunidi kini 'adi vaigavu bani'odi, igodi i 'odu'odu mataneye i sidibidibieni, i vo, Kaiwa, 'omu me Diu yadi kini.”³⁰ ^bI kiwakiwali wata wautogananina 'wainega 'unu'ununeye i 'a'ainike. ³¹Naninidi i 'idewadi i 'a'avana, kalekonina yamoyamoina i yavuya taunina 'ana kaleko 'wainega i vekalekoi, mulieta i vagavaia i naweni i na tutufwaseni 'ai lagalagana 'waineye.

Iesu 'ana tutufwatagi.

³²I souyedi i nunagoi tamu tomogo Sailini 'ana wagava Saimoni i veluagai i lukakadeni Iesu 'ana 'ai lagalagana i eva. ³³I 'ewa i nagoi i le'wa tamu 'awalawa 'waineye 'ana wagava Goligota, 'ana saivila 'Unu'unu Lulu'ava. ³⁴Bei oine i 'idewai tamu konini golana taiadi i veleni i na yemu bega 'ana kini'ona kebu i na veviga, siwe i baila veviganina faifaina i tauyeni.

³⁵^dMulieta i tutufwaseni 'ai lagalagana 'waineye, i 'a'avana tolugaviavo nuanuadi Iesu 'ana kaleko i na veusedi begaidi tamu 'wava i 'waveni bani'odi kate. 'Ai'edi aitoi i na kumetaga ava'ai kalekoga nuanuana i na 'ewai. ³⁶I 'a'avana mulieta i miabui i 'isa'isamo. ³⁷'Ana 'ai lagalagana tabwaneye vonanina 'wainega i vevitaiga i kilumi i tutufwaseni i vo,
TOMOGO DE'E IESU, ME DIU YADI KINI.

³⁸^eWata tovainago 'adi 'ailuga i tutufwasedi, tamu Iesu 'ana 'atagiega, tamu 'ana wamayega.

³⁹⁻⁴⁰^fTomotoga 'ai lagalagana lilivaneamo i nunagoi, i veugalewalewa wata Iesu i yagayagaia i vo, 'Omu igodi vanuga 'eba velu'ui 'u da sigeuya

^b 27:30 Ais 50:6 ^c 27:34 Same 69:21 ^d 27:35 Same 22:18 ^e 27:38 Ais 53:12
^f 27:39 Same 22:7; 27:40 Ion 2:19

wata 'aiata 'aitonu nagedie 'u da vetovoia. 'Ai'edi 'omu Yaubada natuna, nika taunimu 'u 'ita'ita'iemu, 'u obuma 'ai lagalagana 'wainega.”

⁴¹⁻⁴²Wata bani'odi tovelomu 'adi to'edakumetavo, ve'etoboda 'adi tovevo, wata me Diu to'edakumetavo 'au'auveadi i sidibidibieni i vo, Tomotoga 'ifwaidi i 'ita'ita'iedi, we'e taunina kebu 'ana fata. Igodi me Isileli yada Kini. 'Ai'edi 'asiautoga i da obuma 'ai lagalagana 'wainega ta da ve'awamogitana. ⁴³¶I vetumagana Yaubada 'waineye wata i vo, Yau Natuna,” nika ta na 'iseni 'ai'edi mogitana Yaubada nuanuana i na 'ita'ita'ieni.” ⁴⁴Wata bani'odi tovainagonidi i tutufwasediga ma fuedie i manini.

Iesu i wafa.

⁴⁵'Aiata 'ana utukamwana 'waineye fwayafwaya matatabuna i dudubali, dudubalanina i 'eno'eno 'awasasa 'aitonu. ⁴⁶^hLavilavie bani'odi 3 kiloki Iesu i toke i vegole me Diu bonadiega i vo, Iloi, Iloi, lema sabakitani,” 'ana saivila, Yaku Yaubada, yaku Yaubada, awale 'u bailaotogeku?” ⁴⁷'Ifwaidi tomotoga i tovtovoiga bonana i nogai i vo, Ilaitia, kumanina basenadiotoga i nago abame, i golegoleni nuanuana i na mai i na 'ivaiseni.” ⁴⁸Tamu tomogo i lilide i nago kikifa i lu'utuvi oine yuyuna 'waineye, tamu 'ai 'waineye i velugaganeni i 'iyoyoeni Iesu 'waineye nuanuana i na yemu. ⁴⁹Nika 'ifwaidi i vo, 'U ve'wada, nagami ta na 'iseni voke Ilaitia i mimai i na 'ita'ita'ieni.”

⁵⁰Wata Iesu i toke i vegole, 'anu'anununa i tauyeni nika yawaina i 'awatagoni.

⁵¹⁻⁵²ⁱVanuga 'eba velu'ui nageneye tamu kaleko bwaikina Yaubada yana tutudaba tabutabuotogina i sisibodeni. Tutuyanina Iesu yawaina i 'a'avaga kalekonina i 'anilabu'alugedi, tabwanega i obu dibuneye, nika bani'odi i sibaleni 'eba luku Yaubada 'waineye. Yoyoyo i yue, kileu i 'anifuadi, wata taumata 'ifwaidi i si'ididi, Yaubada yana tomotoga 'atumaidi basenadi i wafaga, fuedi i yawasa. ⁵³'Adi taumata i 'iawedi, mulieta tutuyanina Iesu wafayega i tovoi tomotoganidi i nagoi Ielusalema, bei tomotoga fuedi i 'isedi.

⁵⁴We'e tolugaviavo ma yadi to'edakumeta 'ai lagalagana lilivaneye i tovoi i 'ise'iseni, nika yoyoyo i yue, dudubala wata nani 'ifwaidi i 'isedi i kololo bwaikina i ve'awamogitana i vo, Vona mogitana, taunina Yaubada Natuna.”

⁵⁵^jWata vevine fuedi 'ani'ieyega i tovoi i 'isanago 'ai lagalagana 'waineye, kumanidiavo Iesu taiadi Galiliega i maia 'ana to'aivaita. ⁵⁶Vevinenidi 'waidiega 'adi 'aitonu side 'adi wagava, Meli 'atamana

§ 27:43 Same 22:8; Ion 5:18 ^h 27:46 Same 22:1 ⁱ 27:51 Sou 26:31-33; Ibu 10:19-20
j 27:55 Luk 8:2-3

Magidala 'wainega, Meli Iemesa ma taina Iosefa inadi, wata Sebedi yana vavine, kumanidi Iemesa ma taina Ioni inadi.

Iesu 'ana ve'ufa.

⁵⁷Akonadi i laviotogi tamu tomogo 'atamana Alimadia 'wainega i mai 'ana wagava Iosefa, taunina tamu Iesu yana tovetutuyama wata 'ai'aiwabuna. ⁵⁸^kI nago Failato 'waineye i velu'ui Iesu tomogona faifaina. Bega Failato yana tolugaviavo i vonedi Iesu tomogona i na ta'ia Iosefa i na veleni. ⁵⁹⁻⁶⁰^lIosefa Iesu tomogona i naweni kaleko 'ivauna wata 'avu'avuna 'wainega i fania, mulieta taunina 'ana taumata bogiotoga i ala-vagaseniga matumatu 'waineye, bei i ve'ufai. I ve'ufaina kileu bababana i ketoi i mieni taumata 'awana i vetovibodai mulieta i tauya. ⁶¹Meli 'atamana Magidala 'wainega ma wagavina Meli i miabui taumata matanega i 'ise'iseni.

Iesu 'ana taumata i ve'isabodeni.

⁶²⁻⁶³^mIesu i tutufwaseniga me Diu yadi 'Aiata 'Idewadewa 'waineye, bega i 'atai tovelomu 'adi to'edakumetavo wata totafalolo Falisi i nagoi Failato 'waineye i voneni i vo, 'Auvea, tamu vona a nuanuani Iesu kumanina tovekali basenadi ma yawaineye i vona i vo, A na wafa siwe 'aiata 'ana vetonu 'waineye wata a na tovoi.” ⁶⁴Fai bani'odi i voneyedi nuanuama 'u na veimea taumata i na ve'isabodeni i na nagoga 'aiata 'aitonu i na 'a'avana mulieta i na 'iaweni. I na ve'isabodeniga nika yana tovetutuyamavo kebu 'adi fata i na nago tomogona i na vinagoi i na yatovai'edeni, we'e tomotoga i na vekaliedi i na vo, 'Akonadi i tovoi wafayega.” Nika vekalinina i na vebwaika-'afo'afo nagami yana vekali sai'afo siaina.” ⁶⁵Bega Failato i vonedi i vo, Tolugaviavo a tauyedi, 'wa nawedi taumata i na 'isave'avini, 'akonadi i 'asetai siwe 'wa na ve'isaboda-'atumaieni.” ⁶⁶Failato i vonedi i 'a'avana, i tauya i nagoi, taumatanina 'ana saiboda 'waineye yadi tugusa i yatoi bega kebu tamu aitoi 'ana fata i na luku, wata tolugavianidi i vonedi i na ve'isabodeni nika i tauya.

Iesu i tovoi-vaitugana wafayega.

28 ¹Me Diu yadi 'Aiata Veawai i 'a'avana, Tafalolo 'awa'awaiogose, Meli 'atamana Magidala 'wainega ma wagavina Meli i tovoi i nagoi taumata i na 'iseni.

²Yoyoyo bwaikina i yuega 'Auvea yana anelose abamega i obuma kileu bababana bega taumata i sibodaiga i bifeleni i laka tabwaneye i miabui. ³Anelosenina 'ana 'isa 'wa da vo tomuyoana i da kianamali we'e

^k 27:58 VeL 21:22-23 ^l 27:60 Ais 53:9 ^m 27:62-63 Mad 16:21; Ion 2:19-21

'ana kaleko 'adi lau'avu mataududulidi. ⁴Tolugavianidi i 'iseni i kololo bwaikina i tatava nika i 'anifoidi 'adi 'isa 'wa da vo i da wafa.

⁵Anelosenina vevine i vonedi i vo, We'e 'omi kebu 'wa na kolologa. A 'asetami Iesu kumanina i tutufwaseniga 'ai lagalagana 'waineye 'wa lulualeni. ⁶"De'e kebu, 'akonadi i tovoi wafayega bani'odi basenadi i vona. 'Wa maia 'wa na 'iseni 'ana 'ivi'ava."

⁷Mulieta wata i vonedi i vo, Tutuya de'e 'wa na vila-matayo'omi 'wa na nagoi yana tovetutuyamavo 'wa na vonedi 'wa na vo, Iesu 'akonadi wafayega i tovoi, i kumekumeta 'awalawa Galili, 'wa na nagoi bei taiadi 'wa na veluaga. Side bani'odi."

⁸Vevinenidi yana vona i nogai nika i tauya ma yadi kololo wata ma yadi sosoana i lilide i nunagoi tovetutuyamavo i na vonedi. ⁹I nunagoiga nika Iesu i veluagai i vonedi i vo, Ekwavo, kaiwa." I vaganagoi 'waineye ma yadi ve'ililibu i be'u mataneye, 'ageneye i 'abi i subiai." ¹⁰"Wata Iesu i vonedi i vo, Kebu 'wa na kolologa, 'wa na nagoi taikwavo 'wa na vonedi i na nagoi Galili bei taiadi 'a na veluaga."

Taumata 'ana tove'isaboda yadi lu'ivona.

¹¹Iesu i vona'a'avana vevine i tauya i nunagoi, wata tolugaviavo 'ifwaidi, kumanidiavo taumata i 'iveve'isabodeniga i nagoi Ielusalema naninidi i souyediga matatabuna i lu'ivoneyedi tovelomu 'adi to'edakumetavo 'waidie. ¹²⁻¹³"Mulieta tovelomu 'adi to'edakumetavonidi wata me Diu to'edakumetavo 'au'auveadi i va'auta i veifufu yadi nuanua i 'idewai. I 'a'avana, tolugavianidi i vonedi i mai mani bwaikina i veledi wata i vonedi i vo, 'Wa na nagoi 'wa na vonavona 'wa na vo, Lovane 'a 'eno'enovi yana tovetutuyamavo i maia Iesu tomogona i vinagoi."

¹⁴'Ai'edi de'e bani'odi 'wa na vonevoneyedi toveimea bwaikina gabemani i na nogai i na nuasakoga 'waimie, 'ima nuana 'a na 'ive'atumaia nika kebu vita i na velevelemi." ¹⁵Tolugavianidi mani i 'ewai i nago i veveifufu tomotoga 'waidiamo i vo, Lovane 'a 'eno'enovi, yana tovetutuyamavo i maia tomogona i vinagoi." Bega vonanina me Diu fueidi i nogai i vo, Mogitana," i maiga 'asiau wata bani'odi i vonevoneyedi.

Iesu yana tovetutuyamavo yadi folova i veledi.

¹⁶Iesu yana tovetutuyamavo matatabudi 11 i nagoi 'awalawa Galili i laka 'oyanina Iesu i voneyeniga 'waineye. ¹⁷Tutuyanina i 'iseni i 'odu mataneye i subiai, we'e 'ifwaidi ma yadi venuanaluga i vo, Mogitana Iesu 'alo tulina?" ¹⁸"Iesu i vaganago 'waidie i vonedi i vo, Yaubada veimea i veleku i tauyeku nani matatabuna abame wata fwayefwayeye a na

ⁿ 28:6 Mad 16:21 ^o 28:7 Mad 26:32 ^p 28:10 Ibu 2:11 ^q 28:13 Mad 27:64
^r 28:18 Mad 11:27; Ion 13:3; Efe 1:21-22

veimeyedi. ¹⁹Bega 'wa na nagoi tomotoga matatabudi 'aila'a tulina tulina 'waidie, 'wa na lau'age 'waidie bega taunidi 'aku tovetutuyamavo. Wata 'wa na bafitaisodi Tamada 'ana wagavayega, Natuna 'ana wagavayega, wata 'Anu'anunu 'Atumaina 'ana wagavayega. ²⁰'Veimea matatabudi a velemiga 'wa na ve tovetutuyamavonidi 'ivaudi 'waidie bega i na vematayakeyakedi. A vona mogitana 'waimie yau tutuya fueidi lilivamie taiadi ta na miamia i na nagoga fwayafwaya 'ana 'eba ve'a'ava 'waineye.”

^s 28:19 Fol 1:8 ^t 28:20 Ion 14:23; Ibu 13:8